



Položen kamen temeljac za izgradnju Islamskog kulturnog centra



PRVI ZAJEDNIČKI "NARODNI IFTAR"



HISTORIJSKI PROJEKT



DODIJELJEN REKORDAN BROJ STIPENDIJA



SADRŽAJ:

Kabinet načelnika	3
Općinsko vijeće	16
Privreda	18
Infrastruktura	24
Obrazovanje	43
Kultura	47
Sport	68
Obilježavanja	76
Ostale vijesti	92

VAŽNIJI TELEFONI I E-MAIL ADRESE

Općinski načelnik

nacelnik@opcinabuzim.ba
kabinetnacelnika@opcinabuzim.ba
037 419-511

Stručna služba Općinskog vijeća
općine Bužim

predsjedavajuci.ov@opcinabuzim.ba
sekretar.ov@opcinabuzim.ba
037 419-516

Služba za prostorno uređenje, geodetske
i imovinsko-pravne poslove

spugi@opcinabuzim.ba
037 419-501

Služba za budžet i finansije općine Bužim

bif@opcinabuzim.ba
037 419-504

Služba za razvoj i poduzetništvo

razvoj@opcinabuzim.ba
037 419-518

Općinska služba civilne zaštite

cz@opcinabuzim.ba
037 419-513

Općinsko pravobranilaštvo

pravobranilastvo@opcinabuzim.ba
037 410-262

Grb Bužima temelji se na povijesnom grbu u moderniziranoj izvedbi: u plavom četiri crvene kružne kule povezane ljubičastim zidinama, iznad njih polumjesec, ispod ljljan, oba zlatna, ispred desne kule ruka koja drži malj ("topz") i ratni čekić ("nadžak"), a ispred lijeve kule stoji viter koji drži zastavu, opasan sabljom i iznad njega polumjesec i dvije zvijezde, sve zlatno, i preko svega zeleni panel u kojem je vrh strelice između dvije ptice, isto sve zlatno. Ispod štita je zelena vrpca na kojoj je bijelo ime općine. Koriste se bijele zastave s grbom u sredini.

grafički standardi



Odluka o grbu općine Bužim je usvojena, 05.02.1996, Službeni glasnik općine Bužim, br. 6/96, 08.02.1996. godine.

Logo općine Bužim i sve njegove varijacije predstavljaju zaštićenu marku. Navedeni grafički standardi se moraju striktno poštovati. Upotreba navedenog loga je striktno namijenjena za potrebe općine Bužim, medijske i poslovne partnere. Svaka druga upotreba bez odobrenja je striktno zabranjena i podliježe zakonskim sankcijama. Logo se može preuzeti na Službenoj stranici općine Bužim.

IZDAVAČ: JU "Centar za kulturu, sport i informisanje" Bužim

Tel: +387/ 37 410-332

E-mail: jucksi@hotmail.com; jucksi.buzim@bih.net.ba

www.jucksi.buzim.ba

UREĐIVAČKI KOLEGIJ: Nanić Rijad, Nanić Mersudin

FOTOGRAFIJE: Porić Nisvet, JU "Centar za kulturu, sport i informisanje"

DTP: Nanić Mersudin



Intervju načelnika općine Bužim Agana Bunića za Preporod

Medžlis Islamske zajednice u Bužimu i Općina Bužim su institucije koje, svaka u svom domenu, imaju nezamjenjive uloge u vjerskom i društvenom životu članova Islamske zajednice Bužimskog medžlisa i stanovnika Bužima. Otud sasvim razumljivost u očekivanju da se ova dva faktora društvene i vjerske provenijencije zalažu i bore za unaprijeđenje duhovnog i materijalnog stanja među ljudima. Bilo kakvo izbjegavanje i zaobilaženje saradnje, pomaganja i oslanjanja jednih na druge ne vodi napretku kako pojedinca tako i zajednice.

Imajući u vidu demokratske tokove, cijeneći otvorenost, uvažavanje, a želeći da se konkretizuju međusobni odnosi, u hotelu Europa u Bužimu je prvog dana Kurban-bajrama, odnosno 15. oktobra 2013. ili 10. zuhidždžeta 1434. hidžretske godine potpisan Sporazum o saradnji između Medžlisa i Općine, a čiji potpisnici su predsjednik Izvršnog odbora Medžlisa Eniz ef. Veladžić i načelnik Općine Agan Bunić.

Taj momenat uspostave čvršćih relacija dviju strana povod je razgovoru s prvim čovjekom male i relativno mlade općine Bužim gospodinom Aganom Bunićem.

Poštovani načelniče, molim vas da za čitaoce Islamskih informativnih novina Preporod, a kojih u Bužimu ima značajan broj, ukratko predstavite ovu, po mnogo čemu, specifičnu Općinu?

Prije svega dozvolite da selamim čitaoce Preporoda i zahvalim se na časti da govorim za ove novine. Općina Bužim je jedna od najmlađih općina u domovini sa površinom od 129 km². Današnje područje općine čini 14 mjesnih zajednica: Bužim, Konjodor, Čava, Varoška Rijeka, Vrhovska, Lubarda, Elkasova Rijeka, Zaradostovo, Bučevci, Mrazovac, Radoč, Brigovi, Bag i Jusufovići. Krajem pedesetih godina prošlog stoljeća Bužimu je ukinut status općine i ponovo mu vraćen ratne 1995. godine od strane ratnog Predsjedništva RBiH na čelu sa rahmetli Alijom Izetbegovićem. Od tada, evo 18 godina, Bužim korak po korak ide naprijed, i danas predstavlja vitalnu i srednje razvijenu općinu sa preko 20.000 stanovnika.

S čim se ponosi Općina i Bužimljani i šta je njen zaštitni znak?

Ono što Bužim čini posebnim jeste njegova uloga i značaj u protekloj agresiji u toku koje je Bužim dao jednu od najboljih brigada u Armiji RBiH „Petstopetu vitešku“, brigadnog generala rahmetli Izeta Nanića, Hamze, Gazije, te visoka nacionalna, državna pa i vjerska svijest njegovog stanovništva.



Posebnost Bužimljana se ogleda i u tome što su uvijek dobri domaćini dobronamjernim gostima, što se u Bužimu može osjetiti duh male bosanske čaršije, što je u doba globalizacije i drugih svjetskih trendova rijetkost. Svakom vremenskom periodu Bužima, pa i ovome, Bužimljani dadnu pečat; bilo kao uspješni pojedinci, ratnici, privrednici, poljoprivrednici, domoljubi, studenti, ljekari, profesori i to je pozitivno i afirmativno.

Iako ste na čelu Općine nepunu godinu dana, molim vas da kažete otkud i od koga ideja da se potpiše Sporazum o saradnji sa Medžlisom IZ-e?

Potpisani Sporazum je rezultat kontinuiteta i odraz dugogodišnje saradnje Općine i Medžlisa IZ-e Bužim. Sasvim opravdana ideja o potrebi regulisanja konkretnijih odnosa, javila se na sjednicama Izvršnog odbora Medžlisa usljed brojnih rasprava o aktivnostima koje zajedno provode ove dvije institucije. Istovremeno, ona se razumjela kao znak međusobnog uvažavanja, ali i dokaz unaprijeđenja odnosa u stvaranju institucionalnog okvira za zajedničko djelovanje od opće društvene koristi.

Šta će ovaj Sporazum značiti Medžlisu IZ-e, a šta Općini ili, bolje rečeno, da li će on biti mrtvo slovo na papiru?

Vjerujemo da neće biti samo slovo na papiru, jer već imamo dobru saradnju i bez Sporazuma. Njegov cilj je nježno jačanje, proširivanje, odnosno da programi od zajedničkog interesa ne budu pod utjecajem dnevno-političkih dešavanja, da za određene poslove i obaveze ne bude bitno ko se u kojem trenutku nalazi na čelu Medžlisa ili Općine, tj. da Medžlis ne bude u podređenom položaju bez obzira koji politički kurs imalo rukovodstvo Općine. Medžlis IZ-e Bužim mora imati jasnu poziciju na području općine Bužim, utemeljenu na međusobnom uvažavanju i razumjevanju uloge i jedne i druge institucije.

Da li ovakav vid Sporazuma, sa tendencijom da u općinskom budžetu bude neupitna grantna stavka za IZ-u, znači indirektno vraćanje duga, s obzirom da je IZ-a pogotovo u doba agresije na Bosnu i Hercegovinu uveliko zadužila društvenu zajednicu?

Sporazumom se utvrđuje da Općina u svom godišnjem budžetu ima planirana sredstva za rad Medžlisa i da ona ne budu upitna. Osim toga Sporazum predviđa i reguliše i druge tokove, prvenstveno korisne za IZ-u, vraćanje vakufske imovine, olakšice pri izdavanju građevinskih dozvola za izgradnju vjerskih i objekata potrebnih IZ-i itd. Naravno, nesporna je uloga IZ-a u protekloj agresiji, to se itekako uvažava i ničim se to ne treba minimizirati. Ustvari, potpisani sporazum o saradnji Bužimskog medžlisa i općine Bužim pozitivan je impuls i na neki način indirektno vraćanje duga IZ-i.

Postoji li ovakav primjer saradnje negdje drugdje, pa ste ga kopirali, ili je ovo nov pristup u razumijevanju IZ-e u kojem i drugi mogu naći inspiraciju?

Nemam informaciju da postoji, ali evo bićemo primjer

drugima. Ima se šta čuti i vidjeti u Bužimu, vazda je bilo, samo moramo tražiti i isticati te pozitivne primjere. Ovaj Sporazum može da bude forma saradnje i za druge oblasti društvenog djelovanja (npr. obrazovanje, zdravstvo, boračke organizacije itd.).

Kažite, molim vas, kakva je dosadašnja saradnja između Medžlisa i Općine i ima li u njoj nekakve posebnosti?

Teško mi je razdvojiti te dvije uloge, jer sam član Izvršnog odbora Medžlisa, istovremeno član džematskog odbora u svom džematu (Centar Bužim) i trenutno na poziciji Općinskog načelnika. Uglavnom, mlađi ljudi su na čelu Medžlisa, pa i Općine, možda je to jedan od razloga dobre saradnje. To treba biti jedna duša, a dva tijela, ako smo iskreni u poslovima koje obavljamo. U tim odnosima ne smije biti ni podređenih ni nadređenih. U njima mora postojati mjera zbog specifičnosti uloge koju ima svaka od institucija.

Gospodine načelniče, vraćamo se na početak razgovora. Molim vas da kažete u kakvoj je ekonomskoj ili finansijskoj situaciji Općina i kako se nosi s trendom recesije, ograničenih investicija?

Bužim dijeli sudbinu cijele domovine kad je u pitanju ekonomsko stanje, kriza, nezaposlenost (trenutna stopa nezaposlenosti u Bužimu je preko 70 %) i u takvim okolnostima je dosta teško raditi i djelovati. Međutim, moramo tražiti rješenje, ne smijemo gubiti nadu, i uvijek postoje rješenja, pa i u teškim vremenima. Danas država i općine ne mogu zaposliti sve nezaposlene i tako popraviti stanje. Međutim, obaveza je da se nastoje omogućiti što bolji uslovi za razvoj i zapošljavanje kroz različite vidove (privatni biznis, mala preduzeća, proizvodnja zdrave hrane). Budžet naše općine je realan, održiv i redovno finansiramo sve planirane obaveze.

Najčešće, i općine se zadužuju i idu u milionske kredite. Koliko sam upoznat, tom cilju teži i Općina Bužim. Šta bi to značilo Općini i nema li boljih rješenja?

Općina Bužim skoro da nema kreditnog zaduženja, svega 40.000 KM za kredit kojim je rađena sekundarna vodovodna mreža. Nažalost danas nema velikih investicija bez kreditnog zaduženja. Smatram opravdanim zaduženje općine samo u slučaju kupovine zemljišta za Poslovnu zonu u Varoškoj Rijeci, ali na žalost ta odluka na posljednjoj sjednici Općinskog vijeća nije dobila potrebnu većinu glasova. Teško ćemo u budućnosti graditi sportsku dvoranu, kanalizacioni sistem, i druge velike kapitalne projekte bez kreditnih zaduženja. Osnovno je znati do kojeg iznosa se može ići u zaduženje, kako izmirivati dugovanja i pri svemu tome imati stabilnost u funkcionisanju općine i njenih organa.



Možda je nerealno, s obzirom da se za godinu dana ne može nešto spektakularno učiniti, ali s kojim rezultatima možete stati pred javnost?

Prva godina je protekla u sagledavanju zatečenog stanja, uspostavi dobrih odnosa sa Općinskim vijećem i ostalim institucijama, otvaranju vrata koja su bila zatvorena, otvaranju Općine prema drugima i vraćanju povjerenja građana u općinu Bužim. Nastavili smo sa investicijama, bez obzira na krizu i prilično nepovoljan odnos viših organa vlasti prema Bužimu. Konačno smo počeli i prve radove na projektu vodosnabdijevanja MZ Konjodor, nastavili smo sa aktivnostima u izgradnji zaobilaznice, nastavili ulagati u Dom kulture Bužim, izgradili smo više kilometara asfaltnog puta, otkočili projekte izgradnje javnih rasvjeta u našim mjesnim zajednicama. Hvala Bogu, mogu reći da se radilo i trudilo, a gdje god ima rada ima i rezultata.

Šta možete reći o budućnosti Općine, jer je poznato da manje općine teže funkcionišu, pogotovo što Bužim, skoro, nema industrije?

Mi nismo mala općina, imamo preko 20.000 stanovnika i ne prihvatam da smo nerazvijena općina. Predstavljamo jednu vitalnu općinu, koja ima relativno mladu populaciju i ona ima svoju budućnost, bez obzira na teška vremena. Naravno, radimo na tome da bude više posla u Bužimu, da se neke firme koje trenutno ne rade ponovo pokrenu, ili da one koje već rade imaju više zaposlenih. Po meni nije sve crno u tom sektoru. Ne želim unaprijed govoriti kakve će rezultate donijeti aktivnosti koje smo vodili i vodimo u pravcu zapošljavanja, ali očekujemo određene efekte već u narednom periodu.

Ima li Općina Bužim razvojnu strategiju, koliko je opravdana, kakvi su projekti aktuelni i hoće li ih biti u skorijoj budućnosti?

Općina ima usvojenu strategiju razvoja u skladu s evropskim standardima, koju pokušavamo sprovesti u najvećoj mogućoj mjeri. Svi naši projekti su sadržani u strategiji razvoja, a građani su ih predlagali i rangirali u listi prioriteta. Mi se moramo okrenuti realnim mogućnostima, vidjeti šta realno možemo uraditi u određenom vremenskom periodu, bez velikih priča i obećanja. Imamo još prostora u poljoprivredi, ovo je stoljeće zdrave hrane i bez obzira na sve možemo proizvesti puno više poljoprivrednih proizvoda u ovim našim brdima. Poljoprivreda je težak i zahtjevan posao, zemlja nije za intenzivnu poljoprivrednu proizvodnju, ali Bužimljani itekako uspijevaju u proizvodnji mlijeka i malina. Moramo biti hrabriji i reći ljudima da moraju raditi i živjeti od svog rada. Dosta je važnih projekata koji bi se, ako Bog da, trebali realizovati uz maksimalnu uključenost Općine, kao i viših nivoa vlasti. Među njima su, kao što sam prije rekao, vodosnabdijevanje Mjesne zajednice Konjodor, gdje oko 2.000 stanovnika nema dovoljno vode za piće, završetak građevinskih radova na Domu

kulture, izgradnja sportske dvorane, izgradnja druge faze obilaznice kroz Bužim, lokalne putne mreže itd.

Vi ste načelnik svih građana Općine. Kakva je vaša komunikacija s njima i da li imate praksu da ih povremeno primite, obidete, čujete?

Trudim se biti načelnik svih, jer samo u izbornim kampanjama postoji razlika između nas, a poslije treba raditi i opravdati povjerenje onih koji su dali podršku, te uvjeriti one koji su bili protiv da smo na ispravnom putu i za prosperitet. Nemam problema kad je u pitanju komunikacija s građanima, jer se trudim biti s njima i njihovim problemima. Uveo sam redovan prijem u kabinetu načelnika svakog petka od 8 do 12 sati za sve koji imaju šta kazati i pitati. Redovne su posjete mjesnim zajednicama, trudim se svakog petka da džumu klanjam u drugom džema'atu te da i na taj način budem dostupan ljudima. U praksu uvodimo i održavanje javnih debata s načelnikom, gdje građani imaju priliku da pitaju sve što ih interesuje, a vezano za rad općine. Otežavajuća okolnost u komunikaciji i informisanju jeste nepostojanje lokalne radio stanice, ali i na tom planu se vode određene aktivnosti.

Vi ste mlad, ali ste se prihvatili velike odgovornosti. Za političare se može čuti da su u politici radi ličnih, a ne da bi služili općim interesima? Kako ovo objašnjavate?

Nešto mlađi. Po zanimanju sam diplomirani pravnik, imao sam posao u struci, ali sam uvijek smatrao da kroz društveno-politički angažman mogu dati više za svoj Bužim, i sve ovo što radim jeste želja da pomognem u razvoju lokalne zajednice, koja može više i bolje, jer to objektivno zaslužuje. Naravno, ovo je pozicija odgovornosti, za koju ću biti pitan na oba Svijeta. Posao političara u ovoj zemlji je vazda pod lupom, malo se nekad i pretjera, ali se ne treba libiti i reći da ima neodgovornosti i da pojedini političari često puta daju prednost ličnim nad zajedničkim interesima. Lično, trudim se da radim svoj posao savjesno i predano. Radeći u interesu građana i Općine, skoro pa sam se odrekao korištenja godišnjeg odmora i dana vikenda. Nastojim da radom opravdam platu koju primam i, hvala Bogu, za sada mirno spavam. Hvala vam na razgovoru, uz želju da vas Uzvišeni Allah pomogne u poslu, da ličnim trudom, dogovaranjem, uvažavanjem tuđih mišljenja, zajedničkim radom doprinesete boljitku Bužima i da na najbolji način opravdate povjerenje koje vam je dato od građana.



Uskoro prvi radovi na izgradnji sportske dvorane

Kako se u proteklih godinu dana intenzivno radi na iznalaženju realnog projektnog rješenja za izgradnju sportske dvorane u Bužimu ovih dana je i taj problem definitivno riješen preuzimanjem glavnog projekta Sportske dvorane Bužim od firme Širbegović d.o.o. iz Gračanice. Naime, navedena firma je potpuno besplatno izgradila idejno rješenje i glavni projekat za dvoranu, na osnovu čega je već izdata urbanistička saglasnost a ovih dana se očekuje i po prvi put izdavanje građevinske dozvole za dvoranu, čime bi bili u potpunosti ispunjeni uslovi za početak radova. Na ovaj način općina Bužim je ispunila sve svoje obaveze u dijelu stvaranje uslova za izgradnju. Na tragu dosad urađenog i intenzivnog traženja partnera u ovom projektu Općinski načelnik Agan Bunić je 30. 07. 2014. godine potpisao Ugovor o sufinansiranju izgradnje Sportske dvorane u Bužimu sa federalnim Ministarstvom kulture i sporta i ministrom Salmirom Kaplanom u iznosu od 40.000 KM, te su na taj način obezbjeđena inicijalna sredstva za prve radove na ovom projektu.

„Tražili smo realno i provodivo rješenje, morali smo odustatu od starog projekta koje je bio neprovodiv i skup, oko 5-6 miliona KM, koji je plaćen a nikakve koristi od njega. Novi projekat smo besplatno dobili zahvaljujući firmi Širbegović, koja nam je kao lider u izgradnji ovih projekata u cijeloj BiH samo htjela pomoći da krenemo sa mrtve tačke. Po navedenom glavnom projektu ukupna izgradn-

ja bi koštala oko 1,3 miliona KM. Već smo od federalnog ministarstva obezbjedili skromnih 40.000 KM, u svom budžetu imamo 25.000 KM, te namjenskih sredstava od izgradnje skloništa oko 50.000 KM koje možemo utošiti za izgradnju dvorane, što znači da ukupno na raspolaganju imamo oko 115.000 KM. Za narednu sjednicu Općinskog vijeća ću pripremiti Odluku o davanju saglasnosti na raspisivanje tendera za izbor izvođača pod uslovima da raspoloživa sredstva realiziramo u ovoj godini, a razliku u naredne dvije budžetske godine ili iz drugih izvora koja se mogu obezbjeđiti u narednom periodu, a radi se oko 235.000 KM koliko nam nedostaje za I fazu (pripremnii radovi, zemljani radovi i ukupna betonska konstrukcija do krova) koja košta oko 350.000 KM. Navedenom odlukom Općinsko vijeće će biti upoznato sa novim projektom, načinom izgradnje i financiranjem, te ostalim aktovnostima koje vodim kao Općinski načelnik oko izgradnje ovog projekta. Naravno, ovo je poziv i za ostale nivoe vlasti od kantona do države da se uključe u izgradnju dvorane, svi su dobrodošli da pomognu, jer to je naša zajednička obaveza prema Bužimu, prema oko 25 sportskih klubova, prema 750 učenika srednje škole koja nemaju nikakve sportske sale, i niz drugih uspješnih sportista sa područja općine Bužim“ kazao je načelnik Bunić prilikom potpisivanja ugovora sa federalnim Ministarstvom kulture i sporta.



Mališani iz vrtića na prijemu kod načelnika

Povodom Dana općine Bužim upriličen je prijem za mališane Dječijeg vrtića Bužim. Najmlađe Bužimljane koji su došli u pratnji direktora Neđžada Grošića i vaspitača u općinskoj sali sa slatkišima i sokovima su dočekali načelnik općine Agan Bunić sa saradnicima. Mališani su na prijemu pripremili posebno iznenađenje i načelniku poklonili veliku rođendansku tortu, koju su za 19. rođendan poklonili svome gradu, te svoj crtež koji su uradili zajedno sa vaspitačicama. Pored toga, priredili su pjesmice i recitacije i na taj način čestitali Dan općine Bužim.

„Načelnik se najmlađim stanovnicima zahvalio na prigodnim poklonima i kazao da je ovo sigurno najljepši prijem koji općina može organizovati. Preljepo je vidjeti ovu dječicu u općinskoj sali i dječija prava svima treba da budu prioritet kako bi sva djeca imala sretniju i bolju budućnost. Također, izrazio je zadovoljstvo što vrtić funkcioniše po prvi put u punom kapacitetu. Djeca su zadovoljna hranom, vaspitačima i igračkama, a mi ćemo ovakve aktivnosti podržavati i u budućem periodu jer vrtić mora funkcionisati bez obzira na materijalnu situaciju, rekao je načelnik Bunić.





Sekcija „Demokratija“ OŠ „Bužim“ u posjeti općini Bužim

Povod ove posjete je projekt „Građanin“. Ovo je sekcija koja ustvari egzistira u svim školama na našem kantonu. Svaka škola preko ovih sekcija radi jedan projekat „Građanin“, preko kojega pokušava riješiti određeni socijalni problem u svojoj sredini. Naša škola je odabrala projekat „Neimaštine u našoj školi“. Kada su u pitanju naši učenici koji čine ovu sekciju moramo istaknuti da su danas sa nama biseri naše škole, neki od njih su u užoj konkurenciji za učenika generacije, aktivni u raznim kulturnim sporskim i društvenim aspektima života. Došli smo da Vas upoznamo sa tim problemom iako smatramo da sve Vi dobro upućeni i da vodite određene aktivnosti kada je ovaj problem u pitanju, ali smo željeli da Vam to predstavimo iz naše perspektive, rekao je Edin Mulalić nastavnik koji vodi sekciju, te se zahvalio Načelniku na prijemu. Učenice Aljić Ilhama, Zerina Handanović i Elma Burzić su poblizje objasnile projekt kojim žele pomoći svojim drugovima iz školskih klupa. U našoj školi ima puno onih čiji roditelji nisu zaposleni, sve je veći broj i onih koji su bolesni i njihovi roditelji nisu u stanju da im obezbijede liječenje. I pored svih problema sa kojima se susreću, učenici iz ovih porodica, nastoje i trude se da održe odličan uspjeh i jedni su od najboljih u razredu, takve učenike smatramo da treba nagraditi sa ekskurzijom. Razmišljajući o ovim

problemima pokrenuli smo inicijativu za rješavanje socijalnog statusa u okviru naših mogućnosti. Pored naše dobre volje potrebna nam je podrška i šire zajednice, te smo iz tog razloga došli da Vas podsjetimo kako bismo riješili ove i slične probleme. Upoznati smo i sa projektima koje vodi Općina ali i nevladina organizacija „Sadaka“ i privatna lica u kupovini školskog pribora i pomoći učenicima naše škole. Cilj ovog projekta je rješavanje pomenutih problema i to u suradnji sa lokalnom zajednicom. „Općina Bužim pokušava dati svoj maksimum kada je u pitanju pomoć ovim kategorijama. Ove godine smo dodijelili najveći broj stipendija, jedna smo od rijetkih općina koja isplaćuje jednokratnu pomoć nezaposlenim porodiljama. Mi radimo ono što možemo u okviru svojih budžetskih mogućnosti. Raduje me da ste ovako mladi počeli da se bavite ovim društvenim aktivnostima što mi daje nadu u bolje sutra, nadu u poboljšanje i unaprijeđenje naše lokalne zajednice“, rekao je načelnik Agan Bunić. Učenica Elma Kovačević je ovom prilikom uručila sliku koju je specijano nacrtala za ovu priliku, a inače Elma Kovačević, učenica devetog razreda Osnovne škole “Bužim“ je osvojila treće mjesto na takmičenju “Moja domovina Bosna i Hercegovina” koje je organiziralo Federalno ministarstvo obrazovanja i nauke sa SABNOR-om.



Veza s dijasporom je iznad politike

Delegacija općine Bužim predvođena načelnikom Aganom Bunićem protekle sedmice posjetila je nekoliko gradova u Sloveniji i Austriji s ciljem dodatnog učvršćivanja veza bosanskohercegovačke dijaspore i njene matice Bosne i Hercegovine. Delagaciju koja je posjetila dvije zemlje Europske Unije, pored načelnika Bunića, činili su i predsjedavajući općinskog vijeća Abid Mulalić, dopredsjedavajući Suvad Veladžić i savjetnik općinskog načelnika. Na poziv gradonačelnika Vrhničke Stojana Jakina, Bunić je sa saradnicima razgovarao o mogućnostima uspostave saradnje s ovim slovenskim gradom.

„Treba imati na umu da je Slovenija članica Europske Unije, i da njihova znanja itekako mogu koristiti u projektima koje i sami radimo. Saradnju u oblasti sporta koja je na visokom nivu ćemo proširiti i na druge poslove. Prije svega mislimo na poslove jačanja i javnog komunalnog poduzeća i oblasti upravljanja otpadom u čemu kolega ima ogromno iskustvo, obzirom da je isti upravljao javnim kumunalnim poduzećem skoro trideset godina. Međusobne odnose ćemo također proširiti i na poslove apliciranja određeni projekata prema fondovima Evropske unije“, izjavio je načelnik općine Bužim Agan Bunić po okončanju sastanka sa gradonačelnikom Stojanom Jakinom.

Kao znak pažnje načelnik Bunić slovenskom je kolegi uručio prigodne poklone općine Bužim.

Bunić je sa saradnicima u Sloveniji prisustvovao prijateljskoj utakmici Nogometnog kluba Vitez i slovenskog kluba Vrhniko. Za Vitez je ovo bila uzvratna posjeta nakon što su prijatelji iz Slovenije već ranije boravili u Bužimu. Predsjednik kluba Rifet Šahinović istakao je kako će saradnja s ovim slovenskim klubom biti nastavljena i u budućnosti uz nadu da će posjete, zbog blizine dvije zemlje, biti realizirane i više puta godišnje.





Briga o BH. dijaspori

Da ciljevi načelnika Bunića nisu samo politički pokazuje i briga o bužimskim žiteljima izvan naše općine. Na poziv Udruženja Bošnjaka Graza načelnik je prisustvovao IV Festu Bošnjaka koji je okupio Bošnjake u ovom austrijskom gradu u kojem živi i radi nekoliko stotina porodica iz naše općine. Manifestaciji je pored načelnika Bunića prisustvovalo i nekoliko načelnika drugih gradova iz Unsko-sanskog kantona kao i predstavnici i iz vrha političkog života Bosne i Hercegovine i R. Austrije. Prisutnim su se obratili predstavnici austrijskih vlasti koji su pozdravili način organiziranja bošnjačkih zajednica u Austriji. U drugom dijelu programa, prisutnim se obratio i načelnik općine Bužim Agan Bunić.



„Ovo mogu ovdje u Republici Austriji raditi samo oni koje lokalne i državne vlasti R. Austrije uvažavaju i cijene i mogu raditi samo oni koji previše vole svoju domovinu, jer malo koja organizacija može uraditi u R. Austriji ili u nekoj drugoj državi gdje Bošnjaci žive i rade zbog toga iskrene čestitke za organizatora još jednom. Moram napomenuti da je prošle godine treći Fest Bošnjaka obilježen pred sami popis stanovništva našoj Bosni i Hercegovini, tada smo govorili o značaju popisa i cijenimo da je taj posao uspješno završen prema preliminarnim rezultatima koje smo dobili, koji će tek biti objavljeni i u tom dijelu posebnu ulogu i značaj kod popisa stanovništva je uzela naša dijaspora.

Ovogodišnji Fest Bošnjaka obilježavamo u svijetlu elementarnih nepogoda koje su zadesile skoro 1/3 stanovništva i teritorije Bosne i Hercegovine. Znam da je veliki posao odradila naša dijaspora i od prvog dana se odazvala da pomogne onima ljudima koji su unesrećeni, u ime Općine u ime lokalnih organa vlasti zahvaljujem se na podršci koju ste dali jer vi ovdje teškom mukom zarađujete da bi pomogli svojim sugrađanima u Bosni i Hercegovini. vala također, državnim organima vlasti u R. Austrije, te lokalnim organima vlasti u Grazu koji su također učestvovali u obezbijedivanju i pomoći za poplavljenja područja u našoj domovini.



Dakle, sve one velike stvari, svi ovi veliki poslovi ali nažalost mi Bošnjaci najviše smo jedinstveni i najviše dajemo za domovinu i za bilo šta drugo onda kada nas zadesi neka nepogoda, kada smo u teškoj situaciji kao što je bilo prije dvadesetak godina. Znamo koji je značaj bio naše dijaspore u prošlosti, i danas se odaziva kad su teška vremena u pitanju, ali svaka pomoć, svako jedinstvo nas Bošnjaka je dobrodošlo. - zaključio je na kraju načelnik općine Bužim Agan Bunić.

Na manifestaciji koja je imala za cilj da pokaže dio kulture i tradicije Bošnjaka, učešće su uzela i dva kulturno-umjetnička društva iz Bužima, KUD „Sevdah“ i KUD „Čava“.

Na poziv džemata Bošnjak Graz manifestaciji su prisustvovali i predstavnici Humanitarne organizacije „SADAKA“ iz Bužima s ciljem uspostavljanja boljih odnosa na realizaciji projekata pružanja pomoći socijalno ugroženom stanovništvu kako u Bužimu, tako i na teritoriji Bosne i Hercegovine.

Načelnik Bunić po okončanju posjete Sloveniji i Austriji istakao je kako je povezivanje dijaspore i lokalne zajednice jedan od prioriteta njegovog mandata te da dugoročno ovo mora biti prioritet svih koji obnašaju funkcije izvršne vlasti.





Načelnik Bunić posjetio najmlađu javnu ustanovu u Bužimu

Općinski načelnik sa svojim saradnicima posjetio je JU „Centar za kulturu sport i informisanje“ Bužim, a sve kako bi se upoznao sa ciljevima i planovima rada najmlađe javne ustanove. Na sastanku sa direktorom JU „Centar za kulturu sport i informisanje“ Bužim Mersudinom Nanićem, načelnik je istakao kako je zadovoljan s aktivnostima koje provodi ova ustanova, upoznat je da Uprava ustanove za kratko vrijeme uspjela usvojiti sve potrebne akte koji su neophodni za funkcioniranje, te da je proveden postupak prijema administrativnog radnika koji je otpočeo s radom. Općina Bužim će pružiti svu potrebnu podršku kako bi ova javna ustanova mogla raditi u punom kapacitetu. Izrazito je očekivanje da će rukovodstvo kvalitetno voditi i upravljati novoizgrađenim Domom kulture te ponovno pokrenuti rad radio stanice na području općine.

Direktor Nanić kazao je kako mu je *izuzetna čast i zadovoljstvo što je primio vodećeg čovjeka općine u prvu zvaničnu posjetu, te izrazio spremnost da ustanova na čijem je čelu doprinese kvalitetnijem organizovanju i ozbiljnijem pristupu i radu u oblasti kulture i sporta, i drugim oblastima koje će svojim radom pokriti osnovanom ustanovom.* „Također je upoznao načelnika Bunića da je prije

nekoliko dana nabavljena kancelarijska oprema za ustanovu zahvaljujući porodici Čaušević, iz Graza, prijateljima iz dijaspore koji su na ovaj način željeli dati svoj doprinos u pokretanju i osnivanju nove ustanove u Bužimu. Naši prijatelji iz Graza već duže vremena pomažu narodu na području USK-a, te im se mi ovim putem iskreno zahvaljujemo, i da dalje skupa surađujemo za dobrobit naše zajednice, kazao je Nanić tokom prijema zvanične posjete.





Posjeta Načelnika Ambasadi Saudijske Arabije u BiH

Općinski načelnik Agan Bunić posjetio Eida bin Mohammeda Al-Thaqafija ambasadora Kraljevine Saudijske Arabije u BiH. Prilikom navedene posjete načelnik je izrazio zahvalnost za sve što je Kraljevina Saudijska Arabija dosad uradila na području općine Bužim, prije svega na izgrađeni objekat srednje škole u Bužimu, te niz drugih manjih projekata, kao i želju u narednim projektima od značaja za općinu Bužim, te budućoj saradnji između Općine i Kraljevina Saudijska Arabije, a putem Ambasade u Sarajevu.



Općina Bužim prvi put sufinansira prijevoz učenika

U kabinetu općinskog načelnika, u Bužimu potpisan je ugovor o sufinansiranju prijevoza učenika Mješovite srednje škole „Bužim“. Potpisivanju ugovora su prisustvovali načelnik Agan Bunić, direktor Mješovite srednje škole „Bužim“, Zlatan Topić i autoprijevoznici sa područja općine Bužim. Sredstva su planirana iz budžeta općine Bužim za 2014. godinu, a mjesečne karte će biti sufinansirane za ukupno 51 učenika iz udaljenih i ruralnih područja, kojima je to najpotrebnije i čije spiskove je dostavio Centar za socijalni rad Bužim.

„Izvršavamo još jedno od datih obećanja građanima, a radi se o sufinansiranju prijevoza učenika u Mješovite srednje škole „Bužim“. Danas smo potpisali ugovore sa autoprijevoznicima o sufinansiranju prijevoza 51 učenika. U narednom periodu očekujemo da ćemo još više sredstava moći izdvajati za ove oblasti“ kazao je načelnik Bunić nakon potpisivanja ugovora.





Predstavnici „Limnosa“ iz Ljubljane u posjeti općini Bužim

Općinu Bužim, u pratnji predstavnika Ministarstva građenje, prostornog uređenja i zaštite okoline USK-a i predstavnika firme „Ceteor“ iz Sarajevu, posjetili su predstavnici slovenske kompanije „Limnos“ iz Ljubljane, u sastavu prof.dr. Danijel Vrhovšek i Anja Potokar. Goste je u kabinetu primio Općinski načelnik Agan Bunić, kojom prilikom je razgovarano o nekoliko projekata važnih za općinu Bužim, te mogućoj saradnji u obostranom interesu.

Naime, radi se o tome da je navedena firma zainteresirana da izgradi projektno-tehničku dokumentaciju za neke od projekata iz oblasti zaštite okoliša. Općina Bužim je predložila da kompanija „Limnos“ predloži moguća rješenja za sve učestalije probleme klizišta na području Bužima ili da se finansira izrada projektnih rješenja za zaštitu izvorišta na području općine Bužim, odnosno izvorišta „Musići“ u MZ Lubarda, „Pivnice“ u MZ Konjodor ili „Ildže“ u MZ Čava.



Direktor Una Consulting u posjeti općini Bužim

U kabinetu općinskog načelnika Agana Bunića održan je radni sastanak sa predstavnicima konsultantske kuće „Una Consulting iz Bihaća na čelu sa direktorom Sandijem Zulićem, na kojem je bilo govora oko izgradnje Prve faze Projekta kanalizacione mreže u naselju Stari grad, gdje je u toku izvođenje radova. Sredstva za realizaciju ove faze obezbijedena su od strane Švicarske agencije za obnovu i razvoj SDC u iznosu od 40.000,00 KM, a preostali isti iznos osigurala je općina Bužim iz budžeta.

Na sastanku su također dogovorene naredne aktivnosti na realizaciji druge faze koja podrazumijeva produženje mreže i izgradnju biljnog uređaja za prečišćavanje otpadnih voda, a koji će se također finansirati putem navedene agencije i općine Bužim. Obzirom da navedeni projekti čine jedan od strateških projekata za općinu Bužim dogovorena je dugoročna saradnja na unaprijeđenju i zaštiti životne sredine koja će u mnogo čemu doprinijeti razvoju Općine a njenim građanima učiniti život ugodniji.





Predstavnici Tika-e u posjeti općini Bužim

Načelnik općine Bužim Agan Bunić u svome kabinetu ugostio direktora za BiH Turske razvojne agencije Tika-e dr. Zulkuf Oruč. Na sastanku je bilo govora o mogućoj podršci ove agencije za projekte na području općine Bužim. Direktori agencije je posebno izrazio interesovanje koji znače zapošljavanje na području općine Bužim te se u tom pravcu definisana dva moguća projekta koja će biti aplicirana prema navedenim agenciji.

Prije svega radi se o projektu vodosnadbijevanja MZ Konjodor odnosno opremanja pumpne stanice u ukupnom iznosu od 180.000,00 KM koji bi značio stvaranje boljih uslova za razvoj proizvodnje malina na području ove Mjesne zajednice te konačnog vodosnadbijevanja preko 500 domaćinstava ove mjesne zajednice.

Drugi važan projekat se također odnosi na proizvodnju i preradu malina, a predstavlja kupovinu neophodnih mašina za preradu maline u prirodne proizvode, čime bi se omogućili veći prihodi od ovog poljoprivrednog proizvoda. Navedena dva projekta će u narednom periodu biti aplicirana prema centralnom uredu Tike u An-kari, te se konačna odluka očekuje u narednih nekoliko mjeseci.

„Ovo su posebno značajni projekti za općinu i njene građane, a posebno kapitalni projekat vodosnadbijevanja MZ Konjodor i dodatno zapošljavanje nezaposlenih. Koristimo svaku priliku da istaknemo važnost projekta vodosnadbijevanja i da pokušamo zatvoriti finansijsku konstrukciju ovog projekta i konačno riješi ovaj dugogodišnji problem pomenute mjesne zajednice. Ubijeđeni smo da će ovi projekti biti pozitivno ocjenjeni od strane Tike te se u to ime općine Bužim i njenih građana zahvaljujem direktoru na službenoj i radnoj posjeti, istakao je načelnik Bunić.





Usvojen budžet općine Bužim za 2014. godinu

Vijećnici općinskog vijeća Bužim, na 13. redovnoj sjednici Vijeća, usvojili su budžet općine Bužim za 2014. godinu, kojim je planirano da budžet iznosi 5. 089.080,00 KM. Pored budžeta općine Bužim na dnevnom redu našlo se još šest tačaka, i to razmatranje i usvajanje prijedloga odluke o budžetu općine Bužim za 2014. godinu, razmatranje i usvajanje prijedloga odluke o izvršavanju budžeta općine Bužim za 2014. godinu, te odluka o utvrđivanju vrijednosti boda za komunalnu naknadu za 2014. godinu, odluka o utvrđivanju jedinstvenog cjenovnika za obračun troškova vatrogasnih usluga i intervencija Vatrogasne jedinice općine Bužim za 2014. godinu, kao i informacija u vezi provedenih dosadašnjih aktivnosti na realizaciji projekta Sportske dvorane u Bužimu i Plan utroška namjenskih sredstava ostvarenih od naknada za korištenje državnih šuma ostvarenih iz 2013. godine.

Posebnu pažnju vijećnika imale su druga i treća tačka, odnosno odluka o budžetu općine Bužim za 2014. godinu i odluka o izvršenja budžeta općine Bužim za 2014. godinu koje su usvojene sa 11 glasova ZA i 6 suzdržanih. Pored trenutne većine u općinskom vijeću općine Bužim koju čine deset vijećnika SDA, budžet je podržan i od strane vijećnice ispred Saveza za bolju budućnost. „Budžet općine Bužim je izazov za načelnika i službe, uradićemo sve da ga izvršimo u cijelosti, možda je pomalo i ambiciozan, ali predstavlja pravni i budžetski

okvir da radimo. Ovim budžetom nastavljamo investicije koje smo započeli i najveći dio novih investicija. Većina grantova je ostala na prošlogodišnjem nivou, povećali smo sredstva za stipendije, kulturu, socijalna davanja, nezaposlene porodilje. Smanjena su sredstva za plaće i naknade zaposlenih u odnosu na plan iz 2013. godine, smanjena su i sredstva za rad političkih partija. Nastavljamo sa izgradnjom vodovoda Pivnice, Doma kulture u Bužimu, lokalne putne mreže i niz drugih manjih projekata. Tražićemo sredstva za naše projekte i na višim nivoima, ovih dana smo potpisali ugovora za oko 300.000 KM sa nivoa Federacije. Puno je posla za sviju, od ovog budžeta će imati koristi svaka mjesna zajednica, te u to ime tražim podršku za ovaj budžet bez obzira na poziciju i opoziciju“ kazao je između ostalog načelnik Bunić kod rasprave o budžetu.

Valja spomenuti i to da se na dnevnom redu našla i informacija provedenim dosadašnjim aktivnostima na realizaciji projekta Sportske dvorane u Bužimu.

„Moramo doći do realnog rješenja i projekta, jer sve i da nam neko napravi ovu dvoranu mi je ne bismo mogli održavati. Općina Bužim je napravila takav projekat, ali mi se čini da ti ljudi tada nisu imali osjećaja za realnost i naše potrebe, stoga treba hitno pristupiti obezbjeđivanju nove projektno-tehničke dokumentacije i projekta koji bi bio realniji i finansijski izvodiv, i u konačnici održiv“ kazao je na kraju načelnik Bunić.



Vijeće saglasno za početak izgradnje sportske dvorane

Općinsko vijeća donijelo je niz važnih odluka. Posebnu pažnju na sjednici općinskog vijeća je izazvala rasprava o početku provođenja procedure izbora izvođača za prve radove na dugo očekivanom projektu Sportske dvorane u Bužimu.

Navedenu odluku, na prijedlog općinskog načelnika, općinsko vijeće je jednoglasno podržalo. Odlukom je definisana suglasnost na ugovaranje radova na I fazi investicije u iznosu sredstava do 400.000 KM, zašto je već obezbijeđeno oko 120.000 KM.

Pored navedene odluke usvojena je i Odluka o prodaji stanova u vlasništvu Općine (naselja S 10 i S3), a sredstva od prodaje bi namjenski služila za izgradnju sportske dvorane. Usvojen je i Izvještaj o izvršenju budžeta općine za prvih šest mjeseci 2014. godine. U nastavku sjednice također su utvrđeni nacrti Odluke o javnom parkingu na području općine Bužim i Odluka o upravljanju i održavanju lokalnih vodovoda i bunara na području općine Bužim.





Milion maraka za poljoprivredu u općini Bužim

Općinu Bužim posjetili su prof. dr. Halil Omanović, direktor Jedinice za koordinaciju IFAD-ovih projekata u Bosni i Hercegovini pri Federalnom ministarstvu poljoprivrede, vodoprivrede i šumarstva i Senad Šepić zastupnik u Predstavničkom domu Parlamentarne skupštine Bosne i Hercegovine. Goste su primili i sa njima razgovarali načelnik Agan Bunić, predsjedavajući općinskog vijeća Abid Mulalić, federalni zastupnik Kasim Mulalić, direktor PIO/MIO Bihać Samir Veladžić.

Teme razgovora su bile aktivnosti Međunarodnog fonda za ruralni razvoj (IFAD-a) u Bosni i Hercegovini o dosadašnjim projektnim aktivnostima koje su podržane na području naše Općine. Također, razgovaralo se i o problematici u implementaciji projekata, te o konkretnim aktivnostima i koracima IFAD-a i općine koje je potrebno poduzeti u narednom periodu kako bi se implementirali određeni projekti kroz narednih nekoliko godina u ukupnom iznosu do milion maraka za općinu Bužim. IFAD će podržavati projekte koji su bitni kako za općinu Bužim, tako i za sve njene građane u onolikoj mjeri koliko općina Bužim bude spremna dočekala projekte sa projektno-tehničkom dokumentacijom.

“Cilj ovog projekta je poboljšanje ekonomskog statusa i osiguravanje mogućnost za samozapošljavanje mladih ljudi i žena, posebno u sektoru poljoprivrede, i to formiranja poljoprivrednih zadruga, proizvodnje i prerade malina, mlijeka, kestena, plasteničke proizvodnje, izgradnju

gradske tržnice gdje će stanovništvo prodavati ono što proizvede. Cilj je da ljudi žive od svog rada, da razvijamo poljoprivredu i sela, da proizvodimo hranu“ kazao je između ostalog direktor Omanović.

„Zadovoljstvo nam je, što smo ugostili delegacija IFAD-a i našeg zastupnika u Predstavničkom domu Parlamentarne skupštine Bosne i Hercegovine Senada Šepića kako bi se uvjerali da je naša općina spremna za ulaganje i koja zna šta hoće i kakvu budućnost želi svojim sugrađanima. U ranijem periodu kroz ovaj program smo realizirali oko 2 miliona maraka, čime smo uspješno realizirali mnoge projekte. Nadamo se da ćemo kroz implementaciju programa IFAD VI riješiti dosta problema koji se tiču poljoprivredne i razvoja infrastrukture, jer uz naša sredstva i ova koja su predviđena za Bužim možemo puno toga realizirati“, kazao je načelnik općine Bužim Agan Bunić.





Zajednički projekt Američke i Švedske vlade

Projekt unapređenja lokalnog razvoja (GOLD) ozvaničit će početak zajedničke saradnje u oblasti lokalnog ekonomskog razvoja sa pet partnerskih općina koje gravitiraju Bihaću. Tim povodom Thomas Rojas, direktor ekonomskog odjela USAID-a u BiH, i načelnici općina Bosanska Krupa, Bužima, Cazina, Velike Kladuše i Sanskog Mosta u prisustvu načelnika Bihaća potpisali su u Bihaću Memorandum o razumijevanju.

Na potpisivanju istaknuto je da će USAID i Sida putem GOLD projekta raditi s partnerima kako bi se otvorilo 100 radnih mjesta u tekstilnoj industriji. Kako je istakao Mark McCord, direktor USAID / Sida Gold Projekta, kako bi pružio podršku lokalnoj zajednici u ostvarivanju ekonomskog rasta i razvojnih ciljeva, GOLD projekat će pomoći efikasnijem korištenju ekonomskih resursa na lokalnom nivou i promovisati nova ulaganja kroz javno privatna partnerstva u ciljanim sektorima, angažovati ključne partnere da bi se unaprijedio kvalitet usluga u javnom sektoru i realizovale reforme za poticajno poslovno okruženje.

“ *Projekat će također podržavati poduzetništvo i raditi sa privatnim i javnim sektorom na realizaciji programa stručne obuke kako bi se mladi osposobili sa odgovarajućim vještinama potrebnim domaćoj ekonomiji* “ - kazao je McCord.

Glavni cilj USAID/Sida Projekta unapređenja lokalnog razvoja (GOLD) je snažna podrška lokalnim zajednicama na ekonomskom razvoju, privlačenju investicija i otvaranju novih radnih mjesta.

USAID/Sida GOLD projekt razvija model održivog lokalnog ekonomskog razvoja pri čemu će partnerske općine kreirati model ekonomskog razvoja, koji će biti primjenjiv u cijeloj zemlji kao temelj za održiv ekonomski rast.

U ime Općine Bužim, memorandum je potpisao općinski načelnik Agan Bunić.





Nezakonita sječa šume

U sali općine Bužim održan je sastanak povodom problema bespravne sječe šuma, koji je duži niz godina zastupljen na području općine. Sastanku su prisustvovali predstavnik Kantonalne uprave za šumarstvo Stanko Mirčetić, Fikret Šahinovi - komandir Policijske stanice Bužim, Mešić Esad i Amir Dizdarević ispred ŠPD USK-a, Fuad Šahinović ispred granične policije BiH, Husnija Halilagić inspektor Uprave za inspeksijske poslove USK-a. „Ovdje smo da pokušamo suzbiti ovaj problem, drago mi je da je načelnik Bunić inicirao ovaj sastanak i nadao sam se ovom sastanku zbog velikog postotka krivičnih prijava koja imamo na ovom području, i poduzet ćemo konkretne korake koji će pomoći u rješavanju ovog problema“, rekao je predstavnik Kantonalne uprave za šumarstvo Stanko Mirčetić.

Na radnom sastanku usvojeni su slijedeći zaključci:

1. Općina Bužim pruža punu podršku nadležnim institucijama u borbi protiv bespravne sječe šuma, s posebnim osvrtom na zaštitu šuma hrasta kitnjaka i kestena.
2. Tražimo od ŠPD USK-a da za potrebe lokalnog stanovništva obezbijedi dovoljne količine ogrijevnog drveta.
3. Općina Bužim traži da se u narednom periodu više posveti pošumljavanju na području općine Bužim, te će u tom pravcu dati sve neophodne saglasnosti na planove i programe ŠPD-a i Uprave za šumarstvo USK-a.
4. Tražimo da se angažira veći broj čuvara šuma za

područje općine Bužim te da se po potrebi angažiraju dodatne policijske snage, odnosno jedinica za podršku MUP-a USK-a.

5. Općina Bužim traži da se istoj dostave službeni pokazatelji o legalnoj i nelegalnoj sječi šuma, broju počinjenih prekršaja i krivičnih djela po prijavama i ostalim pokazateljima o bespravnoj sječi na području općine Bužim. Podržavamo inicijativu izmjene i dopune zakona o šumama USK-a, a sve u cilju bolje zaštite ovog prirodnog bogatstva.

„Ovo je jedan širi problem oko kojeg treba da se svi pozabavimo da bi ga što prije riješili. Želim da svi uzmemo svoje učešće i spriječimo nelegalnu sječu šuma. Mi imamo sve više poziva, pogotovo sa područja MZ Čava preko koje se najviše eksploatiše šumsko bogatstvo i građani svakodnevno vide da se odvoze velike količine, a oni sami ne mogu sebi obezbijediti iako im je ista šuma nekoliko stotina metara od njih. Najveći dio ove bespravne sječe nema veze sa socijalnim slučajevima kojima većina govori, nego se ovdje sve više radi o organiziranom kriminalu i unosnom biznisu od kojeg pojedinci imaju najviše koristi. Svjesni smo da se ovaj problem ne može riješiti preko noći, ali očekujemo da se postepeno ovaj problem suzbija i polako rješava. Općina će pružiti podršku svim nadležnim institucijama da se ovaj problem suzbije i što prije riješi“, kazao je načelnik Bunić.



Uređenje zelenih površina

U Bužimu je obilježen Svjetski dan šuma prigodnim zasađivanjem dvadeset i pet komada ukrasnog bilja na zelenoj površini kod Osnovne škole „Bužim“.

Navedenu akciju su proveli ŠPD USK šume-Šumarija Cazin i općina Bužim, uz tehničku podršku JKP „Komb“ Bužim. Šumarija Cazin je donirala ukrasno bilje za potrebe ukrašavanja zelenih površina na području općine Bužim, i obećala buduću podršku za ovakve i slične projekte.

„U narednom periodu više pažnje moramo posvetiti zelenim površinama na području urbanog središta Općine, ovo je početak akcije koja će se provoditi svake godine. Vjerujem da ćemo zajedno sa ŠPD USK šume zajedno provoditi još akcija, prije svega mislim na zajedničko uređenje parka „Borići“, i da ćemo jačati JKP kako bi bi i ono više pažnje u budućnosti posvećivalo održavanju zelenih površina i javne čistoće u centru Općine.

Hvala Šumariji Cazin na donaciji koja je danas realizirana kod naše osnovne škole“ -istakao je načelnik Bunić.



Održano stručno predavanje za poljoprivredne proizvođače

U općini Bužim održano stručno predavanje za sve zainteresirane poljoprivredne proizvođače i oni koji žele da se bave poljoprivrednom proizvodnjom. Veliki broj građana koji se odazvao na ovaj poziv pokazao je da u Bužimu ima onih koji žele da rade i da privređuju svojim radom, trudom i zalaganjem.

„Ovo predavanje je najbolji pokazatelj da su ovakva predavanja, i seminari opravdani i da imamo obavezu kao Općina da i u buduću koordiniramo između onih koji se bave specijaliziranom proizvodnjom i Vas koji ste u krajnjoj liniji proizvođači, i ovo će nam biti pokazatelj da moramo još više raditi na tome da bude još ovakvih predavanja i seminara, jer ukoliko se od Vas ovoliko bar pet ili više opredijeli za proizvodnju mi smo uspjeli. Općina Bužim zajedno sa Službom za poljoprivredu Vam stoji na raspolaganju da Vam olakša i pomogne u skladu sa svojim mogućnostima. Za sve potrebne informacije općina Vam stoji na raspolaganju“, između ostalog istakao je načelnik Bunić.

Agro Dar specijalizovana poljoprivredna zadruga koja je izrasla iz poznate firme Poljo-sementi Cazin, u prošloj godini je angažirala 250 proizvođača krastavaca-kornišona od kojih je izvezeno 700 tona. Firma sa kojom Agro Dar ima potpisan Ugovor o otkupu ima potražnju za 5000 tona. Ono što posebno valja istaći da je ova zadruga svojim proizvođačima garantuje otkup i isplatu na vrijeme. Prošle godine su po prvi put vršili i otkup kestena preko 300 tona, preko čega je na naš kanton došlo preko 1.500.000,00 KM, što se osjetilo i na području općine Bužim.

Izuzetno pogodan kraj za uzgoj maline, krastavaca, kestena, ali i uzgoj drugih poljoprivrednih proizvoda. Zemlja je kvalitetna, a sredina ekološki čista. S toga treba iskoristiti blagodati kojima je pogodno ovo naše područje.



Sajam poljoprivrednih proizvoda i zdrave hrane

U Bužimu je otvoren Sajam privrede, poljoprivrede, zdrave hrane i turizma Bužim 2014, koji organizira Udruženje žena „Izvor“ iz Bužima u partnerstvu sa JU „Centar za kulturu, sport i informisanje“ Bužim, a u sklopu obilježavanja Svjetskog dana žene sa sela i Svjetskog dana hrane. Predsjednica Skupštine udruženja žena „Izvor“ Hasiba Mamić izrazila je dobrodošlicu gostima i zahvalila na odazivu svim ovogodišnjim izlagačima. Jasmira Mehić, predsjednica Udruženja „Izvor“, predstavnik Ministarstva poljoprivrede, vodoprivrede i šumarstva USK-a Rasima Bobić, u svojim izlaganjima su istakle da ih posebno čini sretnim što sajam svake godine sve više jača i ima veću podršku.

Žene u ruralnim područjima pridonose blagostanju svojih obitelji i razvoju privrede, poljoprivrede i turizma na selima. Cilj obilježavanja ovog dana je dugoročno osnažiti poziciju žena iz ruralnih područja, te ih informirati i ohrabriti da aktivnije učestvuju u društvu i u većoj mjeri preuzmu ulogu vodstva u svojim zajednicama kroz različite aktivnosti. Ostali ciljevi odnose se na promociju posebnosti seoskih žena, podizanje razine osviještenosti vlada i javnosti o njihovoj važnoj, premda još nedovoljno priznatoj ulozi u društvu i sl. Međunarodni dan žena sa sela obilježava se kako bi se istaknula njihova važna, ali još uvijek nepriznata uloga u doprinosu gos-

podarstvu i razvoju društvene zajednice. Obilježavanjem tog dana imamo priliku pokazati da se naša seoska žena danas suočava s teškom ekonomskom situacijom, povećanim troškovima života i stoga je prisiljena raditi prekovremeno, biti potplaćena ili nezaposlena, suočena sa diskriminacijom na radnom mjestu i u obitelji.

Na tragu te ideje svake godine Udruženja žena „Izvor“ iz Bužima, tradicionalno organizira ovaj sajam kako bi osnažila poziciju seoske žene i njene uloge u razvoju privrede, poljoprivrede, proizvodnji zdrave hrane i jačanju turizma i turističke ponude.

Ovaj sajam se organizira iz potrebe očuvanja i promocije kulturnih i tradicionalnih vrijednosti zavičaja, ruralnog turizma i poduzetništva. Generalni pokrovitelj sajma je općina Bužim, općinski načelnik Agan Bunić.





Deset porodica u općini Bužim dobilo plastenik

U sali Općine Bužim potpisan je Ugovor o dodjeli deset plastenika članicama udruženja žena „Izvor“ iz Bužima u cilju stimulisanja poljoprivredne proizvodnje u Bužimu. Predsjednica Jasmira Mehić se zahvalila i pozdravila prisutne, te istakla da je ovo deset novih radnih mjesta. Lokalna akciona grupa Una-Sana na području općine Bužim implementirala je projekt „Women in Rural Development“-Žene u ruralnom razvoju, koji finansira ambasada Sjedinjenih američkih država u Sarajevu, a kojim predviđena nabavka deset plastenika površine 100 m² sa sistemom za navodnjavanje.

Prisutnima se u svoje ime i u ime načelnika općine Bužim Agana Bunića, obratio savjetnik općinskog načelnika Mehmed Čenanović. U svom obraćanju je između ostalog kazao je:

„Čestitam svima Vama na realizaciji ovog vrlo značajnog projekta, i iskreno se nadam da se nećemo na ovom zadržati te da ćemo u tom pravcu i nastaviti. Nadam se da ćete naći tržište za vaše proizvode i da se nećete zadržati na tom jednom plasteniku. Ovo je jedan mali korak ka realizaciji ruralnog razvoja kao jedne od strateških odrednica u strategiji razvoja općine Bužim.“

Cilj ovog projekta je bio da se zaposle isključivo žene te se udruženje žena „Izvor“ pokazao kao izvrstan partner

u realizaciji istog. Ovo je jedan u nizu od projekata koje LAG-a provodi na području Unsko-sanskog kantona te se u narednom periodu planiraju realizirati i drugi.

„Prije svega selamim i pozdravljam vrijedne članice udruženja žena „Izvor“, kojima iskreno čestitam. Ovo je jedan svijetli primjer saradnje sa Općinom i Općinskim vijećem. Nadam se da nećete imati problema u plasmanu svojih proizvoda koje ćete proizvoditi. Kao što ste i do sada imali našu podršku ona neće biti upitna ni u narednom periodu. Kao što znate grant za poticaj poljoprivrede ove godine smo povećali i trudit ćemo se da on bude i veći“,- kazao je predsjedavajući općinskog vijeća Abid Mulalić.



NOVA ULAGANJA U INFRASTRUKTURNE PROJEKTE

Općina Bužim zajedno sa višim nivoima vlasti i sredstvima građana je samo u putnu mrežu u 2014. godini uložila oko 1.200.000,00 konvertibilnih maraka.

Politika vlasti u Općini Bužim je da se najveći dio sredstava iz budžeta izdvaja za kapitalna ulaganja. Prema riječima Agana Bunića, načelnika Općine, najveći dio budžeta i sredstava sa viših nivoa vlasti posvećuje se projektima vodosnabdijevanja, putne infrastrukture, javne rasvjete, izgradnje igrališta kod područni škola, renoviranje i adaptacija područnih škola u mjesnim zajednicama i mnogi drugi projekti koji su korisni za društvenu zajednicu.



Historijski projekat za općinu Bužim

U sali općine Bužim, općinski načelnik Agan Bunić sa saradnicima, ugostio je predstavnike firme Elektroprijenosa BiH, u sastavu direktora operativnih područja za Sarajevo Jakub Viteškić, te za Banja Luku Aleksandar Šukalo. Također, radnom sastanku su prisustvovali i predstavnici Ministarstva za građenje, prostorno uređenje i zaštitu okoliša Unsko-sanskog kantona. Cilj sastanka je bio informisanje lokalnih vlasti o statusu projekta izgradnje 110 kV stanice u Bužimu, tj. akutelnosti vezane za planove ove državne kompanije oko nastavka realizacije projekta, kao i pomoći u realizaciji od strane općine i kantona.

Predstavnici investitora upoznali su lokalne zvaničnike o svim do sada provedenim aktivnostima oko izgradnje i realizacije projekta, a posebno istakli da je u toku provođenje postupka izbora izvođača radova na izgradnji ovoga objekta, te bi se ugovor trebao potpisati na proljeće iduće godine. Posebno interesantan podatak je da procjenjena ukupna vrijednost investicije iznosi cca 3 miliona konvertibilnih maraka, a rokovi za implementaciji su 18 mjeseci od potpisivanja ugovora. Podsjetimo se, radi informacije za sve građane, da je ovaj projekat bio u poceduri prije 10 godina, te je zbog ukupne društveno-političke situacije investicija bila blokirana nekoliko godine. Predstavnici ministarstva su iznijeli da će učiniti sve što je u njihovoj nadležnosti da ubrzaju procedu-

ru izdavanja potrebnih saglasnosti za izgradnju. Načelnik Bunić je izrazio velikodušno zadovoljstvo što će napokon krenuti realizacija gorućeg problema za cijelu općinu, i da stoji na raspolaganju, te navodi da imovinsko-pravni sporova nema i da je ovo najveća investicija u ovom sektoru od osnivanja općine, te da će ona značiti kontinuirano i stabilno snabdijevanje električnom energijom općine Bužim, a dugoročno predstavlja i osnovu za razvoj općine.





Položen kamen temeljac za izgradnju Islamskog kulturnog centra

Položen kamen temeljac za izgradnju Islamskog kulturnog centra Islamske zajednice u Bužimu. U prisustvu velikog broja vjernika i građana općine Bužim kamen temeljac položili su izaslanik reisul-uleme IZ u BiH, Nusret ef. Abdibegović, predsjedavajući Predsjedništva BiH, Bakir Izetbegović, načelnik općine Bužim, Agan Bunić, i vlasnik bužimske firme “Kov-grad” d.o.o., Safet Kovačević. Prema riječima predsjednika Medžlisa Islamske zajednice Bužim Eniza Veladžić Centar je kruna 14 dosad novoizgrađenih džamija u Bužimu od 22 džemata, koliko ih ima na području tog medžlisa.

“Ono o čemu smo maštali danas postaje stvarnost. Ovo je kruna dosadašnjih infrastrukturnih objekata koje smo gradili na prostoru našeg medžlisa. Ovaj centar i navedene džamije izgrađene su vlastitim sredstvima, bez učešća inozemnih donatora”, izjavio je Eniz ef. Veladžić. Islamski kulturni centar imat će tri sprata i prizemlje, a u njemu će se, između ostalog, nalaziti sjedište Medžlisa IZ Bužim, restoran, kabinetske učionice, dvije hotelske sobe, konferencijska sala.

Agan Bunić, načelnik općine Bužim, izjavio je kako Bužim ponovo piše historiju. “Dvadesetdvije godine od formiranja Bužimske brigade Bužim ponovo piše historiju gdje polažemo kamen temeljac za Islamski centar. Islamska zajednica je najstarija institucija i vođeni tom idejom

krenuli smo u realizaciju i pokrenuli ovaj projekat” rekao je Bunić. Bakir Izetbegović u svom kratkom obraćanju rekao je kako je do sada u Bosni i Hercegovini izgrađeno preko 2000 džamija. “Uvijek je drago biti na mjestu gdje počinje izgradnja. “Od rata do danas u BiH je izgrađeno preko 2000 džamija. Mi smo narod mira i mi dolazimo od svjetla i težimo ka svjetlu”, poručio je Izetbegović okupljenim građanima. Izaslanik reisul-uleme Huseina ef. Kavazovića, mr. Nusret ef. Abdibegović rekao je kako ga posebno čini sretnim što ima priliku boraviti u Bužimu te izrazio svoje divljenje na još jednom projektu od značaja za Islamsku zajednicu Bosne i Hercegovine.





Prvi radovi na izgradnji Islamskog kulturnog centra

Zvanične aktivnosti na izgradnji Islamskog kulturnog centra u Bužimu otpočele su 15. augusta 2014. godine svečanim polaganjem kamena-temeljca. U prostorijama općine Bužim potpisan je ugovor za izgradnju prve faze vrijedan 382.964,00 KM. Ugovor su potpisali direktor firme Kov-Grad d.o.o Safet Kovačević i predsjednik Medžlisa Islamske zajednice Bužim Eniz ef. Veladžić.

“Drago nam je da smo danas nakon provedenih procedura tenderske dokumentacije za najpovoljnijeg izvođača došli do zaključka da je najpovoljnija ponuda bužimska firma Kov-Grad. Ova je zasigurno jedna od najorganizovanijih i najvećih građevinskih firmi ne samo u Bužimu nego na kantonu pa i šire. Danas smo potpisali ugovor za prvu fazu novog objekta te proširenje postojeće zgrade Medžlisa. Vrijednost ugovora iznosi 323.000KM. Također smo potpisali i donatorski ugovor s firme Kov-Grad, odnosno s njenim direktorom Safetom Kovačevićem koji se odnosi na iskope i pripreme radove u vrijednosti od 59.000KM”, rekao je Veladžić prilikom potpisivanja ugovora. Imajući u vidu značaj poboljšanja vjerskog života Medžlisa Islamske zajednice Bužim odlučio se za izgradnju novog objekta te rekonstrukciju sadašnje zgrade medžlisa u čijim prostorijama bi trebao biti smješten dječiji vrtić. Dobar vjetar u leđa i odskočnu dasku za izgradnju ovog objekta dao je i Rijaset Islamske zajednice Bosne i Her-

cegovine, koji je organizirao sergiju u svim džematima na nivou Islamske zajednice u BiH i dijaspori.





Nastavljena izgradnja vodovodne mreže u MZ Konjodor

U trenutku preuzimanja mandata, prvo suočeni smo sa teškom ekonomskom krizom koja je zahvatila našu zemlju, a odrazila se i na našu Općinu. Nisu ni mnogi projekti bili spremni za realizaciju te je dosta vremena utrošeno na pripreme radnje koje građani nisu vidjeli, a koje su omogućile da danas potpisujemo ugovore o konkretnim radovima. Općina Bužim svakodnevno radi na realizaciji trenutno najznačajnijih projekata te u tom pravcu očekujemo puno razumijevanje građana.

Moramo vjerovati jedni drugima i pružati podršku u okviru svojih mogućnosti kako bih sve zacrtane projekte uspješno realizirali. Da se nema vremena za priču pokazao je općinski načelnik Agan Bunić, tako što je u Sarajevu potpisao ugovor o sufinansiranju I faze izgradnje vodovoda „Pivnice“ u MZ Konjodora u iznosu od 100.000 KM. Sredstva su općini Bužim dodijeljena nakon što je općina navedenim projektom aplicirala na Javni poziv Fonda, nakon čega je projekat vodosnabdijevanja pozitivno ocijenjen. Obezbjedivanjem ovih sredstava, uz ona koju su ranije obezbjeđena od strane viših organa vlasti i ona koja su planirana u budžetu općine Bužim za 2014. godinu, možemo reći da imamo dovoljno sredstva da potpisujemo ugovore na izgradnji potisnog cjevovoda, što nam je u ovoj fazi izgradnje najznačajnije.

Tako je i potpisan ugovor za potisni cjevovod „Pivnice“. Potpisali su Melhijad Velić u ime firme „VELIĆ KOP“ i načelnik općine Bužim Agan Bunić. Ukupna vrijednost ugovora iznosi: 112.757, 55 maraka. Potpisivanju ovog značajnog ugovora za našu općinu, a posebno građane MZ Konjodor prisustvovali su i Ramiz Kismetović vijećnik u općinskom vijeću Bužim, predsjednik MZ Konjodor Remzija Pajalić, predsjednik Građevinskog odbora Nisvet Jusić, predsjedavajući općinskog vijeća Bužim Abid Mulalić, kao i njegov zamjenik Suvad Veladžić.

„Potrebno je još puno sredstava da bi se ovaj projekat priveo kraju, već imamo obećanja za sufinansiranje i od strane drugih institucija i fondova. Pored potpisanog ugovora za izgradnju pumpne stanice ovih dana očekujemo potpisivanje i drugog ugovora za nastavak radova na ovom projektu. Zahvaljujem se Fondu za okoliš, direktoru i upravnom odboru, u ime općine Bužim i njenih građana, vjerujem da je ovo početak finansiranja ovog projekta od strane fonda i da će ovaj projekat biti podržan i kroz naredne javne pozive fonda i dodjelu sredstava.“ kazao je načelnik Agan Bunić prilikom potpisivanja ugovora.



Potpisan vrijedan ugovor u iznosu od 208.758,42 KM za vodovod „Pivnice“

Općina Bužim obezbijedila je iz budžeta i sa viših nivoa vlasti, do sada sva sredstva za izgradnju vodovoda „Pivnice“. U proteklom periodu uloženo više od 400.000,00 maraka u vodosnadbijevanje, uličnu rasvjetu izgradnju i asfaltiranje puteva, od čega su i mještani, kroz razne projekte učestvovali sa svojim sredstvima. Izgradnja vodovoda „Pivnice“ jedan je od najznačajnijih kapitalnih projekata koji se radi u posljednjih nekoliko godina u općini Bužim i svakako za sugrađane koji žive u mjesnoj zajednici Konjodor, jer će im vodovod puno značiti za domaćinstvo, ali i za proizvodnju malina kojom se bavi 80 % stanovništva. Za ovu fazu izgradnje vodovoda obezbijedena je većina finansijskih sredstava, nešto od Fonda zaštite okoliša FBIH, dio iz općinskog budžeta. Jedan dio sredstava će se obezbijediti putem mjesne zajednice Konjodor, te očekujemo da će i Kantonalno ministarstvo poljoprivrede u narednom periodu ispoštovati potpisani ugovor sa općinom Bužim i doznačiti sredstava u iznosu od 100.000,00 maraka. Dobivanjem građevinske dozvole od strane Ministarstva prostornog uređenja USK-a mogu da počnu radovi na izgradnji potisnog cjevovoda. Također, kao i prethodne godine nastavljamo i ove godine sa ulaganjem u infrastrukturne projekte, te uz podršku građana koji su prepoznali u općini Bužim

partnera na kojeg se mogu osloniti i to povjerenje koje sada imamo kod sugrađana naš je najveći uspjeh. Tako su načelnik općine Bužim, Agan Bunić i direktor firme Hidro Termo Centar d.o.o Sarajevo, Enver Sinanović potpisali ugovor o nabavci cijevnog materijala, fazon-skih komada i armatura za vodovod „Pivnice“, ukupne vrijednosti 208.758,42 maraka. Remzija Pajalić, predsjednik MZ Konjodor ističe da ovim ugovorom se nastavlja rješavati gorući problem stanovnika našeg naselja, koji su u ljetnim mjesecima bili primorani vodu dovoziti iz okolnih mjesta.





ULAGANJA U PUTNU MREŽU SE NASTAVLJAJU RAVNOMJERNO U SVIM MJESNIM ZAJEDNICAMA U novom ruhu ulica Bihacka i Ahmeta Šahinovića

U 2014. godini općina Bužim nastavlja sa dosadašnjim trendom rekonstrukcija i modernizacija ulica u svim mjesnima zajednicama, na području naše Općine. Naime, otpočeli su prvo radovi u mjesnoj zajednici Bužim, tačnije u ulici Bihackoj i Ahmeta Šahinovića. Projekt su zajednički finansirali Općina Bužim i jedan dio mještani pomenutih ulica. „Projekt u ulici Ahmeta Šahinovića je bitan iz razloga što pomenuta saobraćajnica čini sastavni dio vanjskog uređenja Doma kulture Bužim, čiji se radovi privode kraju. Asfaltiranjem ove ulice se ne rješava samo vizuelni i estetski problem, već i problem odvodnje oborinskih voda, što je u proteklom periodu znatno otežavalo saobraćaj u ovom urbanom središtu grada. S toga smatram da ćemo od ovog projekta imati višestruke koristi“, rekao je Bunić. Asfaltiranu ulicu Bihacku, u naselju Pilići su obilaskom ozvaničili načelnik općine Bužim Agan Bunić, predsjedavajući općinskog vijeća Abid Mulalić, kantonalni zastupnik Kasim Mulalić, predsjednik mjesne zajednice Bužim, Mersudin Nanić. „Riječ je o zaista važnom infrastrukturnom projektu, ulica koja vodi prema samom centru općine. Nadam se da ćemo i izgradnju ostalih puteva uspjeti realizirati, s tim da će za to trebati određeni vremens-

ki period iz razloga što i druge mjesne zajednice imaju nedovršene projekte. Stoga molimo za razumijevanje svih onih čiji projekti još uvijek nisu realizirani“, rekao je u svom obraćanju predsjednik mjesne zajednice Bužim.





Asfaltiran put u MZ Radoč

Nastavljena realizacija infrastrukturnih projekata i u prigradskim mjesnim zajednicama, kao rezultat brže i uspješne saradnje općine Bužim i građana. Tako su počeli radovi na asfaltiranju dionice puta u Mjesnoj zajednici Radoč. Dužina puta na kojem se izvode radovi je 320 metara, a vrijednost ovog projekta je 77.000,00 konvertibilnih maraka. Tim povodom načelnik općine Bužim Agan Bunić sa savjetnikom je obišao radove i razgovarao s mještanima o ovom infrastrukturnom projektu, koji je za njih vrlo važan. Mještani nisu krili zadovoljstvo sa asfaltiranjem i ostalim radovima, te najavljuju nove aktivnosti kojim žele poboljšati uvjete života i rada mještana ove mjesne zajednice, a prvenstveno izgradnju još jednog dijela puta Prokop-Radoč gdje na taj način će se stvoriti bolja svakodnevna komunikacija građana sa ostalim mjesnim zajednicama i svakako centrom općine.

„Kao i ranije što smo pokazali, svaki iskorak u poboljšanju životnih uvjeta u bilo kojoj mjesnoj zajednici predstavlja naš zajednički uspjeh i zaslužuje podršku. Naglasio je da će asfaltiranje te dionice puta u velikoj mjeri olakšati život i obavljanje svakodnevnih obaveza mještanima naselja Radoč, ali i doprinijeti boljem životu na tom prostoru i drago mi je da se i ovaj projekat uspješno okončao“ - riječi su načelnika Bunić.



Nastavak asfaltiranja puta Mrazovac-Radoč

Nije dugo trebalo da se asfaltira i ova dionica puta. Tako je nastavljeno sa izgradnjom lokalne putne infrastrukture i u mjesnoj zajednici Mrazovac i Radoč. Nakon pet godina ponovo su nastavljene radovi na izgradnji ovog dijela puta u dužini trase od 250 m.

Sredstva obezbijedena preko Federalnog ministarstva izbjeglih i raseljenih lica u iznosu od 50.000 maraka, jedan dio sredstava će biti utrošen za realizaciju ovog projekta, a drugi dio za realizaciju projekta Čava-Svetinja. Ova vijest posebno je obradovala mještane Mrazovca i Radoča što im se napokon ostvaruje san o izgradnji jedne moderne saobraćajnice u spajanju sa općinom Bužim.

„Naime, ovo je samo jedan u nizu podržanih projekata od strane Federalnog ministarstva raseljenih osoba i izbjeglica tokom ove godine. Moram kazati da smo prije nekoliko dana potpisali još jedan veoma značajan infrastrukturni projekat, za naseljeno mjesto Čava i Radoč.

Ovim putem općina Bužim, iskazuje duboku zahvalnost resornom ministru mr. Adilu Osmanoviću, na prepoznavanju važnosti i vrijednosti naših projekata prvenstveno zbog raseljenih osoba i izbjeglih na području naše općine. Općina Bužim će i dalje imati inicijativu u pogledu apliciranja određenih projekata prema ovom ministarstvu a koji su od značaja za našu cjelokupnu Zajednicu. Ova dionica je posebno značajna što se gradi pored džemata i loklane džamije Prokop, čime će se olakšati pristup navedenom objektu“ - kazao je tom prilikom načelnik općine Bužim Agan Bunić.



Obnovljena Područna škola „Radoč“

U Bužimu dogodio se jedan od veoma interesantnih i lijepih događaja o kojem se priča sa velikim pohvalama, jer može biti primjer i našem nevladinom sektoru, posebno omladini kako da veoma korisno iskoriste svoje slobodno vrijeme. U mjesnoj zajednici Radoč na području općine Bužim svečano otvoren obnovljeni objekat Područne osnovne škole “Radoč”. Četrdeset djevojaka turskog porijekla, u okviru organizacije “Milli Görüş” i njenog resora za humanitarne djelatnosti “HASENE”, doputovale iz Holandije u BiH. Preko ekspoziture u Južnoj Holandiji prikupili su sredstava za obnovu Područne osnovne škole “Radoč” u Bužimu. Volonterke, njih 40, među kojima ima: srednjoškolki, studentica raznih profila, zatim doktora, stomatologa, profesora, pedagog, uspjele su prikupiti sredstva za obnovu pomenute škole, a zatim su doputovale iz Holandije i same izvele radove farbanja i uljepšavanja kompletne škole.

I ne samo to, one su za sve učenike donijele školske torbe i potreban učenički pribor, te kompjutere za svaki razred, kao i niz drugih poklona. Sve volonterke su članice međunarodne humanitarne organizacije “HASENE”, koja pored mnogobrojnih humanitarnih djelatnosti u BiH stipendira oko 300 djece bez jednog ili oba roditelja, od čega i 20 iz Bužima, za koje su također donijele darove i upriličile druženje sa njima, a ručicama jetima u raznim bojama naslikana je duga na zidu škole.

Ova grupa je radila na uređenju i obnovi i drugih škol-

skih objekata u BiH, ali ovolikog obima po prvi put izvodi u Bužimu i to na najstarijem školskom objektu gdje je prošle godine i obilježeno 100 godina modernog obrazovanja na području općine Bužim. Uz sve ovo urađena je i rekonstrukcija krova koji je bio propao i prokišnjavao. Učenici i prosvjetni radnici upriličili su na kraju za goste i uzvanice kulturno-umjetnički program, a direktorica škole Raza Bakija, uručila je darove za goste u znak sjećanja na nesebičnu pomoć. Svi ovi poslovi su urađeni u rekordnom roku od svega sedam dana. Svečano otvaranje izvršile su predstavnice „Hasene“ Esra Yilmazer, načelnik općine Bužim, Agan Bunić i direktorica škole Raza Bakija.





Infrastrukturni projekti općine Bužim u MZ Zaradostovo i MZ Vrhovska

Općina Bužim nastavlja ravnomjieran razvoj svih mjesnih zajednica na području naše općine kako bi omogućila svim njenim građanima lakšu putnu komunikaciju prema samom centru, te olakšala svakodnevni život u rubnim dijelovima općine Bužim. Tako su radovi na projektu izgradnje prva faze rekonstrukcije i modernizacije puta Spahići- Mrkovine, Luke-Grbavice te puta Cinska dolina i puta Bezi-Bajrektarević Polje, uspješno završeni. Općinski načelnik Agan Bunić, predsjedavajući općinskog vijeća Abid Mulalić, kantonalni zastupnik Kasim Mulalić obišli su završne radove na ovim lokalitetima. Ukupna dužina na ova tri asfaltirana puta je oko 1700 m, koštao je cca 200. 000 maraka. Obezbeđena sredstva od GSM licence za put Bezi-Bajrektarević Polje u iznosu od 50.000 maraka čiji je implementator Direkcija cesta USK-a., a preostala tri puta u MZ Zaradostovo finansirala je općina Bužim zajedno sa građanima. *“Obećali smo javnu rasvjetu u ovim mjesnim zajednicama i to smo završili. Obećali smo ove puteve, evo i završili ih. Imamo još posla ovdje, moramo završiti put Lelića klanac-Burzići, Grbavice, Kiurića brdo, i ostale projekte u ovim i ostalim mjesnim zajednicama uz pomoć građana i rukovodstva mjesni zajednica”*-kazao je načelnik Bunić.





Asfaltirane ulice Muse Ćazima Ćatića i Armije BiH u MZ Bužim

Sami centar Bužima u proteklom periodu je nepravедno bio zapostavljen u smislu izgradnje infrastrukturnih projekata, bilo je puno priče a malo posla, ove ulice su trebale biti davno izgrađene. Ove godine radi se rekonstrukcija za još pet ulica u centru Općine i zbog toga smo danas posebno zadovoljani, a cijenim i građani ovih ulica. Sigurni smo da s nestrpljenjem i ostali građani čekaju prve radove u svojim ulicama. Završetak radova na rekonstrukciji i modernizaciji saobraćajnica u ulici Muse Ćazima Ćatića i Armije BiH, u mjesnoj zajednici Bužim, uspješno su završeni. Vrijednost projekta je oko 80.000 KM, a sredstva za ulicu Muse Ćazima Ćatića su obezbijedena od GSM licence u iznosu od 50.000 KM, koje je obezbijedio kantonalni zastupnik Kasim Mulalić, prije nekoliko godina, a ostali dio sredstava su obezbijedili općina Bužim i mještani pomenute ulice. Ulica Armije BiH, u koju je općina Bužim zajedno sa građanima uložila oko 42.000 maraka, što predstavlja i prvu fazu izgradnje, a građani su izgradnju čekali godinama, te nisu krili zadovoljstvo što su konačno dobili asfaltiranu ulicu. Ukupna dužina ove dvije ulice je oko 600 m, i koštala je cca 125. 000 KM. „Imali smo obavezu da završimo ova dva projekta i zvanično smo ih i završili zajedno sa građanima. Vjerujem da će ovi putni pravci ispuniti svoj cilj i da će mještanima ulica biti od višestruke koristi“,

kazao je načelnik Bunić.





Završeno asfaltiranje puta u MZ Čava

Metar po metar asfalta na neki način asfaltiramo skoro sve puteve u mjesnim zajednicama, tako da će se ispoštovati ono što je i obećano u predizbornoj kampanji. Svijetlost dana ugledala je i dionica asfaltiranog puta Dobro selo na području mjesne zajednice Čava u dužini od oko 350 metara i ukupnoj vrijednosti od oko 35.000 maraka. S obzirom da se radi o vrlo zahtjevnom putu za održavanje, građani nisu krili zadovoljstvo asfaltiranjem istog. Radove su obišli načelnik općine Bužim Agan Bunić, predsjedavajući općinskog vijeća Abid Mulalić i predsjednik MZ Čava Husein Mulalić.

“Ovo je vjerovatno zadnja realizirana investicija u ovoj godini. Radi se o bitnoj dionici zbog ljudi koji žive na Dobrom selu i isključivo se bave poljoprivredom. Ovo će im svakako olakšati proizvodnju i svakodnevnu komunikaciju. U narednom periodu ćemo nastaviti ovu investiciju, ovdje ima još posla. Ove smo godine na putu prema Dobrom selu već završili radova i vjerujemo da ćemo na proljeće nastaviti izgradnju puta od Čave prema Svetinji i Dobrom selu. Hvala i građanima koji su učestvovali u ovom projektu”-kazao je načelnik Bunić prilikom posjete.





Dotrajale hale u MZ Varoška Rijeka uspješno očišćene

Nakon što je udruženja „Aktiv“ u sali općine Bužim održalo sastanak povodom rješavanja ekološke katastrofe u Varoškoj Rijeci, koji se odnosio na čišćenje dotrajali hala. Pored članova udruženja „Aktiv“ sastanku su prisustvovali i mještani MZ Varoška Rijeka, koji su u neposrednoj blizini devastiranih hala. Sastanak je uvodnim izlaganjem otvorio načelnik općine Bužim Agan Bunić, koji se osvrnuo na sve do sad poduzete korake od strane općine Bužim kad je u pitanju ekološka katastrofa u Varoškoj Rijeci, te korake koje je moguće u što kraćem periodu realizirati. Nakon toga je otvorena rasprava u kojoj su članovi udruženja „Aktiv“ i mještani Mjesne zajednice Varoška Rijeka iznijeli neke od činjenica koji upućuju na alarmantnost problema. Preko dvijestotine učenika pohađa Osnovnu školu u Varoškoj Rijeci i svakodnevno su direktno izloženi ekološkoj katastrofi. Prve nastanjene kuće su doslovno nekoliko metara udaljene od hala, vjetar svakodnevno raznosi staklenu vunu oko, a pomenuti su i kobaltni gromobrani koji zrače, te uznemiravanje lokalnih mještana noću od strane kradljivaca željeza, dovoženje smeća i strвина od strane nesavjesnih građana na ovo područje.

„Problem hala u Varoškoj Rijeci je manje-više svima već poznat. Svakog dana smo svjedoci da se odvozi konstrukcija i da za to niko ne snosi posljedice. Ovaj problem se

ne smije politizirati, i on nije samo vaš problem nego cijele općine Bužim, jer svi mi udišemo isti zrak a te čestice se prenose i šire svakodnevno, te se stoga svi moramo uključiti da ga što prije riješimo. Čišćenje koje planiramo nije rješavanje ovog problema, nego samo gašenje „požara“ koji već odavno gori“, kazao je načelnik Bunić. Općina Bužim poduzela je korake u rješavanju ovog gorućeg problema i tako zajedno sa udruženjem „Aktiv“, kao i Asocijacijom mladih SDA Bužim, radnicima JKP „KOMB“, te mještanima Varoške Rijeke i ostalim građanima zajednički privela akciju i u potpunosti očistili hale u Varoškoj Rijeci i napokon riješili dugogodišnji ekološki problem.





Područna škola u MZ Elkasova Rijeka dobila sportsko igralište

Učenici, učitelji i mještani dobili sportsko igralište kod područne osnovne škole u MZ Elkasova Rijeka, koje će moći koristiti za košarku, mali nogomet, odbojku i rukomet. Igralište je standardnih dimenzija i prvo je sportsko igralište u ovom dijelu Mjesne zajednice. Sportski teren su u prisustvu mještana, svečano otvorili načelnik općine Bužim Agan Bunić i predsjedavajući općinskog vijeća Abid Mulalić. U ovaj projekat Općina je iz budžeta uložila više od 30.000 maraka.

„Ovom prilikom želim da se zahvalim općini Bužim, kao i općinskom načelniku Aganu Buniću na nesebičnoj pomoći koju pruža mjesnoj zajednici Elkasova Rijeka, i nastoji da mještanima naše mjesne zajednice život učini ljepšim i ugodnijim. Zsigurno ovo sportsko igralište će najviše obradovati naše đake koji pohađaju ovo područnu školu ali i sve one koji vole sport“,- rekao je predsjednik MZ Elkasova Rijeka, Elvir Ljubijankić.



Gradiće se put Lipa-Jušići

Potpisan Ugovor o izvođenju radova na projektu rekonstrukcije i modernizacije nekategorisanog puta Lipa – Jušići u MZ Elkasova Rijeka. Ugovor vrijedan oko 100.000 KM potpisali su načelnik općine Bužim Agan Bunić u ime općine Bužim, i direktor firme „Kov-Grad“ d.o.o. Bužim, Safet Kovačević. Ovo je još jedan vrlo značajan projekt za mjesnu zajednicu Elkasova Rijeka, u ovoj godini završeno je i asfaltiranje školskog igrališta. Mještani područja na kojem se gradi ovaj put će učestvovati sa svojim sredstvima i jedan dio sredstava će biti finansiran iz budžeta općine Bužim.

„U ovoj godini smo već realizirali puno projekata koji su bili od velikog značaja za naše sugrađane. U ovoj mjesnoj zajednici smo dosta posla uradili, a potpisan je ugovor i oko izgradnje lokalnog puta Trostruki klanci-Lipa u iznosu od oko 50.000 maraka iz sredstava GSM licence koja se realizira puetm Direkcije za ceste USK-a, a čija realizacije će ići vjerovatno na proljeće. Mi i dalje nastavljamo pomagati u skaladu sa našim mogućnostima sve mjesne zajednice pogotovo kada naši sugrađani iniciraju neki projekt, prikupe svoja sredstva i oko njega budu jedinstveni. Infrastrukturni projekti zahtjevaju puno sredstava ali mi nastojimo da pomognemo koliko više možemo i hvala Bogu do sada smo uspješno realizirati puno projekata u ovoj godini. Nadamo se da će ova dionica biti uspješno završena i na taj način omogućiti našim sugrađanima kvalitetniju povezanost sa centrom općine“- kazao je načelnik Bunić.





Asfaltiranje puta i ulična rasvjeta u MZ Bag

Asfaltiranje puta Spahići-Veladžići završeno je početkom mjeseca novembra. Realizacijom ovog projekta znatno je olakšano saobraćajno stanje vozila i od velikog je značaja naročito za stanovnike MZ Bag koji su asfalt dobili po prvi put od kad je put i izgrađen. Vrijednost radova na rekonstrukciji i modernizaciji ovog puta iznosi 37.000,00 maraka, a u finansiranju je učestvovala općina Bužim i jedan dio mještani.

Ovo nije jedini infrastrukturni projekat u MZ Bag. Naime, potpisan je ugovor za izvođenje radova na projektu izgradnje javne rasvjete u pomenutoj mjesnoj zajednici. Vrijednost potpisanog ugovora iznosi oko 17.000,00 KM, a svečanom potpisivanju prisustvovao je i predsjednik MZ Bag Miralim Makić koji nije krio zadovoljstvo potpisanim ugovorom. Sigurni smo da će izgradnja javne rasvjete u ovoj mjesnoj zajednici obezbjediti ljepše uvjete za život.

„Završili smo asfaltiranje puta, evo potpisivanjem završavamo i proceduru izgradnje dijela javne rasvjete u 12-toj mjesnoj zajednici općine Bužim. Imamo još potrebu da završimo dio javne rasvjete u MZ Bućevci i Radoč, vjerujem da ćemo i taj dio pripremiti u narednom periodu. Javnu rasvjetu gradimo na području svake mjesne za-

jednice, onako kako smo i obećali. Ogramni su troškovi izgradnje, održavanja i plaćanja računa električne energije, ali moramo približno iste uvjete obezbjediti za svaki centar mjesnih zajednica. Naravno, ovo je ujedno i poziv za sugrađane da plaćaju komunalnu naknadu, jer iz tih sredstava se plaća održavanje javne rasvjete, čišćenje lokalnih puteva, ulica i nekategorisanih cesta tokom zimske sezone, i niz drugih javnih poslova“ - istakao je načelnik Bunić.





Ponovo šindra na krovu Stare drvene džamije

Stara drvena džamija proglašena je nacionalnim spomenikom 2003. godine i jedan je od tri nacionalna dobra pod zaštitom države na području općine Bužim. Završetak radova na rekonstrukciji Stare drvene džamije na Starom gradu, su obilaskom ozvaničili načelnik općine Bužim Agan Bunić i saradnici. Zamijenjen je kompletan krov šindrom i tako je Stara drvena džamija u novom ruhu. Ukupna vrijednost radova je 83.000 maraka koja su obezbijedena preko Federalnog ministarstva prostornog uređenja u iznosu od 50.000,00 maraka i iz budžeta općine Bužim 33.000,00 maraka.

„Danas smo posebno sretni jer naša Stara drvena džamija dobiva novi stari izgleda, što će sigurno doprinijeti očuvanju ovog nacionalnog spomenika i na taj način sigurno povećati turističku ponudu općine Bužim. Nastavićemo ulagati u naselje Stari grad, ovih dana ćemo potpisati Ugovor o izvođenju radova na izgradnji puta prema istom naselju, očekuje se nastavak izgradnje i kanalizacione mreže, a u narednom periodu planirano je projektovanje i javne rasvjete za istoimeno naselje i dva nacionalna spomenika na ovom području, a to su Stari grad i Stara drvena džamija“ kazao je načelnik Bunić prilikom posjete.





Realizacija infrastrukturnih projekata u MZ Varoška Rijeka i MZ Zaradostovo

Mjesna zajednica Varoška Rijeka bogatija je za još jedan projekt koji su dugo čekali, naime u zaseoku Dančilovac je u rad puštena javna rasvjeta u dužini od 1.800 m. Na zadovoljstvo mještana novoizgrađenu javnu rasvjetu u rad su pustili načelnik općine Bužim Agan Bunić i ispred građevinskog odbora Enes Aldžić. Svečanosti su pored velikog broja građana prisustvovali i predstavnici izvršne i zakonodavne vlasti kako iz općine Bužim tako i sa nivoa kantona. Vrijednost projekta je 23. 000,00 maraka, sredstva za realizaciju ovog projekta obezbjeđena su zajedničkim učešćem općine Bužim i mještana pomenutog naselja.

„Obećali smo da ćemo ovaj projekat završiti i time smo pokazali da smo aktivni i u MZ Varoška Rijeka. Ovu rasvjetu treba nastaviti raditi u svim mjesnim zajednicama u kojoj nema javne rasvjete, a to ćemo uspjeti jedino ako budemo jedinstveni, i ako nam ukažete svoju podršku, povjerenje koja do sada nije izostala. Ovo je jedan dobar primjer gdje mještani koji imaju potrebu i odlučnost, a svakako i podršku općinske vlasti, mogu promijeniti stvari na bolje, te ambijent učiniti boljim i ljepšim. Želim da vam služi dugo godina i ne sumnjam da će vam olakšati svakodnevni život, a naročito vašoj djeci da idu u školu.“ kazao je načelnik Bunić.


Prisutnim se obratio i novoizabrani predsjednik mjesne zajednice Varoška Rijeka Sejfudin Duranović koji se zahvalio općini Bužim i mještanima na uspješno realiziranom projektu i kazao da je sigurno ovo trajno dobro za sve naše mještane. Nakon puštanja u rad javne rasvjete, upriličeno je i simbolično druženje načelnika, vijećnika i mještana iz ovog zaseoka.





Također realizacijom infrastrukturnog projekta, mještani MZ Zaradostovo imaju razloga da budu sretni, a radi se o uličnoj rasvjeti u ulici Hamzi. Izgradnje prve faze na relaciji od benzinske pumpe "Trgozad" do osnovne škole u Zaradostovu, uspješno je puštena u rad. Vrijednost ugovor iznosi oko 16.000,00 maraka. Rasvjetu u rad svečano su pustili načelnik općine Bužim Agan Bunić i vijećnik u općinskom vijeću Rifet Šahinović.

„Obećali smo da ćemo ovu prvu fazu završiti i time smo pokazali da smo aktivni i u MZ Zaradostovo. Ovu rasvjetu treba nastaviti dalje prema Abazovićima, a to ćemo uspjeti jedino ako budemo zajedno, i ako nam ukažete svoju podršku koja do sada nije izostala, i stoga vam se u to ime zahvaljujem. Želim da vam služi dugo godina i ne sumnjam da će vam olakšati svakodnevni život kako vama tako i vašoj djeci koja pješače u školu,“ istakao je načelnik Bunić.




Asfaltiranje i u MZ Lubarda

Općina Bužim ravnomjerno ulaže u sva naseljena mjesta općine Bužim, a jedan od ključnih projekata su rekonstrukcija i modernizacija puteva, izgradnja javnih rasvjeta u svim ulicama i naseljima. Tako i nakon nekoliko godina zastoja izgrađena je nova dionica puta Eminići-Abdići u iznosu od 40.000 KM. Pored ove dionice u izgradnji je još jedna dionica na istom putu u Abdićima. Također, na istom putnom pravcu je u pripremi novi ugovor od 50.000 KM, što ukupno znači da će se izvršiti radovi u iznosu od oko 130.000,00 maraka. U ovoj fazi izgradnje građani nisu učestvovali vlastitim sredstvima.

„Završili smo i novu dionicu put u MZ Lubarda, završićemo i drugu pomenutu dionicu u što kraćem roku. Realizacijom ovih projekata značajno će se poboljšati uslovi življenja u ovim naseljima. Svakako sa ovim i svim ostalim projektima koje budemo radili u općini Bužim imat ćemo ubrzo i kvalitetnu putnu komunikaciju sa skoro svim zaseocima u mjesnim zajednicama na području Općine te u narednom periodu nastaviti sa izvođenjem radova i na drugim projektima čija je priprema u toku“, - kazao je načelnik Bunić.





NA PROLJEĆE POČINJE SANACIJA I REKONSTRUKCIJA ULICA I PUTEVA U JOŠ PET MJESNIH ZAJEDNICA Ukupna vrijednost radova koje finansira općina Bužim iznosi 251.000,00 maraka

Općina Bužim nastavlja realizirati projekte sanacije i rekonstrukcija ulica i puteva na području 5 mjesnih zajednica. Tim povodom, načelnik općine Bužim Agan Bunić i direktor građevinske firme „Kov-grad“ Safet Kovačević potpisali su, u zgradi Općine ugovore o izvođenju radova na sanaciji i rekonstrukciji lokalnih i nekategorisanih cesta. Na radost brojnih stanovnika naše općine asfaltirat će se ulica „Krupska“ i ulica „Gazija“, II faza u MZ Bužim, rekonstrukcija i modernizacija nekategorisanog puta Remetići i put Muratovići u MZ Varoška Rijeka, zatim sufinansirat će se i izgradnja lokalnog puta Gornji Aleševići-Kosa-Bosnići u MZ Lubarada, rekonstrukcija i modernizacija puta Grbavice II faza u MZ Zaradostovo i u MZ Jusufovići put Baltići – Aldžići. Prilikom potpisivanja ugovora, Safet Kovačević izrazio je zadovoljstvo saradnjom sa općinom Bužim. Kazao je kako će uposlenici ove firme i ove projekte završiti kvalitetno i u predviđenom roku. Ukupna vrijednost potpisani ugovora koje finansira općina Bužim iznosi 221. 000, 00 KM.

„Svi ovi projekti čekali su neko novo vrijeme, čekali su neke nove ljude na svoju realizaciju i sretni smo što evo danas pot-

pisujemo ugovore s kojim će radovi ubrzo krenuti i nadam se i uspješno okončati na naše, ali prije svega zadovoljstvo samih mještana u pomenutim ulicama i naseljima. Samim time iscrpili smo sve planirane aktivnosti kada je u pitanju izgradnja i realizacija infrastrukturnih projekata na području općine Bužim u toku ove godine. Ovih dana smo završavali projekte za koje smo imali potpisane ugovore, tako da smo one projekte koje smo planirali u ovoj godini hvala Bogu uspješno realizirati. Naravno mi ne bismo mogli sami završiti sve ove projekte bez naših sugrađana koji su do sada bili inicijatori većine projekata, a svojim sredstvima pomogli su realizaciju istih. Kada je u pitanju mjesna zajednica Bužim i sami centar naše općine mi smo gotovo pa asfaltirali sve ulice ali nam je ostalo još nekoliko ulica koje ćemo svakako nastojati završiti u narednoj godini kao što su dovršetak izgradnje ulica Armije BiH, dr. Irfana Ljubijankića, put prema Starom gradu, i drugi. U općini Bužim je u toku priprema za realizaciju i niza drugih projekata koji su bitni za sve njene građane,- kazao je načelnik općine Bužim Agan Bunić.



Općina Bužim dodijelila rekordan broj stipendija

U prostorijama JU „Centar za kulturu, sport i informisanje“ Bužim upriličeno je svečano potpisivanje ugovora o stipendiranju studenata koji su shodno konkursu općine Bužim ostvarili pravo na stipendiju za akademsku 2013/2014. godinu.

Tako je dodijeljeno ukupno 140 stipendija u jednokratnom iznosu od 500,00 KM za tekuću akademsku godinu. Ugovore o stipendiranju sa studentima potpisao je u ime općine Bužim, općinski načelnik Agan Bunić poželjevši im uspjeh u nastavku školovanja, mnogo dobrih rezultata i uspješan završetak studija i naglasivši kako su oni nada i budućnost općine Bužim te kako očekuje da će svojim znanjem pomoći kako rodnom kraju tako i jedinoj nam domovini.

„Svi studenti koji su ispunjavali one osnovne uvjete su dobili stipendije. Kao sto znate svake godine broj studenata koji dobivaju stipendiju je u porastu. S obzirom da znam da se studenti nalaze u nezavidnoj situaciji jer sam i sam bio student i to u vrijeme kad Općina Bužim nije dodjeljivala stipendije, kasnije sam se kao vijecnik zalagao za osiguranje finansijskih sredstava za stipendiranje studenata. Prvobitno se radilo o samo pet stipendija ali je taj broj vremenom rastao. Iako se suočavamo s mnogim problemima pri realizaciji naših projekata opredijelili smo se da ulažemo u obrazovanje. Uspjeli smo da ispunimo svoje obećanje i pružimo podršku svim studentima,

bili oni boljeg ili slabijeg imovinskog stanja, i bez obzira na to da li je iz jedne porodice jedan ili više stipendista. Možemo raspravljati i kazati da je ovaj iznos malen ali radit ćemo na tome da ga povećamo. Željeli smo svima njima pružiti finansijsku podršku a uz to ih i motivisati kako bi bili još bolji i uspješniji. Možemo slobodno kazati da je malo općina u Bosni i Hercegovini koji su prihvatili ovakav model stipendiranja svih studenata, prvenstveno iz razloga što takvo opredjeljenje zahtijeva izdvajanja više budžetskih sredstava. Ponosni smo što smo jedna od rijetkih općina koje su to uspjele usprkos tome što se moraju ispuniti i obaveze prema drugim korisnicima budžeta. U isto vrijeme smo svjesni i činjenice da iznos stipendije nije dovoljno velik s obzirom na troškove studiranja, ali se nadamo da ćemo u budućnosti biti u stanju osigurati veća finansijska sredstva te na takav način pružiti podršku mladim ljudima željnim znanja i profesionalnog usavršavanja“, kazao je u prigodnom obraćanju načelnik Bunić.

Načelnik Agan Bunić je na kraju naglasio da je za roditelje najveća sreća, koju im mogu priuštiti njihova djeca, završetak studija i dobijanje diplome. Iz tog razloga, još jednom je upućena čestitka dobitnicima stipendije i vjera da će kao budući inženjeri, doktori, pravnici, ekonomisti, doprinositi razvoju društva i sveopćem prosperitetu.



Ispraćena generacija maturanata MSŠ „Bužim“

Neki se raduju, a neki tuguju, ali u svakom slučaju ne žale za provedenim u toku školovanja. Ispred bužimskog srednjoškolskog centra ispraćena je još jedna generacija maturanata MSŠ „Bužim“.

Svečanosti ispraćaja maturanata uz učenike i profesore prisustvovali su roditelji i mnogobrojni prijatelji. Prigodnim govorom se obratio Zlatan Topić, direktor MSŠ „Bužim“, koji je maturantima poželio sreću u budućem životu i radu. Prisutni su imali priliku uživati i u prigodnom programu koji su učenici pripremili.



Defile maturanata Osnovne škole „Bužim“

Maturanti Osnovne škole „Bužim“ prodefilovali prema općini Bužim gdje ih je dočekaopćinski načelnik Agan Bunić, koji je kazao da samo radost i zadovoljstvo mogu se vidjeti na licima mališana koji tek sada kreću u neke nove izazove. Naime, ovogodišnji maturanti su pokrenuli akciju „Djeca djeci“ kako bi u skaldu sa svojim mogućnostima pomogli svojim vršnjacima u nekoj od škola sa poklon paketima namjenjenih djeci u poplavljenim područjima, kako bi na taj način pokazali svoju humanost, plemenitost, nesebičnost i solidarnost. Nakon zajedničkog fotografisanja, maturanti su se uputili prema JU „Centar za kulturu, sport i informisanje“ Bužim gdje su ostavili oko 104 poklon paketa koje su pripremili za svoje vršnjake u školama poplavljenih područja. Aktivisti Humanitarne organizacije „SADAKA“ su ih dostavili u Željezno polje učenicima područne Osnovne škole „Abdulvehab Ilhamija“. Svrha akcije je bila da se učenici Osnovne škole „Bužim“ solidarišu sa svojim vršnjacima koji su pogođeni poplavama i klizištima. Tako smo uspjeli i izmamiti na trenutak osmjeh svoj djeci, bili su presretni poklonom.





3.000 knjiga za biblioteku u Bužimu

Na 6. Konferenciji bibliotekara Bosne i Hercegovine u Tešnju 22. oktobra 2014. godine pokrenuta je donatorska akcija prikupljanja knjiga za biblioteku u osnivanju u Bužimu. Na Donatorskoj akciji bili su prisutni direktori javnih biblioteka iz Bosne i Hercegovine i Hrvatske. Domaćin akcije je bio mr. Esmir Bašić direktor biblioteke Tešanj. Na donatorskoj akciji prikupljeno je oko 3.000 knjiga što će biti dovoljno da se doda već postojećem fondu biblioteke u Bužimu da uskoro može otpočeti sa javnim radom.

Knjige iz svog fundusa za biblioteku u Bužimu donirale su biblioteke iz slijedećih gradova: NUB Sarajevo, Tuzla, Tešanj, Lukavac, Zavidovići, Konjic, Kakanj, Sisak, Zenica, Kalesija, Breza, Ilijaš, Busovača, Visoko, Vareš, Komisija za nacionalne spomenike, dr. Enes Kujundžić i ranije dr. Enver Mandžić, Bosanska riječ Tuzla te KUB Bihać i dr. Proces implementacije ove ideje prikupljanja će završiti krajem novembra 2014. godine. Očekivani rok za pokretanje javnog rada biblioteke u Bužimu je proljeće 2014. godine. Ispred općine Bužim ovoj akciji je prisustvovao Sead Emrić, referent za kulturu i bibliotekarstvo.



Saradnja općine Bužim i Kantonalne univerzitetske bibliote

Davno je dokazano da čitanje potiče razvoj inteligencije, obogaćuje rječnik, jača vezu između govornog i pisanog jezika, doprinosi razvoju kreativnog mišljenja i mašte, komunikacijskih vještina. Djeca sa razvijenim čitalačkim navikama imaju pozitivan odnos prema školi, postižu bolje rezultate, stiču čitalačku pismenost koja je važna za kvalitetu rada, zapošljavanje i općenito uključенost u društvo. Imajući navedeno u vidu te vodeći devizom da je jedna od najboljih stvari koja se može učiniti za djecu obogaćivanje i razvijanje čitalačkih navika, danas su predstavnici općine Bužim uručili stotinu čitalačkih kartica učenicima Osnovne škole "Bužim" i Mješovite srednje škole "Bužim".

Kartice su, u ime općinskog načelnika Agana Bunića, uručili savjetnik općinskog načelnika Zijad Nanić i predsjedavajući općinskog vijeća Abid Mulalić. Plod je to saradnje sa JU "Kantonalna i univerzitetska biblioteka" Bihać koja posjeduje pokretnu biblioteku pod nazivom Bibliobus, kojom obilaze rubne dijelove grada, udaljena naselja, širu okolinu, ustanove, preduzeća i škole. Korisnicima nudi stručnu literaturu, publicistiku, znanstveno-popularnu literaturu kao i slikovnice, stripove, klasike, hit izdanja, priručnike, DVD-ove i audio CD-ove.

"Želimo da pomognemo da što veći broj građana ima pristup novim i različitim djelima, da utičemo na podizanje svijesti o važnosti čitanja i obrazovanja, na podizanju nivoa pismenosti u našoj zemlji. Tako će ovaj Bibliobus svakih četrnaest dana posjećivati pored centralne Osnove škole "Bužim" i Mješovite srednje škole "Bužim", škole na Konjodoru, Varoškoj Rijeci, Čavi", istakao je općinski načelnik Agan Bunić. Bibliobus nudi preko 60.000 naslova i sasvim je sigurno da će brojni zaljubljenici knjige s područja općine Bužim pronaći svoje omiljene naslove.



Općinu Bužim na Federalnom takmičenju predstavljala je učenica Elma Kovačević

SABNOR u saradnji sa Federalnim ministarstvom obrazovanja i nauke organiziralo je takmičenje iz likovnih i literarnih radova na temu "Moja domovina Bosna i Hercegovina". Na ovom takmičenju pristiglo je blizu 1000 radova.

Na svečanoj akademiji povodom Dana državnosti Bosne i Hercegovine federalni ministar obrazovanja i nauke, Damir Mašić, ovom prigodom je uručio nagradu učenici Osnovne škole "Bužim", Elmi Kovačević za osvojeno treće mjesto u kategoriji likovnih radova. Elma Kovačević, učenica devetog razreda Osnovne škole "Bužim" iz Bužima, rođena je 27. oktobra 1998. godine. Njen talent prepoznao je dugogodišnji nastavnik likovne kulture Hašim Šahinović.

Općinski načelnik Agan Bunić uputio je iskrene čestitke Elmi i nastavniku Šahinoviću te izrazio nadu da će i ostali učenici svojim radovima doprinosti boljem imidžu općine Bužim u državi i svijetu.



Obilježen Međunarodni dan studenata i srednjoškolaca

Asocijacija srednjoškolaca Bosne i Hercegovine lokalni tim Bužim i Vijeće učenika Mješovite srednje škole „Bužim“ organizirali su uličnu akciju koja je održana ispred zgrade JU „Centar za kulturu, sport i informisanje“ Bužim, a u povodu Međunarodnog dana srednjoškolaca. Ulična akcija je održana pod motom „Ja srednjoškolac“ i „Da li nas čujete?“

Međunarodni dan srednjoškolaca obilježava se u spomen na praške studente i srednjoškolce, koji su zbog mirnog prosvjeda protiv nacističke okupacije svoje zemlje, održanog 17. novembra 1939. godine strijeljani bez suđenja. Ovaj dan povezan je sa pravima srednjoškolaca. U evropskim zemljama ovaj dan se obilježava dugi niz godina kao Dan srednjoškolaca, a ove godine, jubilarni 70. dan srednjoškolaca po prvi put učenici Mješovite srednje škole „Bužim“ su isti obilježili i u Bužimu.

„Svim studentima i učenicima sa područja općine Bužim upućujem čestitke povodom dana studenata i srednjoškolaca, te im iskreno od srca želim puno uspjeha u daljem školovanju“, stoji u čestitci općinskog načelnika Agana Bunića.





Osnovana JU „Centar za kulturu, sport i informisanje“ Bužim

Nakon dvanaest godina institucionalne praznine u kulturnom životu općine Bužim, 30. januara 2014. godine, konačno je osnovana kulturna ustanova pod nazivom JU „Centar za kulturu, sport i informisanje“ Bužim. Druga je to po redu ustanova, nakon što je 1995. osnovana i poslije sedam godina ugašena JU „Informativno-kulturni centar“ Bužim. Bez obzira na loša lokalna iskustva koja postoje u ovoj oblasti u protekle dvije decenije, današnji dan, za svakog poštovaoca kulture i obrazovanja na području općine Bužim, trebao bi biti sretan dan.

Dovršavanjem novog objekta, čija gradnja traje već nekoliko godina, stvorile su se sve neophodne pretpostavke za osnivanje i rad ove javne ustanove, a koja će u narednom periodu upravljati ovim objektom te biti glavni kreator i generator kulturno-umjetničkog, informativnog, a dijelom i sportskog života na području općine Bužim. Prilika je to da se nakon dugog niza godina uredi ova oblast, vezano prije svega za rad sale doma kulture, gradske biblioteke, muzeja 505., kao i nekog budućeg zavičajnog muzeja ili zavičajne zbirke, a vjerovatno i galerije, sportske dvorane, zatim ako Bog da, da se pokrene lokalni radio, te barem dijelom riješi upra-

vljanje kulturnim spomenicima i spomen obilježjima iz proteklog rata. Zbog čega je za Bužim značajno osnivanje ove ustanove? Pa upravo zbog činjenice, da je to ustanova koja svojim radom i aktivnostima dobrim dijelom kreira javno mjenje u jednoj lokalnoj sredini. Tamo gdje prestaje domet dječijeg vrtića, osnovne i srednje škole, te univerziteta, s druge strane mekteba i džamije, počinje odgojno-obrazovno i kulturno-prosvjetno djelovanje ove ustanove, kroz kulturno-umjetnički, informativni i sportski život.





Dakle, temeljna zadaća ove ustanove, u budućnosti bi trebala biti profiliranje sloja kreativnih ljudi, u početku amatera, na raznim poljima kulturno-umjetničkog i sportskog života, a vremenom, rezultat bi trebao biti izrastanje velikog broja markantnih ličnosti na polju: književnosti, novinarstva, umjetnosti, dizajna, filma, muzike, i sl., dakle svega onoga što Bužimu, kao općinskom središtu već godinama jako puno fali. Općinsko vijeće sa 12 glasova za od toga (9 glasova SDA, 1 A-SDA, 1 SPU i 1 SBB) i 4 glasa suzdržana (1 SBIH, 1 SDP i 2 A-SDA), je dalo saglasnost na osnivanje ove ustanove.

Dužnosti direktora obavljat će Mersudin Nanić, bachelor Islamske vjeronauke i trenutno apsolvent na Panevropskom univerzitetu „Apeiron“ u Banja Luci, odsjek Informacioni tehnologija.

„O osnivanja Centra i i njegovoj ulozi načelnik je rekao, stvorili smo sve pretpostavke za osnivanje ovakve ustanove, ovih dana završavamo veliku salu Doma kulture, u budžetu su predviđena sredstva za rad, i osnivanje ove ustanove znači da ćemo imati bolje uslove za rad radnika u kulturi, sportu i informisanju. Osnovni zadatak ove ustanove će biti upravljanje novoizgrađenim Domom kulture i ponovno pokretanje rada radio-stanice na području općine Bužim. Vjerujem da će novoimenovani direktor opravdati povjerenje Općinskog vijeća, te očekivanja građana od ove ustanove“,- kazao je načelnik Bunić.





Bužimski simbol: Od mekteba do Islamskog kulturno-edukativnog centra

Već duže se vode aktivnosti oko izgradnje Islamskog kulturno-edukativnog centra u Bužimu. Projekt predviđa objekt od tri sprata i prizemlje u kojem bi se, između ostalog, trebalo nalaziti sjedište Međžlisa Islamske zajednice Bužim, te restoran, kabinetske učionice, dvije hotelske sobe, konferencijska sala i ostali infrastrukturni sadržaji. Vjerski život muslimana bužimskog kraja od dolaska islama na ove prostore 1576. godine pa sve do danas uglavnom je vezan za džamije i njihove područne mektebe. Najstarija i, koliko je do danas poznato, u to vrijeme i jedina džamija koja se nalazila u sklopu bužimske tvrđave bila je u funkciji sve do tridesetih godina 19. stoljeća.

Ova kamena džamija stradala je za vrijeme gušenja buna u Krajini, paljenjem bužimske tvrđave. Nedugo nakon toga, 1838. godine, podno grada je izgrađena drvena džamija koja danas predstavlja nacionalni spomenik Bosne i Hercegovine. Stara drvena džamija je sve do izgradnje džamija u Čaglici, Konjodoru, Varoškoj Rijeci i Lubardi u posljednjih nekoliko decenija 19. stoljeća također bila jedina džamija na području Bužima. Osim prve (kamene) džamije na tvrđavi te Stare drvene džamije iz 1838. godine, značajan period u vjerskom životu Bošnjaka bužimskog kraja jeste i period djelovanja Bužimske medrese od 1880. do 1890. godine.

Rad ovog mekteba ibtidaije, koji su mještani prozvali medresom, odvijao se u privatnom objektu. Njenim zatvaranjem stanovnici ovog podneblja ostali su bez adekvatnog prostora za održavanje vjerske nastave. Tako će dugo džamije biti jedini objekti za zadovoljavanje osnovnih kulturno-vjerskih potreba.

Mekteb u Bužimu

Tek 1936. godine, prije nepunih 78 godina, Bužim je dobio novu i u to vrijeme vrlo elitnu mektepsku zgradu. Ovaj objekt, svojevremeno jedan od najreprezentativnijih takve vrste u Krajini, podignut je na mjestu na kojem je nekad postojala tufekčijska radnja u kojoj su se kovale različite vrste oružja. Inicijativu za njenu izgradnju podnijeli su Bužimljani. Uz pomoć Emin ef. Tirića, šerijatskog sudije iz Bosanske Krupe, osnovali su građevinski odbor i počeli s neophodnim aktivnostima. Na čelu odbora bili su Ibrahim ef. Seferović, imam džemata Kamenica, zatim predsjednik Općine Bužim Ibrahim Šahinović, odbornici Ahmet Šahinović i Alaga Isaković, te ostali.

Izrada projekta i rukovođenje gradnjom povjereni su Enveru Krupiću, građevinskom tehničaru i studentu umjetnosti na Zagrebačkom univerzitetu.

Dužina zgrade iznosila je 17, a širina 11 metara. U prizemlju su se nalazile dvije učionice 6×8 metara, zbornica 4×4 metra, predsoblje i garderoba. Na spratu je izgrađen stan za učitelja s dvije sobe, kuhinjom i kupatilom. Zgrada je u cijelosti sagrađena od kamena. Kako to pokazuju izvještaji, Vakufska direkcija nije novčano pomogla gradnju ovog objekta nego su je u cijelosti finansirali mještani.

Svečano otvorenje održano je 25. oktobra 1936. godine. Osim nekoliko hiljada ljudi koji su konjskim kolima, kočnicama ali i pješice došli iz okolnih mjesta, svečanosti su prisustvovali i brojni imami, te ugledne ličnosti kakvi su podban Vrbaske banovine dr. Ljubisavljević, narodni poslanik Nuriya Pozderac te Fetah-beg Krupić.

U 11 sati goste je pozdravio džematski imam Ibrahim ef. Seferović te predao ključ mekteba izaslaniku naiba Islamske vjerske zajednice da objekt proglasi otvorenim. Nakon otvora, veličanstvenom skupu su se obratili Nuriya Poderac, te ispred pravoslavnih Milan Petrović, trgovac iz Bosanske Krupe. Poslije zajedničkog ručka, održane su konjske trke, a u večernjim satima vrlo posjećenu zabavu priredio je učitelj škole u Bužimu Mustafa ef. Kudić. Kako se gradnja ovog mekteba odvijala u uvjetima nepostojanja školskog objekta u centralnom bužimskom naselju, njegovo otvaranje imalo je poseban značaj. Iako je primarna namjera članova odbora bila da objekt služi odgajanju i obrazovanju kadra potrebnog velikom broju mektebskih džematata na području Islamske zajednice Bužim, sve do dogradnje objekta osnovne škole Bužim 1960. godine ovaj objekt je služio i za održavanje redovne školske nastave.

Osim izgradnje novog objekta, u planu projekta je i rekonstrukcija sadašnje zgrade Medžlisa, ranijeg mekteba. U njegovoj unutrašnjosti trebao bi biti smješten dječiji vrtić Islamske zajednice. Na taj način će se postojeći objekt mekteba, bez velikih arhitektonskih skrnavljenja i narušavanja njegove monumentalnosti, na najbolji način skladno uklopiti u spomenutu graditeljsku cjelinu. Uzurpacijom vlasti i tokom cijelog komunističkog perioda objekt nije služio primarnoj svrsi. Od 1952. do 1959. godine bio je u funkciji Narodnog odbora Općine Bužim, a prije izgradnje starog objekta Doma kulture služio je i kao kinosala. Tokom proteklog rata u njemu su bile smještene institucije civilnih vlasti Mjesne zajednice Bužim, Zajednice mjesnih zajednica Bužim, a na kraju i Općina Bužim, nakon njenog formiranja 20. februara 1995. godine.

Preseljenjem općinskih službi u novu zgradu 1996. godine tadašnji načelnik Husein Nanić navedeni je objekt i službeno predao u vlasništvo Islamske zajednice Bužim. Početkom osamdesetih godina izvršena je i njegova rekonstrukcija i dogradnja. Sam objekt je od izgradnje do

dan danas nekoliko puta mijenjao naziv. Prvo se zvao mekteb, zatim Vakufska zgrada, izvjesno vrijeme Bijela kuća, a danas nosi službeni naziv Zgrada Medžlisa.

Novi objekt Islamskog kulturno-edukativnog centra u Bužimu



Već duže vrijeme vode se aktivnosti na izgradnji Islamskog kulturno-edukativnog centra u Bužimu. Tome je prethodilo mnogo značajnih pojava, a najvažnija je, čini se, izbor za predsjednika Medžlisa Islamske zajednice Bužim Eniza ef. Veladžića, mladog, sposobnog i vrlo odlučnog imama. Naime, njegovim dolaskom na čelo ove institucije desile su se određene pozitivne promjene u radu. Primjetno je postojanje vizije, volje i htijenja da se vjerski život učini kvalitetnijim.

Transparentnost u radu ogleda se u vraćanju prakse održavanja redovnih sjednica Skupštine i podnošenja finansijskog izvještaja i izvještaja o radu njenih članova. Potpisivanjem sporazuma o obostranoj saradnji između Medžlisa IZ Bužim i Općine Bužim, uspostavljena je i zvanična saradnja ove dvije institucije. Saradnja je pospješena i na relaciji Medžlis – Muftijstvo i Medžlis – Rijaset. Sve je to lijep išaret da će se, ako Bog da, u budućnosti slika vjerskog života na području općine Bužim uveliko popraviti.

Ideja o izgradnji zgrade Islamskog kulturno-edukativnog centra u Bužimu dijelom je konkretizirana i izradom projektno-tehničke dokumentacije. Korak više bila je i sergija za izgradnju ovog objekta, koja je realizirana u svim džematima na nivou Rijaseta Islamske zajednice u Bosni i Hercegovini i dijaspori. Naredni korak bio je polaganje kamena temeljca koji je održan 15. augusta, u okviru službenog programa manifestacije “Slobodarski dani viteškoga grada Bužima 2014”.



Projekt Islamskog kulturno-edukativnog centra predviđa objekt od tri sprata i prizemlje, u kojem bi se, između ostalog, trebali nalaziti sjedište Medžlisa IZ Bužim, restoran, kabinetske učionice, dvije hotelske sobe, konferencijska sala i drugi infrastrukturni sadržaji. Osim izgradnje novog objekta, u planu projekta je i rekonstrukcija sadašnje zgrade medžlisa, ranijeg mekteba.

U njegovoj unutrašnjosti trebao bi biti smješten dječiji vrtić Islamske zajednice. Na taj će se način postojeći objekt mekteba, bez velikih arhitektonskih skrnavljenja i narušavanja njegove monumentalnosti, na najbolji način skladno uklopiti u navedenu graditeljsku cjelinu. Podršku projektu dali su bivši reisul-ulema Mustafa ef. Cerić, ali i sadašnji mr. Husein ef. Kavazović. Značajna podrška dolazi i od bihačkog muftije Hasan ef. Makića, kao i Općine Bužim na čelu s načelnikom općine Aganom Bunićem.

Nadati se da će realizacija ovog plemenitog projekta teći u skladu s predviđenim planom, i da će nova zgrada Islamskog kulturno-edukativnog centra u Bužimu ubrzo služiti svojoj pravoj namijeni.

Autor: prof. Sijamhodžić Amir





“Dan Tursko-Bosanskog prijateljstva i u Bužimu”

Dan tursko-bosanskog prijateljstva, uz promociju knjige „Recep Tayyip Erdoan-Rađanje lidera“, autor Huseyina Beslija i Omera Ozbaya, te izložbom fotografija novinske agencije Anadoluja, pod nazivom „20 godina od dolaska vojne misije u BIH“, a u saradnji sa Asocijacijom „Mostovi prijateljstva BIH“ iz Zenice, održani su i u Bužimu.

“Recep Tayyip Erdogan nije lider Turske, Recep Tayyip Erdogan je lider muslimana u svijetu”, rekao je Šikalo i dodao „da je Turska jaka zahvaljujući Erdoganovoj politici, a Bošnjacima je veoma važno kada je Turska jaka“. Na manifestaciji su bili prisutni predstavnici Turske ambasade u BIH, ataše za kulturu Cengiz Aydin, direktor regionalne direkcije za Balkan novinske agencije Anadoluja Omer Certes, načelnik općine Bužim Agan Bunić, kantonalni zastupnik u Vladi Unsko-sanskog kantona Kasim Mulalić, predstavnici Medžlisa Islamske zajednice Bužim, predsjedavajući općinskog vijeća Bužim Abid Mulalić i nekoliko vijećnika, te oko 150 građana općine Bužim. Moderator današnjeg programa je bio predsjednik Asocijacije mostovi prijateljstva Jasmin Imamović, koji je istekao da mu je izuzetna čast da se ova manifestacija održava baš kada jedna od najmlađi općina u BIH slavi svoj rođendan. Mostovi Prijateljstva je organizacija koja gradi i jača mostove prijateljstva, pa je i ova posjeta i druženje

sa građanima općine Bužim naš doprinos za budućnost boljih prijateljskih odnosa između građana Bužima, Zenice, naroda BiH i Republike Turske, jer mi smo Mostovi Prijateljstva BiH-Zenica, - kazao je Imamović. Promotori knjige su bili prof. dr. Redžo Čaušević, prof. dr. Džemaludin Latić, i Izedin Šikalo, direktor izdavačke kuće “Dobra knjiga”. Akademik Čaušević na početku obraćanja prisutnima, spomenuo je da i Turska i BiH proživljavaju dramatične povijesne dane, i zbog toga promocija knjige je veoma važna. “Sama riječ ‘rađanja lidera’ govori puno toga u smislu da se lider rađa. Dakle to je jedan psihološka osobina koja dolazi sa čovjekom i svi problemi koji se danas dešavaju u Bosni i Hercegovini su upravo zbog toga što ljude hoće da budu lideri, a nemaju taj dar. Bog je htio da turski narod dobije jednu takvu ličnost” kazao je Čaušević.

Čaušević je govorio i o životu premijera Erdogana, ali i uspjesima Vlade Turske predvođene Recepom Tayyipom Erdoganom. Akademik Latić kazao je „da ako bude napredovala Turska, onda će i Bosni biti lakše“. “Tayyip Erdogan je islamski demokrat. Mi želimo da uspije islamska demokracija ne samo u Turskoj nego i u Bosni. Mi smo isto tako islamski demokrati. Islamske demokracije plaši se čitav svijet. Svi se boje buđenja muslimanskih naroda. Svi bi oni željeli da mi budemo samo njihovi robovi”.



Ovdje se pravi Evropska uniji i mi smo ustvari roblje EU. Zašto? Zato što smo muslimani” rekao je Latić.

Govoreći o islamskoj demokraciji, Latić dodaje: “To je plemenita ideja koja sve ljude na svijetu smatra ravnopravnim, koja ih smatra božjim robovima. Pošto je Bog njih stvorio jednake, onda trebaju da žive jednaki. Islamska demokracija se ne veže samo za muslimane, ona daje jednaka prava svime. Ona daje prava i životinjama i ekosistemu. Ova islamska demokracija nas može spasiti u Bosni i Hercegovini. Mi se ne možemo svoje vjere odreći”.

Latić smatra da u BiH mora doći do „Daytona 2“. “Oni su zaustavili rat nakon što su Bošnjaci stekli armiju. Nisu mogli da čine genocid nad nama. Mi smo čak dobili šansu da ih porazimo. Tada su prihvatili Dayton i došlo je do mira. Međutim, oni su nama napravili luđačku košulju. Ako dođe do Dayton 2, a ne budemo imali neku muslimansku silu koja će zastupati bošnjačke interese, mi ćemo jako teško proći, mi ćemo možda propasti“, mišljenja je Latić.

Latić je rekao i da Turska ima međunarodno pravo da se brine o Bošnjacima, te naveo: „Da je u prethodnom ratu u BiH Erdogan bio premijer Turske, Abdullah Gul predsjednik ili Ahmet Davutoglu ministar vanskih poslova ne bi se sve ono desilo“. Nakon promocije knjige, gosti su imali priliku da posjete izložbu fotografija Anadolu Agency pod imenom “20. godišnjica turske vojne misije u BiH”.

U svom izlaganju načelnik općine Bužim Agan Bunić je poželio dobrodošlicu predstavnicima Turske ambasade u BiH, predstavnicima Turske vojne misije u BiH, agencije Anadolu, predstavnicima Asocijaciji mostovi prijateljstva Zenica.



“Spremni smo na sve vidove saradnje koji će ubrzano pojačati naše prijateljske i bratske odnose sa Turskom”. Imamo dobre odnose, za koje smatramo da će biti i bolji u narednom periodu. S ponosom pratimo uspon Republike Turske i njenog lidera Erdogana. Prolazimo kroz iste probleme, suočeni sa protestima i nemirima. Vjerujem da će vladajuća stranka zabilježiti odličan rezultat na predstojećim lokalnim izborima, te u to ime upućujemo iskrene čestitke turskom narodu“, kazao je načelnik općine Bužim Agan Bunić.



Animirane filmove gledalo više od 2.000 djece

Općina Bužim i ove godine u sklopu manifestacije Dani općine Bužim organizirala besplatno gledanje animiranih filmova za učenike osnovnih škola sa područja općine Bužim. Tako je više od 2.000 djevojčica i dječaka imalo priliku uživati u interesantnim filmovima za djecu.

Također, i nešto stariji građani imali su priliku uživati u večernjim satima u projekciji igranog 3D filma "47 RONIN", jednog od trenutnih kino hitova. Velika posjećenost i zadovoljstvo prisutnih zasigurno su pokazatelj opravdanosti ovakvog projekta. Projekcija je organizirana u saradnji sa Udruženjem mladih Bužim i finansijskim pokroviteljstvom Općine Bužim.

„Ovo je bio poklon najmlađima i za one nešto starije građane Bužima, a povodom Dana općine i cilj uvesti u narednom periodu nove kvalitetne sadržaje u život stanovnika, te učiniti Bužim ugodnijim i ljepšim mjestom za život svih građana“; - kazao je načelnik općine Bužim Agan Bunić.



Pjesničko veče u Bužimu

Održana je pjesnička večer sa književnikom Amirom Brkom. Tim povodom promovisana je njegova nova knjiga, zbirka poezije pod nazivom „Ruševine se podupiru“. Inicijator i organizator promocije bila je Bošnjačka zajednica kulture „Preporod“ Bužim, te JU „Centar za kulturu, sport i informisanje“ Bužim. Sponzor ovog sadržaja, kao i cijele manifestacije je Općina Bužim. Još jedan u nizu kulturnih sadržaja manifestacije pod nazivom „Dani općine Bužim“ okupio je veliki broj zainteresirane publike. Gosti su imali priliku uživati u poeziji velikog bosansko-hercegovačkog književnika i pjesnika Amira Brke, člana, i do nedavno predsjednika Društva pisaca Bosne i Hercegovine.

Moderator je bio Sead Emrić, referent za kulturu u općini Bužim. U svom uvodnom izlaganju Emrić je iznio najznačajnije biografske i bibliografske podatke o Amiru Brki, te bužimljanima približio životno djelo ovog pisca. Kazao je da Amir Brka spada u red najznačajnijih bosansko-hercegovačkih pjesnika, te da je za svoj dugogodišnji rad dobio brojne stručne nagrade i priznanja. Isto tako, naglasio je da je ovaj književnik već deceniju i pol na čelu „Centra za kulturu i obrazovanje“ općine Tešanj, ustanove koja je po svome radu jedan od najsvjetlijih primjera u Bosni i Hercegovini.

Pored autorovog obraćanja, te promocije knjige, u drugom dijelu, prisutni su imali priliku postavljati pitanja, iznijeti svoje komentare, iz čega se zaposjednuo živi razgovor te osjetila energija i puls bužimske publike.



Otvoren Drugi bužimski likovni salon u Bužimu

Drugi bužimski likovni salon, zamišljen kao prilika za afirmaciju bužimskih profesionalaca u umjetnosti, ali i amatera. O izlagačima i njihovom dosadašnjem radu prisutne je upoznao Sead Emrić, referent za kulturu u općini Bužim. Emrić se u svom izlaganju, između ostalog, osvrnuo na širi značaj likovne umjetnosti, te govorio o Bošnjacima kao kreativnom narodu.

Zahvalio se je, u ime bužimskih umjetnika, i općinskom načelniku što je i ove godine pružena podrška bužimskom likovnom salonu. Drugi bužimski likovni salon je otvorio načelnik općine Bužim Agan Bunić, koji se prigodnim riječima obratio prisutnima. Svoje radove na Drugom bužimskom likovnom salonu izložili su umjetnici Sead i Halida Emrić, prof. Ismet Erdić, Hašim Šahinović, dr. Šerif Ramić, Nedžib Vučelj, Elma Kovačević, Hadžem Emrić, te Alen i Rasim Duraković. Općina Bužim je i ove godine sve izlagače na likovnom salonu nagradila sa simboličnom novčanom nagradom.



Pozorišnom predstavom završeni dani općine Bužim

Bužima, građani naše općine su sasvim sigurno uživali u pozorišnoj predstavi kabareom 'Međuigre 0-24', u izvedbi poznatog dramskog umjetnika, reditelja, glumca i režisera Zijaha Sokolovića. Time je završena ovogodišnja manifestacija Dana općine Bužim. Nizom kulturnih, zabavnih, sportskih i svečanih manifestacija, u kojima ste sasvim sigurno mogli i uživati. Kabareom, glumac je oduševio i do suza nasmejao brojnu publiku. "Međuigre" su sastavljene od 180 razmišljanja o naizgled nevažnim stvarčicama u životu koje se svakome od nas zbivaju između „velikih“, „bitnih“ i „neodgodivih“ koraka.

Te sitnice, propuštene šanse, odgođeni trenuci koji se nikada više neće ponoviti predstavljau također bitan dio života, a što smo stariji sve više žalimo za njima i kajemo se jer nismo imali vremena“ – bilo za ljubav, bilo za cvijeće, bilo za popravak zuba itd. Organizator gostovanja Zijaha Sokolovića je Udruženje mladih Bužim, pod pokroviteljstvom općine Bužim i BH Telekomu.

U Udruženju mladih Bužim kažu da im je čast i zadovoljstvo što su uzeli učešće u obilježavanju Dana općine Bužim sa svojim projektima i da su za kraj mogli podariti svojim sugrađanima smijeh koji je svima tako potreban u svakodnevnom životu. Reakcija publike nakon odigrane predstave bila je izuzetno pozitivna i premašila je sva očekivanja, što najbolje svjedoči višeminutni aplauz na kraju predstave.



Promocija knjige „I ja sam iz Srebrenice“

U organizaciji Udruženja mladih Bužim je održana promocija knjige „I ja sam iz Srebrenice“ autora Fikreta Hodžića. Pored autora, o knjizi su kao promotori govorili gđin. Senad ef. Aljić i Sead Emrić, referent za kulturu načelnika općine Bužim. Knjiga „I ja sam iz Srebrenice“ je nastajala dvije godine, a autor se kroz knjigu prisjeća svega što je proživio u vremenu agresije na BiH. „Knjiga je način kako da se zahvalim svojim roditeljima, iako ne postoji dovoljno velik čin kojim se mogu njima zahvaliti, kroz knjigu sam htio da kažem svim mladim ljudima da upornošću, radom i zalaganjem mogu da ostvare svoje ciljeve u životu. Želim da ovaj rukopis bude vjetar u leđa svim mladim ljudima, da im pomogne u savladavanju životnih poteškoća“, kazao je Hodžić.

Promociju recitatima iz knjige „I ja sam iz Srebrenice“ su uljepšale Lejla Šahinović i Belmina Isaković. Na kraju promocije članovi UMB-a su Fikretu Hodžić poklonili knjigu „Bužim kroz vrijeme“, ističući da saradnju sa njim planiraju nastaviti.



Počelo snimanje filma o općini Bužim

Na bužimskom izletištu „Svetinja“ počelo snimanje promotivno - dokumentarnog filma o općini Bužim. Udruženje mladih Bužim će provoditi ovaj projekat i na jednom mjestu skupiti i prezentirati sve informacije o resursima, ljepotama i mogućnostima općine Bužim, te na takav način predstaviti općinu Bužim turistima, investitorima i drugim zainteresiranim stranama.

Snimanje filma će raditi bužimljanin Sulejman Muratović sa stručnim timom, a cjelokupan projekat realizira Udruženje mladih Bužim. Projekat će biti proveden dvije godine, a snimanje filma bi trebalo završiti u proljeće 2015. godine. Sulejman Muratović i njegov tim već imaju iskustva u ovakvim projektima i ne sumnjamo da će film biti više nego odličan.

Pokrovitelj cjelokupnog projekta je Općina Bužim i općinski načelnik Agan Bunić.





Posjeta načelnika općine Bužim bratskoj općini Altinova u R. Turskoj

Na službeni poziv bratske općine Altinova iz Republike Turske delegacija općine Bužim je obavila službenu i radnu posjetu. Delegacija općine, na čelu s općinskim načelnikom Aganom Bunićem, je u toku trodnevnog boravka u općini Altinova imala niz službenih protokola, sastanaka i prijema, te je prisustvovala Kulturnom festivalu bratske općine. Prvi radni sastanak održan je u kabinetu općinskog načelnika općine Altinova dr. Metinom Oralom i njegovih saradnika, na kojem je dogovorena obostrana saradnja, jačanje bratskih odnosa, te konkretni projekti koje će navedene općine zajednički realizirati.

U kasnijem protokolu održan je prijem i radni sastanak sa Mr. Nurullah Kaya koji obavlja funkciju Kaymakamu Altinova (Guverner Altinove). Jedan od konkretnih projekata, za koji je zainteresirana bratska općine iz Turske jeste početak izgradnje Islamskog kulturnog centra u Bužimu, čiji je investitor Medžlis IZ Bužim, te je Općinski načelnik dr. Metin Oral obećao konkretnu pomoć u realizaciji ovog značajnog projekta. Bilo je riječi i o realizaciji drugih projekata koje vode ove dvije općine, posebno je naglašena izgradnja zelenih površina i parkova, u čijem dijelu je općina Altinova lider u proiz-

vodnji cvijeća i ukrasnog bilja, jer ista ima oko 20 firmi koje se bave ovim poslom, i samo u tom sektoru imaju zaposlenih oko 500 radnika. Očekuje se da u narednom periodu ove dvije općine realiziraju u Bužimu jedan projekat uređenje zelenih površina, o čemu je bilo riječi na radnim sastancima delegacija bratskih općina.

Općinskom načelniku Bužima je ukazana čast da se obrati na svečanom otvorenju Kulturnog festivala općine Altinova, pred nekoliko hiljada građana ove općine, i većeg broja Bošnjaka koji žive u ovoj općini.





„Sretni smo što smo danas ovdje s vama, puno je razloga što smo ovdje. Hvala Vam na pozivu u ime naroda Bužima, delegacije i moje lično ime. Jedan od razloga naše posjete jeste da vašem načelniku čestitamo na ponovnom izboru za prvog čovjeka općine Altinova, da čestima AK Partiji i njenom lideru R.T. Erdoganu na pobjedi na lokalnim izborima. Drugi razlog jeste da se zahvalim na podršci i pomoći Turske narodu BiH koju godinama pružaju, posebno zadnjoj podršci narodu BiH u poplavljenim područjima. Ovdje smo danas da izrazimo zadovoljstvo zbog razvoja koji Turska bilježi u svakom pogledu. Ove zastave koje se vide diljem vaše države su postale simbol pravde, razvoja i prosperiteta, zbog toga smo posebno sretni. Na kraju želim uputiti dovu za nekoliko stvari, prije svega da nastupajući mjesec Ramazan ispostimo u miru, zdravlju i bereketu. Da AK Partija pobjedi na predstojećim državnim izborima i da, ako Bog da, R.T. Erdogan bude budući Predsjednik R.Turske“ istekao je načelnik.

Delegaciju općine pored Općinskog načelnika su činili, predsjedavajući OV-a Abid Mulalić, zamjenik Suvad Veladžić, nekoliko vijećnika, direktora i saradnika općinskog načelnika, te manji broj privrednika općine Bužim.





Prvi zajednički „Narodni iftar“ za postače

Ramazan je mjesec čiji je početak milost, sredina oprost, a kraj rahmet. To je mjesec praštanja, razumijevanja, uvažavanja, jačanja imana a to možemo postići samo čineći dobra djela. Djela govore više od riječi, i djela su ta koja ostaju za nama. Jadna od najvećih vrata dobra i prilike za dobra djela jeste pripremanje iftara za postače. Tim povodom u organizaciji općine Bužim i Općinskog načelnika večeras je na stadionu ispred Osnovne škole „Bužim“ priređen prvi iftar za postače na otvorenom u općini Bužim pod nazivom „Narodni iftar“.

Na veliko zadovoljstvo iftaru je prisustvovalo preko 1.200 zvanica, a broj prisutni govori o važnosti i vrijednosti ovog događaja. Na pripremama su, od jutarnjih sati, veliki doprinos o organizaciji iftara dali i članovi nevladinih organizacija i to: Humanitarne organizacije „Sadaka“, Hora „Gazija“, Kulturno-umjetničkog društva „Sevdah“, te Asocijacije mladih SDA Bužim. Narodnom iftaru su pored mnogobrojnih građana, koji su izrazili zahvalnost općini Bužim i općinskom načelniku Aganu Buniću za ovakvu gestu prisustvovali i predsjedavajući općinskog vijeća Abid Mulalić, dopredsjedavajući općinskog vijeća Suvad Veladžić, nekoliko vijećnika u općinskom vijeću, zatim predsjedavajući Skupštine u Vladi Unsko-sanskog kantona Nijaz Hušić, kantonalni zastupnici Kasim Mulalić, Esad Bašagić, Sead Kadić i Damir Hodžić. Također, pozivu na iftar su se odazvali i

predsjednik Medžlisa IZ Bužim Eniz ef. Veladžić, glavni imam Medžlisa IZ Bužim, Mehmed ef. Harčević te drugi mnogobrojni imami sa područja općine Bužim, kao i mnogi gosti i zvanice iz drugih gradova kako političkog tako i vjerskog života.

Prvi se obratio prisutnim vjernicima, postačima Eniz ef. Veladžić, predsjednik Medžlisa IZ Bužim, je podsjetio na lijepu tradiciju organiziranja zajedničkih iftara muslimana. Također, uputio je čestitke Općini i Općinskom načelniku koji su organizirali iftar, kazavši kako je ovo najveća do sada postavljena sofru u Bužimu.

„Zahvaljujem se svim postačima koji su se odazvali pozivu na prvi veliki narodni iftar, te izrazio žaljenje što nisu bili u mogućnosti prirediti iftar za više hiljada ljudi, ali će se na tome raditi u sljedećim godinama. Želim posebno da pohvalim i zahvalim se mladima, omladinskim udruženjima, te Asocijaciji FATMA, Udruženju žena „Izvor“, Asocijaciji žena SDA Bužim, koji su dali svoj doprinos na pripremi i organizaciji ovog iftara. Nadamo se da ste zadovoljni ukupnim dojmom organiziranog iftara nadajući se da će Svevišnji Bog ukabuliti i u dobra djela upisati nagradu svim onima koji su sudjelovali u organizaciji i pripremi samog iftara.“ Na kraju iftarsku dovu je proučio muftija bihački, Hasan ef. Makić, te kratko govorio o ljepoti zajedničkih iftara i ramazanskim blagodatima.“ kazao je načelnik Bunić.



Bajramska akademija u Bužimu

Medžlisa IZ Bužim i ove godine je upriličio prijem za predstavnike političkog, kulturnog života sa područja općine Bužim, članove IO Medžlisa IZ Bužim, te imame i predsjednike Džematskih odbora sa područja Medžlisa IZ Bužim. Nakon prijema i klanjanja akšam-namaza upriličena je svečana akademija u Velikoj sali JU” Centar za kulturu, sport i informisanje” Bužim koja je bila tijesna da primi sve građane općine Bužim u povodu obilježavanja Ramazanskog bajrama, najradosnijeg praznika muslimana. Svečanoj akademiji su, pored mnogobrojnih građana, prisustvovali i predstavnici državne, kantonalne i općinske vlasti, javnog, kulturnog i vjerskog života općine Bužim.

Na početku programa prisutnima se obratio glavni imam Medžlisa IZ Bužim Mehmed ef. Harčević, koji je između ostalog govorio o dobroj saradnji vjerske institucije i Općine i u to ime se zahvalio Općinskom načelniku na podršci i trudu koju pruža ovaj najstarijoj instituciji na području općine Bužim.

U svom izlaganju ef. Harčević uputio je i bajramsku poruku kazavši da čuvamo svoje porodice, živimo svoju vjeru i iznad svega volimo svoju domovinu, te pozvao na jedinstvo muslimana u ovim teški vremenima koje proživljava naš ummet.



Prisutnima se obratio i općinski načelnik Agan Bunić, koji je, između ostalog, kazao da je potrebno nastaviti sa jedinstvom kojeg su građani imali u toku ramazana, te da je to recept kako do boljeg i prosperitetnijeg Bužima.



Bogat kulturni program su uveličali bužimski horovi „Gazije“, „Tesnim“ te „Gradski ženski“ hor. Pored njih specijalni gost na svečanoj akademiji bio je nekadašnji član bužimskog hora „Gazija“ Mirsad Šehić čija je interpretacija ilahije “Dosta mi je Allah moj” oduševila prisutnu publiku. Tako su brojni gosti uživali u izvođenju ilahija i kasida, kao što su zasigurno uživali u jednoj posebnoj pjesmi u izvedbi hor „Gazija“ sa ostalim učesnicima.

Pjesma nosi naziv „Palestino, dušo čista“, za koju je tekst napisao Emin ef. Grošić, a aranžman uradio Sead Zele Lipovača, s ciljem da se iz Bužima pošalje podrška narodu Gaze koji ovih dana proživljava patnje jer nemaju priliku uživati bajramske blagodati kao svi mi muslimani širom svijeta, te je izazvala posebne emocije kod publike. Ono što ovu akademiju čini posebnom jeste zajednički nastup bužimskih horova koji su ukrasili veliku binu i ovaj događaj. Akademija je ispunila srca vjernika na prvi dan Bajrama, a program i lijep ugođaj, posjetioci su nagradili dugotrajnim aplauzima upućenim svim učesnicima akademije.





U Bužimu održana promocija Kajanove knjige “Grad velike svjetlosti”

U programu manifestacije “Slobodarski dani viteškog grada Bužima” upriličena je promocija knjige “Grad velike svjetlosti”, bosanskohercegovačkog književnika Ibrahima Kajana. “Grad velike svjetlosti – Mostarske vedute”, putopisna je knjiga koja sadrži narodne predaje, historijske podloge zbilje i lični stav pisca prema historiji. U recenziji knjige koju potpisuje Džemaludin Latić navodi se da je “*ovo knjiga o jednom važnom dijelu naše zemlje i o jednom gradu punom sunčevog i mjesječevog, ali i derviškog svjetla, o Mostaru i njegovim velikanima, o njegovom dobru, ali o zlu koje se nad njega nadvijalo ima već nekoliko stotina godina, a i danas se nadvija. A taj se grad brani gazilukom svojih junaka i svojom opjevanom ljepotom: svojim bogomoljama, tekijama, mostovima, pjesnicima, dervišima, učenjacima, ljepotica-ma, kadunama, cvijećem, kaldrmom, vodama, jezikom. Ustvari, Kajan je ispisao i putopis i ljetopis svoga grada. Otprilike kao što je to učinio Bašeskija svome Sarajevu, samo malo drukčije, raskošnije, raspjevanije. Ovo je velika knjiga bošnjačke i bosanskohercegovačke književnosti, nezaobilazna za naše ukupno pamćenje!*” “Grad velike svjetlosti” posljednje je djelo mostarskog pisca. Kajan je do sada nagrađivan nekoliko puta za svoje životne uretke, a najznačajnije nagrade su: Nagrada “Antun Bran-

ko Šimić” za zbirku pjesama Kuću dok nađeš (Zagreb, 1973), Nagrada “Planjaja” za najbolju knjigu pjesama objavljenu u BiH 2002 (Druga bajka), Nagrada “Zlatno pero” za najbolji dramski tekst bh. autora izveden na 20. susretima pozorišta BiH u Brčkom 2003. za Katarinu Kosaču, Nominacija za međunarodnu nagradu “Mali princ” za zbirku pjesama Osmijeh koji je pobjegao, Nagrada za najbolji izvedeni bh. dramski tekst na Festivalu bh. drame za tekst Katarina Kosača, u izvođenju Sarajevskog ratnog teatra “SARTR” Sarajevo, u Zenici 2005. Načelnik općine Bužim Agan Bunić, Kajanu je uručio sliku kao znak zahvalnosti na učešću u programu “Slobodarskih dana viteškog grada Bužima”.





Promoviran Zbornik radova iz oblasti obrazovanja

U Bužimu je predstavljen Zbornik radova iz oblasti obrazovanja čiji su izdavači BZK "Preporod" i općina Bužim. Zbornik "Sto godina savremenog osnovnog i dvadeset godina srednjeg obrazovanja na području općine Bužim 1913 – 2013" je prema riječima urednika nastavak istraživanja kulture i obrazovanja koje se naslanja na prošlogodišnje djelo "Bužim kroz vrijeme". Urednici ovog izdanja, Amir Sijamhodžić i Haris Suljadžić, istakli su kako se radi o publikaciji koja ima za cilj da skrene pažnje na loš položaj školstva i obrazovanja u današnjem bosanskohercegovačkom društvu.



"Osnovni cilj je navedena izlaganja, odnosno stručne i naučne referati koje donosi Zbornik u što većoj mjeri prezentirati učenicima, studentima i nastavnicima, te ostalim zainteresiranim građanima", istakao je Sijamhodžić.

Zbornik radova ima 216 stranica i podijeljen je na šest poglavlja. Ima dvanaest stručnih i naučnih radova, šest na temu "Osnovnoškolska i srednjoškolska tradicija na području općine Bužim" i šest na temu "Zahtjevi odgojno-obrazovne reforme u Bosni i Hercegovini". Zbornik je obogaćen i s 39 učeničkih likovnih i literarnih radova, jednim kritičkim osvrtom na dvije izložbe te fotografijama starih i novih školskih objekata na području općine Bužim. Dizajn Zbornika djelo je Nermina Nine Kasupovića.

Sijamhodžić se već nekoliko godina bavi istraživanjem historije, kulture i obrazovanja na području općine Bužim. On je u svom obraćanju naglasio da je, kao autor monografije "Bužim kroz vrijeme", već niz godina istaživao historiju obrazovanja na prostoru općine Bužim. Iznio je niz novih saznanja, koja su istražena nakon prošlogodišnjeg naučnog skupa, a koja jasno ukazuju da je prva moderna osnovna škola na prostoru općine Bužim ipak osnovana 1912. godine, a ne kako se ranije mislilo 1913. godine. Publici je predstavio austrougarski projekat za izgradnju osnovne škole u Bužimu, čiju gradnju je spriječio Prvi svjetski rat. U temeljitom i opširnom kritičkom osvrtu profesorica Elvira Islamović je dala stručni presjek svih poglavlja naglašavajući da ali i umjetničkih kritičara.



ali i umjetničkih kritičara. Također, ona je istakla da je zbornik tematski podjeljen na dvije cjeline, što se jasno može iščitati iz naslova zbornika. Prva cjelina odnosi se na osnovnoškolsku i srednjoškolsku tradiciju na prostoru općine Bužim, koja je najviše tretirana kroz drugo poglavlje zbornika. Druga i obimnija tematska cjelina odnosi se na zahtjeve odgojno-obrazovne reforme u Bosni i Hercegovini, koja je tretirana kroz treće poglavlje. U njemu se nalazi šest članaka naučnih radnika (dr. Izeta Pehlića, dr. Senadina Lavića, dr. Huseina Muratovića, dr. Huseina Nanića, dr. Rašida Durića i mr. Rifeta Šahinovića). Također, posebno je naglasila i pohvalila peto poglavlje zbornika u kojem je uredništvo dalo prostora učenicima bužimskih škola, gdje su objedinjeni njihovi najbolji likovni i literarni radovi.

“U današnje vrijeme kada se sve više ističe da su učenici zanemareni u školama, urednici su pokazali da nije tako. Opet su i sami učenici kroz svoje riječi i slike prenijeli mnoge važne poruke starijima”, istakla je na promociji dr. Islamović. Mr. Rifet Šahinović naglasio je kako se radi o vrlo kvalitetnom zborniku te da je on značajan ne samo za općinu Bužim nego i šire. *“Pisana riječ nikada neće izgubiti na vrijednosti i knjigu nikad ništa neće moći zamijeniti. Iz tog razloga zbornik posvećen školstvu i obrazovanju ne može biti zanemaren i njegova vrijednost će godinama biti sve veća”,* istakao je prof. Šahinović.

Profesor Šahinović je pohvalio veliko pregalaštvo i entuzijazam tima ljudi na čelu sa predsjednikom bužimskog Preporoda Muhamedom Kržalićem, a koji su dugo vremena radili na realizaciji ovog projekta. Haris Suljadžić, jedan od urednika Zbornika, uputio je i prijedlog da se zajedničkim snagama kroz naučne skupove pokuša kreirati zbornik radova koji bi objedinio radove na temu obrazovne strategije za narednih sto godina (2013-2113.) Promociju su kao generalni sponzori podržali Općina Bužim, Wiseman Institut iz Sidneja, Mješovita srednja škola “Bužim”, Medžlis IZ Bužim, firme Kov-Grad d.o.o. Bužim i Ben-Mal Group d.o.o.



Delegacija općine Bužim uveličala manifestaciju u Linzu

Džemat „Đerzelez Alija i Hrnjica Mujo“ Linz, organizirao je drugu tradicionalnu manifestaciju pod nazivom „Veče ilahija i kasida“. U samom programu su učestvovala i dva hora iz općine Bužim, Gazije i Tesnim. Delegaciju Općine Bužim na čelu sa općinskim načelnikom Aganom Bunićem su činili i predsjedavajući općinskog vijeća Abid Mulalić, te direktor JU “Centar za kulturu, sport i informisanje“ Bužim, Mersudin Nanić. A delegaciju ispred Medžisa Islamske zajednice Bužim činili su predsjednik Eniz Veladžić te predsjednik „Ilmije“ Bužim Emin ef. Grošić.



„Puno je posla u našim lokalnim zajednicama, nema skoro niti jednog projekta na području Općine Bužim, a da naša dijaspora ne učestvuje lično svojim sredstvima u tom projektu. I zbog toga sam posebno ponosan i sretan. Jedan projekat koji je posebno značajan za našu općinu, jeste izgradnja „Islamskog kulturnog centra“. Kao vaš načelnik pozivam sebe i vas da se svi uključimo i ugradimo u ovu akciju i postanemo vakifi ovog hairli projekta. Vi ste do sada gradili zajedno sa nama sve džamije koje su se radile na području, ne samo naše općine nego cijele naše države“ kazao je načelnik Bunić u svom obraćanju.



Hor „Gazije“ koncertom u Bužimu otpočele turneju

Hor duhovne muzike „Gazija“ iz Bužima koncertom su otpočeli turneju po gradovima Unsko-sanskog kantona, a nakon nje će uslijediti turneja po dijaspori. Građani Bužima su mogli uživati u izvedbama duhovne muzike ali i sevdalinki. Specijalni gost „Gazija“ na koncertu bio je Sinanudin ef. Bajrić, izvođač ilahija, a koji će u ujedno pratiti „Gazije“ na pomenutoj turneji.

Inače, planirana turneja uvod je za novi materijal „Gazija“ za koji će prije objavljivanja biti snimljen i spot. Hor „Gazija“ osnovan je 1992. godine, a kao registrirano udruženje funkcionira od 2006. godine. Učesnici su svih velikih vjerskih koncerata kakav je „Moj Ummete“, „Mošus Pejgamberov“, „Dova za Gazu“ i druge. Bosnu i Hercegovinu su predstavljali na manifestaciji duhovne muzike „Istanbul, kulturni grad Evrope 2010“ u Turskoj. Dobitnici su brojnih priznanja, a svoj procvat su doživjeli 2009. godine kad su objavili svoj prvi CD pod nazivom „Džennetska hurija“ u produkciji „Hayat“, za koji je aranžmane radio poznati Zele Lipovača, a tekstove Emin Grošić.

Mnogi su kritičari ovaj CD ocijenili jednim od najboljih snimljenih materijala duhovne muzike na ovom području. Hor „Gazija“ osnovan je s ciljem promoviranja kulturoloških, vjerskih i tradicijskih vrijednosti Bošnjaka. Trenutno okuplja 20 članova, a od osnivanja horom je prodefiliralo više od 150 članova.





Drugo bužimsko književno kazivanje

U sklopu manifestacije „Slobodarski dani viteškog grada Bužima“ u Velikoj sali Centra za kulturu, sport i informisanje održano je Drugo bužimsko književno kazivanje. Bila je to prilika za mlade bužimske pisce da publici prezentiraju svoje književno stvaralaštvo. Uvodničar je bio Sead Emrić, referent za kulturu općine Bužim, koji je između ostalog naveo da je kulturni život općine Bužim u usponu što govori činjenica da su svi sadržaji iz oblasti kulture popraćeni od strane publike.

U Drugom bužimskom književnom kazivanju učestvovali su: Balkić Fehima, Dževad Ponjević, Sabira Bećirević, Amir Sijamhodžić, Emin Grošić, Nedžib Vučelj, Haris Suljadžić, Rijalda Dizdarević i Lejla Šahinović. Svim učesnicima Drugog bužimskog kazivanja, ali i učesnicima prethodnih kulturnih događaja, općina Bužim je isplatila i novčanu nagradu. Emrić je istakao kako je općina Bužim jedina općina u državi koja na ovakav način pomaže rad svojih umjetnika.

Na kraju, u ime svih umjetnika općine Bužim, referent za kulturu i poznati likovni umjetnik Sead Emrić je u znak zahvalnosti i dobre saradnje načelniku općine Bužim Aganu Buniću poklonio svoje djelo iz ciklusa Znakovi Bosne, a koje je ove godine izlagano u Sao Paulu na svjetskoj izložbi.





U Bužimu održana Smotra horskog stvaralaštva

Gradski ženski hor „Bužim“ već tradicionalno organizira Smotru horskog stvaralaštva, koja je ove godine tokom dvije večeri publici u Velikoj sali bužimskog Kulturnog centra predstavilo nekoliko horova sa područja Unsko-sanskog kantona i susjedne Republike Hrvatske. Ovogodišnja je Smotra nadmašila prethodne i po kvaliteti i po organizaciji cijele manifestacije, kao rijetkom kulturnom događaju kojem u osnovi leži ljubav prema horskom i izvornom pjevanju, ali i prema druženju i prijateljstvu. Kvaliteta se očitovala u vrlo dobrim izvedbama a capella, odličnoj uvježbanosti, ujednačenosti izvedbi.

Organizacijski napredak je bio više nego očit, unaprijed štampani i objavljeni programi, plakat, organizirano TV-snimanje, osigurane osobe za kontakt sa horovima koje su uklonile moguće nesnalaženje gostiju, organizirano druženje uz večeru, muziku i ples za sve horove. Posebnu kvalitetu Smotri daje veliki odaziv građana i njezino reagiranje na kvalitetne izvedbe bez obzira iz kojeg je hor mjesta. I tu se osjeća napredak, što znači da i ova Smotra horova obavlja i svoju edukativnu ulogu, tj. stvara novu publiku zainteresiranu za ovaj tip kulturnog događanja. Gradski ženski hor „Bužim“ okuplja muzičke entuzijaste kojima je pjevanje velika ljubav i potreba. Postoji od 2007. godine. Uz mnogo rada, truda

i ljubavi prema pjevanju članice hora postižu zapažene rezultate i uspješno predstavljaju općinu Bužim na svim manifestacijama širom Bosne i Hercegovine i inostranstvu. U Gradskom ženskom horu dolaze samo zaljubljenici u pjevanje, od mašinskih radnika, pravnika, ekonomista, nastavnika, medicinskih radnika dakle različite stručne spreme i pri tom, velika većina njih su muzički neobrazovani i uče pjevanje po sluhu.

Kao ljudi možemo da budemo istovremeno i dobri i loši, kao Općina istovremeno možemo da budemo i velika ili mala, ali kao amateri jednom možemo da dospijemo profesionalni nivo.

Način na koji izvode kompozicije, zahtjevne i za profesionalne horove, izvode članovi Gradskog ženskog hora „Bužim“, uvidjeli ste do sada da je daleko od amaterizma i hobija. Prolazeći čaršijom obidimo ih ponekad, poslušajmo ih, i oni su naši sugrađani, koje treba pomoći i podržati u svakom pogledu, jer potreba žena za pjevanjem i ljubav prema horu toliko je jaka da prevazilazi sve poteškoće sa kojima se danas susreću.

Na kraju želimo čestitati svim učesnicima na nastupu i intrepertaciji pjesama kojima su pokazali da su najbolji promotori gradova iz kojih dolaze, te želimo Gradskom ženskom horu „Bužim“ puno uspjeha u daljnjem radu.



Klub sjedeće odbojke Bužim u prvoj ligi BiH

Načelnik općine Bužim sa svojim najbližim saradnicima primio je Klub sjedeće odbojke Bužim na svečani prijem povodom ulaska u Prvu ligu Bosne i Hercegovine. U današnje vrijeme teško je ostvariti bilo kakav uspjeh, bilo kakav pomak na sportskom polju, međutim sa Klubom sjedeće odbojke „Bužim“ to nije slučaj, jer već godinama vrijedno rade i treniraju te možemo slobodno kazati da se upornost i isplatila ulaskom u najelitniju ligu takmičenja sjedeće odbojke u Bosne i Hercegovine, a to je zasigurno Prva liga Bosne i Hercegovine.

U razgovoru je izražena spremnost da igrači i uprava učine sve da predstojeća prvoligaška sezona ne bude tek kratki izlet u društvu najboljih, nego da Klub sjedeće odbojke Bužim zauzme poziciju u sredini tabele i pokaže da ima kvalitet koji omogućava solidan plasman u Ligi. Tom prilikom, načelnik Bunić čestitao je na postignutom uspjehu igračima i Upravi Kluba što su s ponosom predstavljali općinu Bužim gdje god su igrali.

„Bez obzira na skroman budžet Općine i u narednom periodu namjeravamo podržavati ovaj uspješni sportski kolektiv koliko god to bude moguće i naravno svi zajedno trebamo stati iza projekta igranja Kluba u najjačoj ligi u Državi i pomoći za pronalazak finansijskih sredstava“, kazao je načelnik Bunić.

Načelnik Bunić je uručio je skromnu nagradu za ulazak u Prvu ligu kako bi na kraju proslavili uspješnu sezonu, titulu povodom ulaska u Prvu ligu kao i finansijsku pomoć Klubu kako bi se prevazišle trenutne materijalne teškoće i pružila podrška u pripremnom periodu pred odigravanje prvih prvoligaških utakmica.





Biciklisti startali u Bužimu za prvaka Bosne i Hercegovine u biciklizmu

U Viteškom gradu Bužimu, startala je utrka državnog prvenstva u cestovnom biciklizmu, pod nazivom „Cestovno Prvenstvo Bosne i Hercegovine“ za 2014. godinu. Organizator „Cestovnog Prvenstva bosne i Hercegovine“ bio je Biciklistički klub „KRAJINA“ iz Cazina i Biciklistički Savez Bosne i Hercegovine, a suorganizator je Biciklistički klub „Bužim“. Generalni sponzor Prvenstva Bosne i Hercegovine po drugi put je općina Bužim i njen načelnik Agan Bunić. Za Prvenstvo Bosne i Hercegovine prijavilo se i borilo za titulu Državnog prvaka ukupno 80 takmičara u sljedećim kategorijama: seniori/elite, U-23, juniori, kadeti, mlađi kadeti, veterani do 55 godina starosti i žene.

„Zadovoljstvo nam je da Vas po drugi put zaredom možemo ugostiti u našoj općini, i poželjeti dobrodošlicu. Ovo je pokazatelj da naša općina nastoj da bude dio svih sportskih saržaja pa tako i biciklizma, što će biti praksa i u narednom periodu. Želim vam puno sreće i uspjeha i neka najbolji i najspremniji pobijedi.“ kazao je predsjedavajući općinskog vijeća Abid Mulalić.





Sabahudin Topalbećirević u posjeti općini Bužim

U prostorijama općine Bužim načelnik Agan Bunić sa saradnicima ugostio je poznatog bosanskohercegovačkog sportskog novinara Sabahudina Topalbećirevića zvanog Bahu. Prijemu je prisustvovao i direktor JU „Centar za kulturu, sport i informisanje“, Mersudin Nanić, predsjednik NK „Vitez“, Rifet Šahinović kao i trener NK „Vitez“, Edham Eminić. O Sabahudinu Topalbećireviću ne trebamo puno govoriti, sjetimo se samo utakmica reprezentacije i gledanje ispred malih ekrana, moramo se uvijek sjetiti našeg kralja komentaranja. Svi znamo koliko je lijepo bilo gledati utakmicu reprezentacije BiH uz komentar Sabahudina Topalbećirevića.

Načelnik Bunić upoznao je gosta sa razvojnim mogućnostima općine Bužim i prezentirao prirodne potencijale kojima ova lokalna zajednica raspolaže, bilo je govora i o sportu jer posebne potrebe se izkazuju u obezbjeđivanju sportske infrastrukture, odnosno izgradnje sportske dvorane i igrališta. Također je istaknut rad 20 aktivnih sportskih kolektiva koji ostvaruju vrhunske rezultate na svim nivoima takmičenja, a još uvijek nemaju minimalne uvjete za rad. Na kraju prijema kao znak pažnje načelnik Bunić uručio prigodne poklone bosanskohercegovačkom novinaru općine Bužim, monografiju „Bužim kroz vrijeme“ i monografiju OFK „Bratstvo“ i NK „Vitez“.



Bužimsko dijete potpisalo za austrijski SC Kalsdorf

Talentirani i mladi bosanskohercegovački nogometaš Amar Šahinović potpisao je ugovor za austrijski SC Kalsdorf koji igra u trećoj austrijskoj ligi. Mladi Bužimljanin Amar Šahinović potpisao je ugovor sa austrijskim trećeligašem SC Kalsdorfom na godinu i po.

“Uslovima sam zadovoljan, potpisao sam na godinu i po, i vjerujem da će klub mojim dolaskom ostvariti napredak u svakom smisli riječi. Trenutno smo na 14. na tabeli ali se nadam da ćemo do kraja sezone ostvariti pomak ka vrhu tabele. Do kraja ove sezone nerealno je da se borimo za drugu ligu, ali iduću sezonu ništa nije isključeno jer su prošlu završili na četvrtom mjestu”, istakao je nakon potpisivanja ugovora Šahinović.

SC Kalsdorf, klub iz Graza, nedavno je u ÖFB Kupu iz takmičenja izbacio bečku Austriju koja trenutno igra u Ligi prvaka. “Za svoje ‘uspjehe’ moram zahvaliti najviše dragom Bogu, zatim porodici, užoj i široj, prijateljima i svim trenerima koji su mi pružali ogromnu podršku kroz ove godine mukotrpnog rada”, istakao je Šahinović.

Mladi fudbaler iz Bužima kaže kako je potpisivanjem profesionalnog ugovora ostvario jednu od svojih želja.

“Mnogo je želja u karijeri, ne mogu nijednu posebno izdvojiti, ali eto počele su se hvala Bogu ostvarivati jedna po jedna. Jedna od njih je potpisivanje profesionalnog ugovora, ako Bog da, nastupi za reprezentaciju jednog dana i meni najdraži klub Arsenal”, istakao je Šahinović.

Šahinović je prije potpisivanja igrao za mlađe kategorije Fudbalskog kluba Sarajevo, a nogometnu karijeru započeo je u Nogometnom klubu „Vitez“ iz Bužima.



Završen najposjećeniji tradicionalni malonogometni turnir u BiH “Ljuti krajišnici” ljutim pobjedama do titule

Završen 18. malonogometni turnir „Izet Nanić 2014“ na kojem je učestvovalo u kategoriji U-12 četiri (4) ekipe, u kategoriji U-14 jedanaest (11) ekipa i u kategoriji seniora šezdeset i jedna (61) ekipa podijeljene u šesnaest takmičarskih grupa i koje su sadržavale 13 grupa sa po 4 ekipe i 3 grupe sa po 3 ekipe. Iz svake grupe dalje su išle dvije najbolje ekipe, gdje smo dobili 1/16 finala, nakon toga 1/8, 1/4, 1/2 i na kraju dvije najbolje ekipe ovogodišnjeg malonogometnog turnira „Izet Nanić 2014“, a to su ekipe: “Ljuti Krajišnici” i Pekara “Zlatno Zrno”.

Prije samog početka finalne utakmice općinski načelnik Agan Bunić je uručio plaketu, fotomonografiju 505. i poklon (sat) sa posvetom iz Bužima za nesebičan doprinos na Memorijalnom malonogometnom turniru Izet Nanić 2014. ponajboljem bosanskohercegovačkom sudcu Hasanu Brkiću. Također, je Abid Mulalić, predsjednik Organizacionog odbora manifestacije Slobodarski dana viteškog grada Bužima 2014. uručio ostalim sudcima, Esmiru Čauševiću, Izetu Veladžiću, Adisu Naniću i Aladinu Kudeliću plaketu na nesebičnom doprinosu u realizaciji Memorijalnog malonogometnog turnira Izet Nanić 2014. Finalnu utakmicu U-12 kategorije su odigrale ekipe Bućevci – Englomer.





Bolja je bila ekipa Bućevci rezultatom 3:1. Treće mjesto je bila ekipa Banana Joks. U kategoriji U-14 u finalnoj utakmici snage su odmjerili Mramor Bužim i Serbula Jezerski. Pobjedu je odnijela ekipa Mramor, rezultatom 6:2. Treće mjesto je Farma Cinac. Utakmicu za 3. mjesto seniorske kategorije odigrale su ekipe Mramor Bužim i Auto otpad Solo Piljužići, a slavila je ekipa Mramora rezultatom 4:2. U velikom finalu, sastale su se, sigurno dvije najbolje ekipe turnira, Ljuti krajišnici – Peka-
ra Zlatno zrno. U vrlo zanimljivoj utakmici, pobjedu je odnijela ekipa Ljuti Krajišnici, rezultatom 4:1, i tako postala šampion ovogodišnjeg turnira “Izet Nanić 2014.”

Na turniru je ukupno učestvovalo sedamdeset i šest (76) ekipa u sve tri kategorije. Odigrano je ukupno 114 utakmica, u kojima je nastupilo 493 igrača i postignuto je 434 pogodaka, dodjeljeno je 4 crvena kartona i 36 isključenja na dvije minute. Ove brojke pokazuju da i ove godine Memorijalni malonogometni turnir Izet Nanić spada u jedan od prepoznatljiviji turnira po broju učesnika i svakako jedan je od najposjećeniji turnira i najveće sportsko takmičenje ne samo u Bužimu već i na području čitave BiH. Pe-
har pobjedniku i nagradu drugoplasiranoj ekipi uručio je načelnik općine Bužim Agan Bunić.





Proглаšeni najbolji sportisti općine Bužim za 2013. godinu

U sklopu manifestacije Dani općine Bužim, u Velikoj sali JU „Centra za kulturu, sport i informisanje“ Bužim, održana je svečanost proglašenja najuspješnijih sportista i sportskih radnika općine Bužim za 2013. godinu, u organizaciji Sportskog saveza općine Bužim. Ispred organizatora, Sportskog saveza Bužim, prisutnima se obratio predsjednik Saveza Admir Sijamhodžić, koji je prisutnima govorio o protekloj godini i aktivnostima koje je Savez i njegove članice provodili. U prisustvu načelnika općine Bužim Agana Bunića, predsjedavajućeg općinskog vijeća Abida Mulalića, kantonalnog zastupnika Kasima Mulalića i mnogih ličnosti iz sportskog i kulturnog života u prepunoj Velikoj sali dodijeljena su sportska priznanja najuspješnijim u kalendarskoj 2013. godini.

„Načelnik u svom je obraćanju kazao da će se Općina Bužim u budućem periodu više baviti razvojem sportske infrastrukture. Kazao je kako je završen i novi projekat za sportsku dvoranu, jer je raniji bio nerealan i iznosio je preko 6 miliona, za razliku od novog projekta prema kojem bi izgradnja sportske dvorane koštala do 1 milion i 300 hiljada KM. Također, kazao kako će ovogodišnji sportista godine, ali i budući, dobiti prigodnu novčanu nagradu od općine Bužim, i da će to biti praksa, bar za vrijeme

njegovog mandata, - kazao je načelnik Bunić.

Prisutnima se obratio i predsjednik Kantonalno sportskog saveza, Emir Dautović, čestitao je sportistima, te kazao kako je oduševljen izgledom nove Velike sale, kazavši da će se sljedeći kantonalni izbor sportiste godine održati upravo u Bužimu, u Velikoj sali JU „Centra za kulturu sport i informisanje“ Bužim.

Najbolji sportista općine Bužim u ovoj godini je proglašen Haris Skenderović, član Taekwando kluba „Fadil Bajrektarević-Gazija“.



NAJUSPJEŠNIJI U 2013. GODINI

Sa nagradama se krenulo od „Specijalnih priznanje Sportskog saveza općine Bužim za razvoj i popularizacije sporta na području općine Bužim i šire“, tako da su priznaja uručena Samir Šahinović, Jasmin Šahinović, Šefik Veladžić, Šefkija Skenderović-Buha, Šefko Tukar, Husein Krupić, Hasan Ramić, Kemo Dizdarević, NK „Bratstvo-Veterani“, OK Bužim.

U kategoriji „Posebna priznanja“ dodijeljeno je sedam-naset priznanja. Poseba priznanja su uručena mladim sportistima, sportske perspektive Adić Mehić, Mehmed Krupić, Amila Skenderović, Nail Tahić, Hasan Begović, Adna Muratović, Bekira Nanić, Ema Ramić, Ena Isaković, Aid Isaković, Sara Čatić, Davud Čatić, Ilhan Elkasović, Edna Mustafić, Amina Dedić, Amila Šahinović i Anes Cinac. Također posebna priznanja za ženske i muške sportiste uzrasta 15-17 godina dobili su Berina Krupić, Taekwando klub „Fadil Bajrektarević-Gazija“ i Muamer Isaković, OK Bužim.

U kategoriji „Sport za invalidna lica“. Najuspješniji sportista u muškoj konkurenciji proglašen je Amir Ćosić, Ribarska sekcija SSRI, najuspješnija ekipa u muškoj konkurenciji Ribarska sekcija, SSRI, najuspješniji trener u ovoj kategoriji je Amel Čatić KSO, i najuspješniji sportski radnik Nijaz Isaković KSO-SSRI. Kategorija „Školski sport“.

Najuspješnija sportašica-učenica u školskom sportu je Amila Makić, Osnovne škola Konjodor i sportaš-učenik iz Osnovne škole Bužim Samir Šahinović. A za najuspješniju sportašicu-učenicu u školskom sportu proglašena je Vedina Ičanović, Srednja škole Bužim i sportaš-učenik Kenan Mulalić.

Za najuspješnijeg pedagoga tjelšenog i zdravstvenog odgoja u ovoj kategoriji proglašen je Ismet Paloš iz Mješovite srednje škole Bužim, te najuspješnija sekcija u školskom sportu srednje škole je Stonoteniska sekcija MSŠ Bužim. Imamo i kategoriju „Posebna priznanja SSOB“. Posebno priznanje u loptačkim sportovima uručena su Cinac Nedim OK. Bužim, borilačkim sportovima Nejra Bajrektarević, borilačkim sportovima Šemsudin Alešević, Taekwando klub „Fadil Bajrektarević-Gazija“ i u ostalim sportovima Samir Kišmetović.

Za najuspješnijeg sportskog radnika proglašen je Edin Mulalić, OK Bužim, a za najuspješnijig trenera Amir Tahić, Taekwando klub „Fadil Bajrektarević-Gazija“. Za najuspješniju ekipu u muškoj konkurenciji proglašena je ekipa „Odbojkaškog kluba Bužim“, a najuspješnija žens-

ka ekipa u ženskoj konkurenciji je zasigurno „Ženski odbojkaški klub Bužim“.

Najuspješnijeg kadet u 2013. godini proglašen je Davud Dedić, „Karate klub Bužim“, dok je za najuspješniju kadetkinja proglašena Medina Tahić, iz kluba „Ženskog odbojkaškog kluba Bužim“.

Najuspješniji juniori su Rifet Alešević, Taekwando klub „Fadil Bajrektarević-Gazija“, a najuspješnija juniorka Edinu Mulalić, „Ženski odbojkaški klub Bužim“. Najuspješniji sportista u muškoj konkurenciji u 2013. godini Sportski savez općine Bužim odlučio se bez imalo dvojbe za Adema Krupića, Taekwando klub „Fadil Bajrektarević-Gazija“, a u ženskoj konkurenciji Najla Krupić, također član Taekwando klub „Fadil Bajrektarević-Gazija“.





Bužimljani osvojili srebro i bronzu u Sloveniji

U organizaciji Slovenskog taekwondo saveza, u Velenju je održano otvoreno prvenstvo taekwondo turnira. Na turniru je nastupilo 350 takmičara, iz 10-tak zemalja. Taekwondo klub „Hamza“ je na ovom takmičenju nastupio sa šest takmičara. Osvojene su četiri medalje brončane i jedna srebrna, te jedan plasman od 5-8 mjesta. Izvrstan nastup pokazao je Edin Vučelj u svojoj kategoriji gdje je već u prvoj borbi na pod poslao aktuelnog evropskog prvaka iz Bugarske. Nakon odlične prve borbe našem borcu smiješilo se zlato. Edin je ušao u finale, bio je motivisan da pokaže kako mu je mjesto u samom svjetskom vrhu ali nažalost nije se uspio okititi zlatnom medaljom zbog pristrasnih sudija koji su svojim nepromišljenim odlukama i oduzeli našem ponajboljem borcu zasluženu zlatnu medalju.

Moramo biti ponosni na naše takmičare i zasigurno na najbolji mogući način predstavljali su Općinu Bužim na jednom ovakvom velikom takmičenju i ovim rezultatima su samo potvrdili zašto su najbolji u svojim kategorijama za 2014. godinu. Našem Taekwondo klubu „Hamza“ želimo puno sreće, zdravlja i uspjeha u novoj 2015. godini, da budete još bolji nego što ste bili, odlučniji, hrabriji i uporniji, te da pokažete da ovakav mali klub ima odlične sportaše.





Svečano obilježen 20. februar–Dan općine Bužim

Obilježavanje 19. godišnjice ponovnog dobijanja statusa općine započelo je prijemom zvanica u zgradi općine Bužim, a nakon toga obilaskom i polaganjem cvijeća na turbetu generala Izeta Nanića i poginulih boraca 505. Viteške brigade, otvaranjem savremene Velike sale „Centra za kulturu, sport i informisanje“ Bužim, te održavanjem Svečane sjednice općinskog vijeća Bužim, a u prisustvu brojnih gostiju i zvanica. Okupljenima se obratio i Abid Mulalić, koji je govorio u ime Općinskog vijeća.

„Na samom početku da kažem da je ovo šesti saziv Općinskog vijeća, konstituisano nakon održanih lokalnih izbora 2012. godine. Želim naglasiti da je skupno usvojeno 169 raznih upravnih akata, od toga 102 odluke, 41 zaključak, 15 rješenja i 11 ostalih akata. Svim građanima općine Bužim upućujem iskrene čestitke povodom obilježavanja Dana općine Bužim i upućujem čestitku ovogodišnjim dobitnicima općinskih javnih priznanja“, - kazao je predsjedavajući općinskog vijeća Abid Mulalić.

Načelnik općine Bužim Agan Bunić na početku svog govora čestitajući ovaj značajan datum za općinu Bužim prisjetio se svih patriota koji su 1992. godine bili spremni stati u njenu odbranu bez obzira na žrtve. „Obilježavamo 19- tu godišnjicu od ponovnog formiranja općine Bužim, koja je specifična zbog nekoliko stvari. Dan Općine obilježavamo u novoizgrađenoj Velikoj sali našeg Centra za kulturu, i svečano je predajemo na upotrebu Vama i onima koji se bave korisnim i društvenim, bez velike priče,

presjecanja vrpce i posebnog slikanja. Svjesni smo da je u Bužimu teško socijalno stanje, imamo iste probleme kao i ostatak države, a to je velika stopa nezaposlenosti, sve su to problemi kojima se susrećemo i ulažemo ogromne napore da to i popravimo. Međutim, ima i pozitivnih dešavanja u Bužimu. Iza nas je jedna veoma uspješna godina. Godina u kojoj smo zabilježili pomake na svakom planu, tako da je prva godina mandata obilježena nastavkom izgradnje svih projekata od kapitalnog značaja za Općinu. U tim našim poslovima su nam pomogli prijatelji Bužima, oni koji su istinski željeli pomoći razvoju ove lokalne zajednice, ti naši prijatelji su dobitnici najviših općinskih priznanja, i danas su ovdje u Viteškom Bužimu. Otvorili smo vrata općine svim prijateljima, uspostavili bolju komunikaciju sa prijateljskim općinama, vladama, nevladinim organizacijama, državama i posebno našom dijasporom. Uspostavljeni su odnosi međusobnog uvažavanja između općinskog vijeća, općinskog načelnika, javnih ustanova i preduzeća, svako radi svoj posao i odraženi rezultati su već vidljivi. Trebaće nam podrška i viših organa vlasti. Cijenimo da će se odnosi nove Vlade USK-a bitno promijeniti i da ćemo biti partneri u realizaciji zacrtanih ciljeva i projekata. Za realizaciju naših projekata biće nam potrebno i jedinstvo nas Bužimljana, vjerujem da ćemo imati više snage i mudrosti da zajedno rješavamo zahtjeve onih koji su nam dali povjerenje, i očekuju od nas da zajedno više radimo u interesu svih građana. U to ime, cijenjeni sugrađani, poštovana ulemo,



gospodo borci, prosvjetni radnici, dragi univerzitetski radnici, studenti, učenici, penzioneri i uvažena dijaspora, pozivam Vas da svi zajedno gradimo bolji i ljepši Bužim. Čestitam Vam Dan općine Bužim, i neka nam živi naša jedina domovina Bosna i Hercegovina i jedina općina Bužim“, kazao je tom prilikom načelnik Bunić. Svečanosti su prisustvovali i načelnici Bihaća, Velike Kladuše, Bosanskog Petrovca, Bosanske Krupe i Ključa, kao i nekoliko poslanika u Skupštini USK, te ostali mnogobrojni gosti i zvanice sa svih nivoa vlasti, i kulturnog i vjerskog života. Povodom Dana općine Bužim na Svečanoj sjednici su dodijeljena najveća općinska priznanja i nagrade. Za značajan doprinos u razvoju općine Bužim u raznim oblastima društvenog života i rada dodijeljena je nagrada „20. FEBRUAR“ firmi LJUBIJKIĆ S-COMERC iz Bužima. A ove godine, zvanje „Počasni građanin općine Bužim“, dodijeljeno je Adilu Osmanoviću, ministru u Vladi FBiHa za doprinos u infrastrukturnom razvoju općine Bužim.

Također, dodijeljene su i plakete i zahvalnice zaslužnim pojedincima i kolektivima. Svojim muzičkim izvedbama prisutne su oduševili Ženski gradski hor Bužim i Kemal Dizdarević, interpretator sevdalinke, a po završetku sjednice prisutni su imali priliku probati i torte koje su ovom prigodom pripremile žene iz udruženje „Izvor“.





Završena manifestacija „Slobodarski dani viteškog grada Bužima 2014“

Svečanom akademijom završena 19. tradicionalna manifestacija “Slobodarski dani viteškoga grada Bužima”, kojom se obilježava 22. godišnjica osnivanja 505. viteške bužimske brigade. Svečanosti je prisustvovalo preko 15.000 građana i gostiju, a među njima je bio i predsjedavajući Predsjedništva Bosne i Hercegovine, Bakir Izetbegović, izaslanik reisul-uleme IZ u BiH, Nusret ef. Abdibegović, predstavnici političkog, vjerskog i javnog života, bivši borci i starješine. Izetbegović je po dolasku u Bužim, zajedno sa ostalim zvanicama, prisustvovala prijemu kod općinskog načelnika Agana Bunića, te održan kratak radni sastanak.

Nakon prijema, delegacija je obišla Muzej sobu 505. viteške brigade. Potom je upriličen obilazak Turbeta generala Izeta Nanića, gdje je odata počast, položeno cvijeće i proučena fatiha. Na samom početku prisutnima se obratio i predsjednik Organizacionog odbora Abid Mulalić, koji je govorio o samoj Manifestaciji, ali i čestitao Organizacionom odboru i pododborima na organizaciji Manifestacije koja je bila na zavidnom nivou.





Obraćanje predsjedavajućeg Predsjedništva BiH Bakira Izetbegovića u Bužimu na svečanoj akademiji povodom Dana 505. viteške brigade

„Dragi moji Krajišnici, dragi članovi porodica šehida i poginulih boraca, cijenjeni branioci Bosne i Hercegovine, poštovani prijatelji, uvaženi gosti, čestitam vam Dan 505. viteške bužimske brigade! U nemogućim uslovima brutalne agresije i nametnutog embarga, naš narod je, gotovo goloruk, ali uvjeren u pravednost svoje borbe, stao u odbranu svoje domovine. Sve buduće generacije patriotičke ove države pamtit će to ostvarenje. Naša borba je bila pravedna. Istina je bila naše najjače oružje. Dostojanstvo je bilo prva linija naše odbrane. Današnji dan je dan ponosa. Ali i dan tuge. Dan suosjećanja sa onima koji su izgubili svoje sinove i kćeri. Dan sjećanja na najhrabrije sinove Bosne i Hercegovine. Ratni put 505. viteške brigade je put slave i pobjeda, put nesebičnog junaštva i stradanja. 471 bužimski heroj ugradio je svoj život u temelje slobode. Njihova je vječnost. Naša je obaveza da ih ne iznevjerimo. Da Bosnu i Hercegovinu, zemlju slobodnih i ponosnih ljudi, čuvamo i očuvamo za generacije koje dolaze. Svaki put kada učim Fatihu na mezaru bosanskih heroja, poput rahmetli Izeta Nanića, pitam se jesmo li ispunili njihov emanet. Pitam se ide li Bosna i Hercegovina u pravom smjeru kojim bi oni bili zadovoljni. Puno toga je urađeno

u proteklih skoro dvije decenije. Ali, potrebno je uraditi još mnogo toga da bismo osigurali budućnost za koju su se najbolji među nama borili, i dali svoje živote.

Oni su se borili za opstanak ove zemlje u kojoj smo rođeni, za očuvanje tradicionalnih vrijednosti uz koje smo odgojeni, za ponos i dostojanstvo bosanskog čovjeka. Ni za jednu od tih vrijednosti ne možemo reći da je definitivno odbranjena i da ponovo ne može biti dovedena u pitanje. Postoje tri bitna zadatka čijim ostvarenjem ćemo najbolje ispuniti obavezu koju imamo prema našim herojima. Prvi je očuvanje cjelovitosti i teritorijalnog integriteta naše države. Svako malo nam prijete referendumima o otcjepljenju, razdruživanjem, novim podjelama, trećim entitetom. Zato hoću upravo odavdje, iz herojskog Bužima, da im jasno i glasno poručim: Od toga nema ništa! Nema referenduma, nema razdruživanja, nema novih podjela, nema trećeg entiteta. Mogu pokušati prevariti još ponekog zanesenog birača na oktobarskim izborima. Ali nas ni prevariti ni uplašiti neće. Bosna i Hercegovina je pobijedila. I uvijek će da pobijedi. Uprkos svim prošlim, sadašnjim i budućim pokušajima da je unište.



Poštovaće Bosnu i Hercegovinu, njen integritet i suverenitet. Jer ako je potcjene, ako potcjene njenu snagu, njen prkos i ponos, to će im se ponovo obiti o glavu. Ima u našem narodu izreka: "Voda odtječe, a stijena ostaje." Bosna je stijena koja se ne može razbiti. Od nju su svi njeni neprijatelji razbili glave. Dušmani ove zemlje su prolazni – kao mutna voda koja će oteći. Prolazni su oni koji pokušavaju kreirati kaos i beznađe. Za nekoliko decenija nećemo ih se više ni sjećati. Vrijeme je na strani onih koji vole ovu zemlju, onih koji grade zajedničku budućnost, onih koji rade za napredak Bosne i Hercegovine, onih koji je žele vidjeti u zajednici evropskih demokratskih država, prosperitetnu i sigurnu, pod okriljem Evropske unije i NATO saveza. Možda se ponekad čini da sve ovo traje predugo. Sve nas frustriraju stagnacija i zastoji, krize i prepirke.

To upravo i jeste cilj onih koji kreiraju te krize, taj kaos i beznađe. Oni žele da one koji ovu zemlju vole obehtrabre, da ih izmore. Budite uvjereni da se mi koji gradimo budućnost ove zemlje nikada nećemo umoriti. Niti ćemo ikada popustiti pred tim pritiscima. Mi na to nemamo pravo. Mi nemamo alternativu. Samo ćemo uložiti još veće napore da završimo posao koji smo započeli. Svi ti drski i bahati napadi na nas i našu zemlju nas samo čine jačim. Drugi zadatak je da nastavimo proces jačanja države. Kompletna državna struktura mora biti osnažena kadrovima koji su sposobni,iskusni i patriotski opredjeljeni. Paljevinu zgrade Predsjedništva i zastave Bosne i Hercegovine neće spriječiti oni koji su ratovali protiv ove države. A na čelnim pozicijama u državnim sigurnosnim agencijama skoro da i nema Bošnjaka. Zaustavljene reformske procese moramo odblokirati mudrom politikom. Nezrela, naivna i nadobudna politika je i dovela do sadašnjeg zastoja. Bog će suditi po namjerama. Istorija sudi po rezultatima. Zbog onih koji su htjeli više, svi smo dobili manje – bez obzira na njihove namjere.

Obećavali su nemoguće, zbunjivali narod, urušavali pozitivne reforme, usporili nas. Rezultati njihove vladavine suprotni su obećanjima koja su davali. Oni koji su rušeći Aprilski paket ustavnih promjena igrali na sve-ili-ništa dobili su ništa! Oni koji su bošnjačkim glasovima birali hrvatskog člana Predsjedništva obećavali su da će tako oslabiti nacionalistički koncept. Na kraju su ga samo ojačali. Pouka je jasna. Samo ozbiljna, odgovorna i zrela bošnjačka politika koja uvažava legitimne interese i prava svih u Bosni i Hercegovini može proizvesti napredak. Treći zadatak je da osiguramo održiv i pravedan ekonomski razvoj koji je u interesu sadašnjih i budućih generacija. Moramo graditi ekonomiju s više boljih radnih mjesta i većom društvenom jednakošću. U narednih osam godina mora biti kreirano 100.000 novih radnih mjesta u Bosni i Hercegovini. Tu viziju možemo ostvariti ako iskoristi-

mo prednosti koje imamo i prilike koje nam se pružaju. Imali smo 8 loših godina, 8 godina zastoja. Moramo osigurati da narednih 8 godina budu godine razvoja, napretka i prosperiteta. Svaki put kada se nađemo pred teškim dilemama trebamo se vratiti izvoru sa kojeg smo krenuli. Ono za što smo se od početka borili je dostojanstvo. Priča o našoj borbi je priča o odbrani našeg ponosa i dostojanstva. Branili smo naše pravo na život, na slobodu, jednakost i ravnopravnost. Branili smo i jačali našu državu. Stvarali smo prostor za afirmaciju naše vjere i našeg identiteta. Ta borba nije završena. Ona traje i danas. Danas je to borba protiv nezaposlenosti koja ponižava ljude, naročito mlade ljude. To je borba za uređeno društvo, državu i ekonomiju koji će pružiti istinsku šansu našoj djeci i osigurati im da žive u blagostanju.

Borba je to protiv laži i izdaje – Protiv pokušaja da se istina izvitoperi, da se istina i laž izjednače, da se svako vrijedan i zaslužan u našem narodu iskompromituje. Suočavamo se sa stotinama problema i izazova. Sto pitanja traži sto odgovora. Ali ako bismo sve te odgovore trebali svesti na jednu riječ, onda bi ta riječ bila jedinstvo. Jedinstvo Bošnjaka, jedinstvo svih patriotskih snaga u Bosni i Hercegovini. Jedinstvo koje će nam vratiti snagu – snagu koja će nam vratiti poziciju u parlamentima i vladama, na mjestima na kojima se odlučuje o našoj i sudbini naše djece. Bošnjačkom narodu je potrebno političko jedinstvo. Potrebno je da se okupimo oko političke opcije koja ima snagu uvjerenja, koja ispravno tumači šta je u najboljem interesu našeg naroda i koja čvrsto zastupa te interese u političkoj areni. Zrelost i jedinstvo – to je naš dug prema braniocima Bosne i Hercegovine. Neka je vječni rahmet na sve naše plemenite šehide. Neka je vječno sjećanje na sve poginule borce Armije Bosne i Hercegovine. Hvala Vam“,- kazao je Izetbegović.

Predsjedavajući Predsjedništva BiH, Bakir Izetbegović, je u svom govoru posebno istakao svoju pomoć za dvije stvari u Bužimu, a to su izgradnja Sportske dvorane i izgradnja Islamskog kulturno-edukativnog centra Bužim.

Načelnik Agan Bunić je čestitao dan formiranja 505.-te brigade, te kazao da je ovo prilika da se sjetimo herojske borbe jedne od najboljih brigada ARBiH, te da odamo dužno poštovanje onima koji su dali sve u odbrani jedine domovine BiH, Krajine i Bužima. Načelnik Bunić je i svečano Manifestaciju proglasio zatvorenom.



Druženje pripadnika 105./505. Viteške brigade

U prepunoj sali Osnovne škole "Bužim", organizirano je druženje pripadnika 505. Viteške motorizovane bužimske brigade i naroda Bužima. Okupljenim bivšim borcima obratio se nekadašnji zamjenik komandanta Brigade, Hamdija Mustafić, gdje je istekao kako je u Bužimu, za vrijeme odbrambeno-oslobodilačkog rata bilo mobilisano 94% sposobnog stanovništva. Prisutnima se obratio i načelnik općine Bužim Agan Bunić i predsjedavajući općinskog vijeća Abid Mulalić, koji su čestitali borcima dan osnivanja Brigade, te im se obratili prigodnim riječima.

Druženju je prisustvovao i direktor Hayat Produkcije, a televizija Hayat je ovogodišnji medijski pokrovitelj manifestacije Slobodarski dani. Sponzori ovogodišnjeg druženja su bili "Zlatna džezva" Visoko i pekara "Klas" iz Sarajeva koji su svoje proizvode dijelili besplatno građanima. Okupljene borce je zabavljala ratna grupa Behar.





Dan formiranja glavnog kriznog štaba

Obilježena 22. godišnjica od formiranja Glavnog kriznog štaba za područje općine Bužima, tadašnje Mjesne zajednice u okviru općine Bosanska Krupa, te 21. godišnjica od prijema ratne zastave 105. Bužimske udarne muslimanske krajiške brigade. Organizacioni odbor za obilježavanje značajnih datuma za općinu Bužim, zajedno sa općinskim načelnikom Aganom Bunićem, te predstavnicima boračkih organizacija na području općine Bužim i njihovih saboraca godišnjicu su obilježili posjetom Turbetu Generala Izeta Nanića i poginulih pripadnika 505-te Viteške brigade učenjem fatihe i polaganjem cvijeća. Nakon posjete turbetu u Centru za kulturu, sport i informisanje Bužim, održana svečana sjednica posvećena ovoj značajnoj godišnjici, gdje su prisutni gosti imali priliku čuti jedan dio iz referata kojeg je sačinila radna grupa o osnivanju Glavnog kriznog štaba teritorijalne odbrane. Prisutnim gostima obratili su se predsjednik Organizacionog odbora za obilježavanje značajnih datuma općine Bužim Abid Mulalić, prvi komandant Glavnog kriznog štaba Esad Velić, tadašnji potpredsjednik Skupštine opštine Bosanska Krupa Ifet Šišić, te Zijad Nanić, pomoćnik za bezbjednost komandanta 505.vtmbr Izeta Nanića.



ZA PODSJEĆANJE: KRIŽNI ŠTAB BUŽIM

Po otpočinjanju otvorene agresije na Republiku Bosnu i Hercegovinu, a na osnovu Odluke Predsjedništva BiH o osnivanju i zadacima kriznih štabova u Bužimu je 04.04.1992. godine održan zbor građana na kojem su bili prisutni i odbornici Skupštine SDA Bužim na kojem je jednoglasno donesena odluka o osnivanju glavnog kriznog štaba za područje bužimskog područja.

Glavni krizni štab je od dana osnivanja bio u stalnom zasjedanju, a jedan od prvih zadataka je bio formiranje jedinica Teritorijalne odbrane, jedinica Civilne zaštite, pomoćnih kriznih štabova i vojne policije. Prvi komandant što Bužim bio je Esad Velić, a načelnik štaba Izet Nanić. Osnovni zadatak Glavni krizni štab je bio ustrojavanje prvih jedinica Teritorijalna odbrana, praćenje situacije na terenu i donošenje pravovremenih odluka u cilju zaštite naroda i teritorije R BiH.

Poseban problem kod osnivanja GKŠ je bio ne priznavanje istog od strane tadašnjih političkih struktura općine Bosanska Krupa. Također, povodom obilježavanja prve godišnjice osnivanja Glavnog kriznog štaba za područje Bužima uprilečena je svečanost i postrojavanje 105. bužimske udarne muslimanske krajiške brigade na kojoj je svečano uručena ratna zastava ovoj brigadi. Ratnu zastavu komandantu 105-te bužimske brigade uručio je komandant Unsko-samske operativne grupe Ramiz Dreković.



„Danas nedostaje ovakvih dalekovidnih i važnih odluka, ali i tadašnjeg jedinstva i patriotizma, uz nadu da će se stvari ipak popraviti, zbog sadašnjih i budućih generacija koje dolaze. Mi bužimljani posebnu pažnju pridajemo historiji i odbrani Bosne i Hercegovine, te u tom smislu obilježavaćemo sve bitne datume iz odbrambeno-oslobodilačkog rata koje ni mi, ni geeracije koje dolaze poslije nas ne smiju zaboraviti“, kazao je Bunić.





U Bužimu obilježen 15. April – Dan Armije BiH

Predsjedavajući općinskog vijeća Abid Mulalić, načelnik općine Bužim Agan Bunić sa saradnicima i predstavnicima boračkih udruženja posjetili su turbe generala Izeta Nanića i svih šehida 505. Viteške brdske brigade povodom obilježavanja 15. aprila – Dana Armije Republike Bosne i Hercegovine.

„Na današnji dan prije 22. godine formirana je Armija RBiH što se slavi kao Dan armije, u čijem sastavu je bila i 505. Viteška brdska brigada kao dio 5. Korpusa Armije RBiH što nikada ne smijemo i nećemo zaboraviti. Podsjećanje na 15. april – Dan Armije RBiH je podsjećanje na herojsku odbranu domovine Bosne i Hercegovine, njen historijski kontinuitet i njene vrijednosti. Uvjereni smo da Bosna i Hercegovina ima svoju evropsku budućnost bez obzira na teškoće i sporost u dogovaranju koje ima unutar same sebe. Stoga, u ime Općine Bužim i u svoje lično ime, ovim povodom upućujem čestitke svim pripadnicima Armije R BiH, te članovima šehidskih porodica, kao i ratnim vojnim invalidima, dobitnicima ratnih priznanja i odlikovanja i demobilisanim borcima“, kazao je načelnik Bunić.



Dostojanstveno obilježena bitka “Breza ‘94”

Na koti Radoč, održan je i historijski čas, a pred mnogobrojnim skupom, borci i starješine Brigade evocirali su uspomene na ovu akciju, kojom je direktno rukovodio Ratko Mladić, koji je u navedenoj akciji i ranjen od strane hrabrih bužimskih vitezova.

O jednoj od najvećih ofanziva kojom je komandovao haški optuženik Ratko Mladić i u kojoj je učestvovalo oko 9.000 neprijateljskih vojnika, nakon historijskog sata govorili su: Zijad Nanić, ratni pomoćnik komandanta za bezbjednost, Nijaz Veladžić – Veljun, kao i borci direktni učesnici u borbi koji su imali priliku evocirati svoje uspomene na ovu veliku bitku. Zahvalu bužimskim vitezovima, porodicama poginulih boraca i ratnim vojnim invalidima na izvojevanoj pobjedi u ovoj veoma značajnoj operaciji izrazio je načelnik općine Bužim Agan Bunić, koji se obratio ispred općine Bužim i Organizacionog odbora za obilježavanje značajnih datuma iz proteklog odbranbeno- oslobodilačkog rata 92-95.





Obilježena bitka Munja '93

Obilježavanje dvadeset i prve godišnjice bitke Munja '93, značajne ne samo za općinu Bužim nego i cijelu državu BiH otpočela je sa hurbom, jasinom koji su proučeni u džamijama MIZ Bužim, te svečanim prijemom u prostorijama općine Bužim kod načelnika Agana Bunića. Održano i druženje pripadnika Hamzi i Gazija, jedinica 505.-te bužimske viteške brigade u područnoj školi Zaradostovo, odakle su i kretali u bitke. U svome obraćanju prisutnim članovima Hamzi, Gazija na održanom druženju, kao i na prijemu porodica poginulih boraca u ovoj bitki načelnik Bunić je istakao:

„Prije svega želim da vas poselamim i zahvalim na odazivu u svoje lično ime i ime predsjednika Organizacionog odbora gospodina Abida Mulalića. Uzimajući u obzir da obilježavanje značajnih datuma treba vezati za institucije opredijelili smo se da Vas pozovemo u Općinu na prijem koji će održati sutra. Smatram da je ovakav vid prisjećanja na minule važne događaje garancija njihovog obilježavanja i u budućnosti. Mi mlađi nismo krivi što nismo imali godina da budemo učesnici odbrane jedine nam države Bosne i Hercegovine. Općina nema problema sa borcima, i demobilisanim borcima i prema tim kategorijama Općina je otvorena 24h. Odlučili smo se da sredstva koja su do sada izdvajana za rad i djelovanje pojedinih udruženja, usmjerimo i direktno

damo borcima. Na ovakav način smo radili ove godine i tako ćemo nastaviti i do kraja mandata. Smatramo da ovim kategorijama treba direktno pomagati jer sredstva koja se daju udruženjima ne dođu uvijek do onih kojima su namijenjena. Moja obaveza kao načelnika zajedno sa predsjedavajućim općinskog vijeća jeste da Vas pozovemo, selamimo da se sjetimo ove značajne bitke da Vam se zahvalimo za sve ono što su vaši najmiliji dali za ovu državu i općinu. Zahvaljujemo Vam se što ste se odazvali našem pozivu. Na određeni način ovdje završavamo ovaj službeni dio protokola obilježavanja Munje '93. U to ime svim borcima, oficirima i svim onima koji su na bilo koji način učestvovali u stvaranju ove velike bitke,





posebno porodicama koji su u njoj izgubili svoje najmilije, u ime Općine i u ime Organizacionog odbora za obilježavanja svih značajnih datuma iskreno čestitam ovu veliku pobjedu. Molim Allaha dž.š. da podari sabura svima koji su pretrpjeli gubitke. Posebno mi je drago da danas ovdje vidim ovu našu omladinu koja se okupila i koja se uvijek odazove na obilježavanje događaja iz perioda 92.-95. Bez obzira na probleme koji se pojave s vremena na vrijeme uslijed nerazumijevanja, neuvažavanja institucija Općine, mi ćemo dati svoj doprinos i nećemo nikad zaboraviti ono što su najbolji sinovi naše države dali u njenoj odbrani da bi mi danas nešto mlađi vodili općinu i uživali slobodu koju imamo. U to ime iskrene čestitke svim pripadnicima 505. za ovu i sve druge bitke, jer su one od istog značaja, ali danas se prisjećamo onih koji su dali svoje živote u ovoj bitki.

U bitki Munja '93 živote je izgubilo 17 pripadnika 505.-te viteške bužimске brigade, a 38 ih je ranjeno, a teško je ranjen jedan od najboljih komandanata bataljona Hasan Musić-Musa koji je podlegao zadobijenim ranama desetak dana kasnije u RMC Bihać. Na Kedića Glavici održan je historijski sat i otvoreno spomen obilježje. Kantonalni ministar za pitanja boraca i ratnih vojnih invalida, zajedno sa djecom poginulih u bitci Munja svečano otvorio Spomen obilježje poginulima u ovoj slavnoj bitci.





Obilježen Dan Osnovne škole „Čavnik“ i „Konjodor“

Uz prigodni svečani program u prisustvu velikog broja učenika, nastavnika, roditelja i gostiju, obilježen je Dan O.Š. „Čavnik“ u Čavi, a nekoliko dana kasnije i Dan Osnovne škole „Konjodor“. Osnovna škola „Čavnik“ je izgrađena u programu „1000 škola u BiH“ za potrebe područja MZ Čava, radi povećanog priliva i veće obuhvatnosti učenika osmogodišnjim školovanjem, te je stoga prerasla iz četverorazredne u osmorazrednu školu. Ovogodišnje priznanje učenika generacije dodijeljeno je Ajli Mustafić. Osnovna škola Konjodor u svom sastavu ima jednu područnu četverorazrednu školu „Brigovi“ na Brigovima. Raniji naziv centralne škole bio je OŠ „Suljo Mirvić“. U Konjodoru škola postoji od 1955. godine i radi kao područna četvero-razredna škola u sastavu OŠ „Bužim“ sve do 12.02.1982. godine kad postaje samostalna. Ovogodišnje priznanje učenika generacije dodijeljeno je Sakibu Muzaferoviću. Članovi mnogobrojnih sekcija pomenutih škola priredili su izuzetan program za goste. Redom su se nizale tačke folklornih, ritmičkih, dramskih te mnogih drugih grupa koje su, uz pomoć svojih nastavnika i roditelja, skrojili program koji je oduševio goste. Uz roditelje i brojne goste, programu obilježavanja Dana škole prisustvovao je i u ime Općinskog načelnika, direktor JU „Centar za kulturu, sport i informisanje“ Bužim, Mersudin Nanić koji je, pored čestitke učenicima i nastavnicima te radnom oso-

blju povodom Dana škole čestitao, istakao važnost obrazovanja. *Želim sve najljepše i još mnogo dobrih rezultata u učenju i vladanju učenicima i nastavnicima Osnovnih škola „Čavnik“ i „Konjodor“ u povodu njihovog dana. Također je rekao da se u narednom periodu nada da će općina Bužim, shodno svojim mogućnostima, pružiti još veću podršku ovim Osnovnim školama od dosadašnje jer one to zaslužuju.* Uručena je i zahvalnica općini Bužim za veliku nesebičnu pomoć u realizaciji i podršci obilježavanja Dana škole koji su i ovaj puta podržali i potpomogli. Zahvalnicu je uručio direktor Osnovne škole Hasan Dedić, a u ime općine Bužim primio direktor JU „Centar za kulturu, sport i informisanje“ Bužim.





Dan Mješovite srednje škole “Bužim”

U amfiteatru Mješovite srednje škole “Bužim” svečano je obilježen Dan škole, dvadeset i prva godišnjica postojanja ove obrazovne ustanove. Na početku programa, prisutnim gostima obratio se direktor Zlatan Topić te im čestitao školski praznik. Ispred općine Bužim svečanost je uvećao savjetnik općinskog načelnika Zijad Nanić, i predsjedavajući općinskog vijeća općine Bužim Abid Mulalić. *„Najbolji pokazatelj opravdanosti osnivanja ove obrazovne ustanove jesu njeni prvi učenici koji su danas profesori i njeni rukovodioci, a ne mali broj je i onih koji su uspješni i u drugim sredinama u različitim područjima djelovanja. Svim učenicima i profesorima iskrena čestitka povodom Dana škole sa željom za puno uspjeha u svim područjima vašega života i rada“*, istakao je savjetnik Nanić u svome izlaganju. Nakon obraćanja domaćina i gostiju uslijedio je zanimljiv kulturno-zabavni program kojeg su izveli učenici MSŠ “Bužim”. Prisutni su mogli i vidjeti izložbu učeničkih radova. Srednja škola u Bužimu osnovana 16. oktobra 1993. godine, u samom jeku rata. Do izgradnje novog objekta nastava je izvođena u staroj zgradi Osnovne škole „Bužim“. Godine 1995. započela je izgradnja novog objekta srednje škole u kojem je nastava krenula školske 1999/2000. Na prijedlog Ministra obrazovanja nauke, kulture i sporta Federacije Bosne i Hercegovine, Enesa Karića, izgradnju Srednjoškolskog centra finansirao je Visoki saudijski komitet.





Dan nezavisnosti obilježen promocijom knjige “Ogledi o državnosti i političkom razvoju BiH”

U prepunoj velikoj sali „Centra za kulturu, sport i informisanje“ Bužim, pred više od tri stotine građana viteškog Bužima svečano je obilježen 1. mart Dan nezavisnosti Bosne i Hercegovine. Obilježavanje Dana nezavisnosti počelo je učenjem Fatihe na turbetu generala Izeta Nanića. Svečanoj akademiji prisustvovali su predstavnici političkog, javnog, kulturnog i vjerskog života. „Put u nezavisnost Bosne i Hercegovine bio je jedini i ispravni i mogući put opstanka svih naroda koji žive u našoj državi bez obzira kojoj nacionalnosti pripadali. Zato je 1. mart 1992. godine jedan od najznačajnijih datuma za ovu državu, jer su se građani izjašnjavali o tome da li su za nezavisnu, suverenu i jedinstvenu državu Bosnu i Hercegovinu“, rekao je predsjedavajući općinskog vijeća Abid Mulalić. Većina građana, njih oko 64 posto, zaokružilo je „DA“ na referendumskim listićima i tako je Bosna i Hercegovina upisana na kartu nezavisnih država svijeta. Odmah nakon referenduma, Vijeće ministara Evropske unije je 6. aprila 1992. godine donijelo odluku o međunarodnom priznanju Bosne i Hercegovine.

„Načelnik općine Bužim Agan Bunić, naglasio je važnost ovakvih okupljanja u ovom djelu naše domovine, jer i u ratu kada nam je najteže bilo pokazali smo kako se branila i odbranila država Bosna i Hercegovina.

Večeras našim dolaskom potvrdili smo našu ljubav prema domovini, kao i što smo to potvrdili 1. marta 1992. godine. I na kraju želio bih da kažem da mi ovdje u Bužimu, dokaz smo da je pozitivno glasanje prije 22 godine bilo ispravno i da Bosna postoji kao što je oduvijek postojala i da će postojati dok je nas. Tom prilikom u ime općine Bužim, u svoje lično ime, želim da vam čestitam Dan nezavisnosti jedine nam domovine Bosne i Hercegovine“, rekao je , između ostalog Bunić.



U okviru obilježavanja Dana nezavisnosti održana je i promocija knjige “Ogledi o državnosti i političkom razvoju BiH” – treće dopunjeno izdanje, autora Mirka Pejanovića. Promotori ove knjige bili su prof.dr. Mujo Demirović, redovni profesor na Pravnom fakultetu u Bihaću, i prof.dr. Nevzet Veladžić, dekan Pravnog fakulteta Univerziteta u Bihaću. Pejanović u ovoj knjizi izražava kritički i otvoreni odnos, njegovo djelo odiše stavom da je BiH kao i bilo koja druga država jedna historijska činjenica.



U knjizi se tretiraju pitanja kao što su: državnost BiH u društveno-historijskom kontekstu, struktura i razvoj političkog pluralizma u BiH, razvoj demokratije u lokalnim zajednicama, politički razvoj i ustavne reforme, migracije i povratak izbjeglica, BiH u procesu evropskih integracija. Prvo izdanje štampano je 2010. a drugo 2012.godine.

U drugom izdanju knjiga je dopunjena poglavljem koje se odnosi na pretpostavke ubrzanja integracije države BiH u Evropsku uniju, a u trećem posebno, osmo poglavlje se odnosi na protivrječnosti u razvoju parlamentarne demokratije u BiH. Pored promotora Demirovića i Veladžića, prisutnima se je obratio i sam autor, Mirko Pejanović, koji je i počasni građanin općine Bužim.





Svečanom akademijom i promocijom knjige obilježen Dan državnosti BiH

Svečanom akademijom i promocijom knjige i ove godine je obilježen 25. novembar – Dan državnosti Bosne i Hercegovine. Povodom ovog značajnog datuma proučena je i fatiha na turbetu šehidima 505. Vtubr i generalu Izetu Naniću. Nakon toga, upriličena je svečana akademija u kojoj možemo slobodno kazati uživale sve generacije. Svečanoj akademiji pored zvanica prisustvovali su brojni građani koji su samim svojim prisustvom potvrdili da datumi za opstojnost države ne smiju i ne mogu biti zaboravljeni u viteškom gradu Bužimu.

„Drugom godinu za redom uz svečanu akademiju promoviramo i neki od naslova iz BiH, i na taj način želimo ukazati na značaj knjige i jedine nam domovine. Bosna i Hercegovina je trajna historijska vrijednost sviđalo se to nekome ili ne, napori da se sačuva naša zemlja kao cjelovita država traje više od hiljadu godina. Važan datum u tim nastojanjima je i 25. novembar 1943. godine, koji je označio prekretnicu u historiji BiH i kojim su udareni temelji na kojima počiva i današnja BiH“, kazao je načelnik općine Bužim Agan Bunić u svome obraćanju. U drugom dijelu svečane akademije upriličena je promocija knjige Esmira Bašića, autora knjige „Traganje

za istinom“, u kojoj autor analizira odnos medija prema događajima koji su tiču Bosne i Hercegovine i to prvenstveno Bošnjaka, te pokušava da pronade istinu kroz svoju analizu. Traganje za istinom“ je knjiga u kojoj je autor objavio svoje kolumne i eseje objavljivane u listu „Preporod“ i drugim printanim i elektronskim medijima. U kulturno-zabavnom programu učestvovala je bend hora „Gazija“ sa instrumentalom „Iznad Tešnja sunce sija“.





Humanitarna pomoć “Narod Bužima za narod Olova”

Konvoj pomoći koji je nosio simboličan naziv “Narod Bužima za narod Olova” dopremljen je u Olovo gdje je delegaciju ispred općine Bužim, privrednike, aktiviste i volontere dočekala delegacija općine Olovo. Nakon uspješne akcije građana općine Bužim u saradnji sa humanitarnim, nevladinim organizacijama kao i privrednicima u prikupljanju pomoći za stanovništvo koje je ugroženo u poplavama i klizištima koje su nastale, posebno usjevima a i okolnostima u kojima živi veliki broj socijalno ugroženog stanovništva Olova, odlučeno je nakon što je konvoj iz Bužima krenuo sa 3 kamiona, 8 kombija i 4 auta humanitarne pomoći da se jedan dio prikupljene pomoći direktno podjeli najugroženijim domaćinstvima Olova, što je i urađeno.

Veliki broj porodica kojima je dodjeljena pomoć izrazili su zahvalnost narodu Bužima i poželjeli su da se nikome ne desi ovo što se njima prethodnih dana dogodilo u poplavama i klizištima. Također, pomoć iz općine Bužim dostavljena je stanovništvu Sanskog Mosta i Prijedora, gdje je uručeno 55 paketa sa osnovnim životnim namirnicama, higijenskih potrepština, voda i deke.

„Akcija je trajala tri dana i u tom periodu građani su prikupili, kao što smo već i kazali oko 100.000 konvertibilnih maraka u različitim vrstama roba, od prehrambenih arti-

kala do odjeće i obuće. Ovom gestom narod općine Bužim izrazio je duboku solidarnost sa narodom općine Olovo koji u ovim danima proživljavaju vrlo teške dane izazvane poplava i klizištima u većini dijelova naše domovine, i na kraju želio bih da se zahvalim svim sugrađanima, humanitarnim i nevladinim organizacijama, privrednicima, volonterima, te svima onima koji su na bilo koji način učestvovali u ovoj plemenitoj akciji. Na ovaj način smo iskazali veliku humanost i visok stopen jedinstva građana, organizacija i općine Bužim, zbog čega trebamo biti ponosni“, kazao je između ostalog načelnik Bunić.





U općini Bužim potpisan Memorandum o saradnji

Projekat Mreža za aktivne zajednice, koji se provodi u cijeloj Bosni i Hercegovini imao je danas svoj epilog i u Bužimu, gdje je potpisan Memorandum o saradnji između Fondacije Mozaik, Udruženja mladih Bužim, općine Bužim i pet mjesnih zajednica odabranih u ovom projektu, Mrazovac, Elkasova Rijeka, Brigovi, Varoška Rijeka i Zaradostovo.

Memorandum o saradnji predviđa provođenje edukacija na kojima će učestvovati po četiri člana iz savjeta odabranih mjesnih zajednica, a cilj cijelog projekta pa i samih edukacija jeste jačanje kapaciteta savjeta mjesnih zajednica sa naglaskom na unapređenje kapaciteta mladih i žena u istima. Na današnjoj ceremoniji potpisivanja memoranduma dogovoreni su i prvi termini održavanja edukacija, 23. i 24. augusta ove godine. I načelnik općine Bužim, i predstavnici udruženja mladih Bužim kao i svi predsjednici odabranih mjesnih zajednica zahvalili su se Fondaciji Mozaik za odabir njih samih u ovom projektu kojeg finansira Evropska Unija.



Certifikat UNDP-a za općinu Bužim

U zgradi UN-a u Sarajevu upriličeno je svečeno dodjeljivanje certifikata za uspješno proveden proces planiranja lokalnog ekonomskog razvoja za 22 općine u BiH.

Certifikati su uručeni od strane direktorice SDC BiH Joseph Guntern, te zamjenica rezidentnog predstavnika UNDP-a u BiH Zahire Virani. Jedna od općina dobitnica ovog značajnog certifikata u procesu planiranja razvoja je i općina Bužim, a certifikat je uručen općinskom načelniku Aganu Buniću.





Saradnja policije i općine garant veće sigurnosti građana

Na inicijativu novoformirane Pete policijske uprave Bosanska Krupa u kabinetu općinskog načelnika održan je radni sastanak načelnika uprave Himze Krupica i Agana Bunica načelnika općine Buzim. Sastanku je prisustvovao i novoimenovani komandir Policijske stanice Bužim, Esad Duranovic.

Tema sastanka je bila sigurnosna situacija na području općine, rješavanje saobraćaja i parkinga, krivičnih djela svih vrsta, opremanja i osposobljavanja policijskih službenika. Posebno su istaknuti rezultati zabilježeni u proteklih nekoliko mjeseci na suzbijanju nelegalne sječe šuma i otkrivanja dilera opojnim drogama. Istaknuta je obavezna saradnja lokalne zajednice i policije u jednoj općini. „

Naša zajednička obaveza je zaštita ljudi i dobara na području Buzima. Ovo je poprilično prirodna policijska uprava dvije općine, mi smo nekad bili jedno u smislu općine. Vjerujem da će općina Buzim i njeni građani imati isti status u okviru Pete policijske uprave kao i građani Bosanske Krupe. Zajedno ćemo raditi na mnogim pitanjima, i u tom smislu stavljam se na raspolaganje policijskoj upravi i policijskoj stanici.“ istakao je načelnik Agan Bunić.





Počela izgradnja džamije u MZ Bučevci

U prisustvu brojnih gostiju, predstavnika vjerskog i političkog života USK-a i općine Bužim, u džematu Bučevci, Medžlisa IZ Bužim, upriličen je svečani čin temelja džamije. Pomoć u izgradnji džamije pružila je i općina Bužim. Tim povodom je općinski načelnik Agan Bunić sa saradnicima prisustvovao je temelju džamije. U obraćanju prisutnima na svečanosti, „istakao je da će općina Bužim nastaviti pomagati izgradnju ove Božije kuće u MZ Bučevci. Potpisan je i sporazum između bužimskog medžlisa i općine oko pomoći Islamskoj zajednici, koji se jednim dijelom odnosi i na finansiranje svih vjerskih objekata. Shodno tome, u planu je i izgradnja Islamskog kulturnog centra u našoj općini“, kazao je načelnik Bunić.

Brojnoj okupljenoj ulemi, gostima i džematlijama džemata Bučevci dobrodošlicu na svečanosti temelja džamije uputio je domaćin Meho Isaković koji se zahvalio svima onima koji su na bilo koji način do sada učestvovali u izgradnji ovog hairli projekta. “Zahvalio bi se općinskom načelniku Aganu Buniću i njegovim saradnicima koji su nam olakšali proceduru oko izgradnje džamije”. U ime Građevinskog odbora džemata Bučevci Suad Duranović kazao je “izgraditi džamiju nije nimalo lako, to zna svako ko je imalo išta u životu radio pogotovo u vrijeme krize i nezaposlenosti. Međutim, kada se počelo sa iskrenom namjerom i vjerom u dragog Allaha i uz pomoć dobrih ljudi pa i Općine onda ništa ne može biti

teško, tako je bilo kod nas. Kada su radovi krenuli na opće zadovoljstvo broj učesnika se povećavao iz dan u dan, a isto tako džamija je rasla i postajala svakodnevno veća i ljepša. Svjesni smo da pred nama predstoji puno posla i puno troškova jer oni najskuplji radovi tek slijede, ali isto tako uz Allahovu pomoć i vašu podršku draga braćo i sestre ova džamija uskoro će dočekati svoje otvorenje”.

Ne krijući radost današnjim činom temelja džamije u MZ Bučevci, predsjednik Medžlisa Eniz ef. Veladžić se zahvalio svima koji su od početka bili uz ovaj projekat i nesebično ga pomagali, žrtvujući svoje vrijeme, trud i novac. Ideja da se na ovom mjestu u džematu Bučevci gradi, izgradi nova džamija stara je više od nekoliko godina, a sami početak odnosno kamen temeljac i zvanični početak desio se tačno prije godinu dana. Zajedno smo gradili sve naše džamije i ondje gdje je džemat bio veći i imao veći kapacitet, ali i ondje gdje smo procijenili da je bilo potrebno izgraditi džamiju bez obzira što se radilo o manjem džematu. Isto tako ćemo ako Bog da, zajedničkim sredstvima, trudom i uz Božiju pomoć završiti izgradnju ove lijepe džamije i vjerujem već na jesen ili početkom iduće godine imat ćemo i svečanost zvaničnog otvora.”

Ovu prelijepu svečanost svojim nastupom upotpunili su i članovi hora Gazija.



NOVOGODIŠNJA ČESTITKA

Poštovane građanke i građani, u ime općine Bužim i u ime Općinskog vijeća općine Bužim, obraćamo Vam se povodom Nove godine.

Uz iskrene čestitke ostanimo povezani zajedništvu i osjetljivi jedni za druge. Ne zaboravimo one koji će novogodišnje praznike dočekati sa zebnjom u duši, učinit ćemo sve u narednoj godini da takvi se više ne osjećaju, jer to je naša zajednička briga. Zato im moramo posvetiti svu pažnju, poštovanje i pomoć.

U tome moramo sudjelovati svi, institucije, rodbina, komšije i prijatelji. Iza nas je još jedna godina, obilježena mnogim poteškoćama, uprkos tome mi smo opet učinili onoliko koliko smo bili u mogućnosti, to ne znači da ćemo stati na realizovanju zacrtani projekata. Idemo dalje, idemo u nove pobjede, pokazati da možemo bolje. Na budućnost moramo gledati s optimizmom, vjerom, i nadom i truditi se riješiti sve poteškoće. Bez Vaše podrške nećemo moći mnogo toga uraditi, upravo zbog toga treba nam Vaša volja, razumijevanje.

U protekloj 2014.godini učvrstili smo odnose sa našim prijateljima u dijasporom, i na tome ćemo ako Boga da dalje raditi, jer i oni su naši građani. Učinimo Bužim ekonomičnijim, kvalitetnijim, prepoznatljivim za investitore. Neka Vam početak Nove godine označi početak novog razdoblja ispunjenog mirom, srećom, zdravljem i ostvarenim planovima.

OPĆINSKI NAČELNIK
Agan Bunić

PREDSJEDAVALAČI OV
Abid Mulalić

ZAŠTO PLAĆAMO KOMUNALNU NAKNADU?



Plaćanje komunalne naknade dužnost je svakog građanina Općine Bužim kako je propisano Zakonom o komunalnim djelatnostima Unsko-sanskog kantona, a pobliže definisano Odlukom o komunalnoj naknadi („Službeni glasnik općine Bužim“, br: 6/12).

Sredstva prikupljena po osnovu komunalnih naknada se isključivo troše na zimsko održavanje ulica, lokalnih cesta, nekategorisanih puteva i plaćanja javne rasvjete. Kako bi sebi učinili život ljepšim i ugodnijim, pozivamo Vas da svoje obaveze izmirujete u skladu sa navedenim propisima, te tako izbjegnute nepotrebne sudske troškove.

NE DOPUSTITE DA VAM SE OVO DOGODI



LEGALIZIRAJTE SVOJE BESPRAVNO IZGRAĐENE OBJEKTE

KRAJNJI ROK ZA LEGALIZACIJU JE 31.12.2016. GODINE
Služba za prostorno uređenje, geodetske i imovinsko-pravne poslove općine Bužim
Info telefon: 037/ 419-501

